





2 Ile in 1 Bde.

12289/A

R

2209

1) BARTHOLIN, T.

2) BEVERLAND, A.

W

H

by

24507

Handwritten text in a cursive script, likely a signature or a name, written in brown ink on aged, stained paper. The text is highly stylized and difficult to decipher, but appears to be a single line of writing. The ink is dark brown, and the paper shows signs of aging, including discoloration and stains.



Viri Doctissimi

THOMÆ BARTHOLINI

D E

L I B R I S
LEGENDIS
DISSERTATIONES,

Quas

Propter raritatem ac Præstantiam

Publicæ luci restituit,


& de

VANA LIBRORUM POMPA

Præfatus est

JOH. GERH. MEUSCHEN,

V. D. M. A. C. Ecclesiæ Haganaë.



HAGE-COMITUM,

Apud NICOLAUM WILDT,
 Bibliopolam in plateâ vulgo dictâ het Spuy.

CIO 12 CC XI

MORHOFIUS *In Polyhistore Lib. I. cap. xvi.*

THOMAS BARTHOLINUS magni Vir Nominis , non inter Medicos tantum , sed & inter Polyhistores & Philologos , sub extremam ætatem Bibliothecæ Academicæ Hafniensi admotus , occasionem nactus est , *Commentarium de Libris Legendis* scribendi. Parvæ quidem liber molis est , sed in quo quasi constipata sunt utilissima de Libris monita & notitiæ ad multas disciplinas utiles.



ILLUSTRI. AC. PRÆNOBILI.

DOMINO.

VALENTINO.
ZIGELIO.

SERENISSIMI.

BRUNSUICENSIIUM. LUNEBUR-
GENSIUMQUE. DUCIS
CONSILIARIO. GRAVISSIMO.
ET. APUD. POTENTISSIMOS.
BELGII. FOEDERATI. ORDINES.
RESIDENTI. MINISTRO.

VIRO.

ERUDITIONE. SAPIENTIA.
PRUDENTIA.

MAGNISQUE. PER. UNIVERSAM.
GALLIAM. NARBONENSEM. AQUI-
TANICAM. LUGDUNENSEM.

HISPANIAM.

ALIASQUE. DISSITAS. TERRAS.
PYTAGORÆO. MORE. INSTITUTIS.
ITINERIBUS.

VALDE. INCLYTO.

MULTORUM. MAGNATUM. DELICIIIS.
VIRTUTIS. AC. PIETATIS. SIMU-
LACHRO.

ANTIQUE. FIDEI RARO. EXEMPLO.
BONARUM. ARTIUM. PROMOTORI.
ERUDITORUM. MOECENATI.
ECCLESIAE. NOSTRAE. FULCRO.

A C.

FAVITORI. SUO. OPTIMO.
PAUCAS. HASCE. PLAGULAS.
LICET. EX. PARTE. TANTUM. SUAS.
I N.

GRATI. ANIMI.
CULTUS. SUBMISSI.
MAXIMÆQUE. OBSERVANTIÆ.
T E K M H P I O N.
D E V O T A. M E N T E.
L I B A T. A C. S A C R A T.
T H U R A Q U E. A R D E N T I U M. P R E C U M.
P R O. E J U S.


VITA. ET. FELICITATE.
PERPETUAQUE. SALUTE.
MORE. ANTIQUO. ACCENDIT.
ILLUSTRIS. EJUS. NOMINIS.

CULTOR. PERENNIS.

JOH. GERH. MEUSCHEN.

Lectori Benevolo ac Christiano
salutem dicit gratiamque
precatur

JOH. GERH. MEUSCHEN.

S. I.  *X* quo vere eruditi sapientesque viri universum terrarum orbem eruditionis suæ gloria impleverunt, magnisque ideo honoribus sunt affecti; surrexere statim multi, qui eadem gloria incitati, certatim eam indefesso sapientiæ ac bonarum artium studio assequi conati sunt. Imo tanta fuit hujus gloriæ vis, ut ea quoque ignavissimi ventri grabatoque dediti homines fuerint capti, omnique nisu illustre eruditorum nomen ambierint. Verum, quia hisce nimis arduus ad veræ eruditionis culmen videbatur ascensus, viæque ad id ducens nimis difficilis, & absque multo labore, sudore, diligentia, difficultate ac vigiliis haud conficienda, in aliam a recta via deflexere orbitam, quærentes non tam veræ sapientiæ ac eruditionis incomparabiles gazas,
quam

PRÆFATIO.

quam vanam ejusdem externam speciem, vanumque eruditi absque eruditione nomen, contenti, si modo umbram pro Junone amplecterentur.

§. 2. Hunc finem, nempe inane solum eruditi nomen, ut consequerentur, eoque mundo fucum facerent, indoctisque illuderent, varias inclarescendi artes effinxere, ut magnam titulorum Pompam, Curiositatis nimium studium, amorem antiquitatis, studium disputandi, ampullas verborum, genus dicendi obscurum ac inusitatum, Opiniones vel novas vel Paradoxas, multa aliunde exscripta allegata, *πλυγαφίαν*, externam *πολυισορίαν*, aliaque innumera, alibi in *Diss. mea de Præjudicio Auctoritatis* jam fusius exposita. Præprimis hanc gloriam quæsivere, hodieque quærunt, vana magnaque librorum pompa.

§. 3. Omne itaque Studium collocant in conquirendis undique libris, ac instruenda magna Bibliotheca, qua si gaudeant, ipsam se possidere sapientiam ac eruditionem sibi persuadent. Occurrunt in dies hujus generis homines quam plu-

MEUSCHENII

plurimi, qui licet literarum sint rudes, disciplinarum incapaces, bardi, Davi, tamen eruditorum numero adscribi volunt, ex ea ratione, quod eruditorum labores, libros ac scripta magnopretio, uti olim quidam Epicteti Lampadem, sibi comparaverint, ac in scriniis suis non in pectoribus arcte custodiant. Hinc si facultates ipsis affluunt, undique ex variis Regionibus ac dissitis sæpè terris, exque omnibus Officinis ac Librorum Auctionibus, libros corradunt, comportant, & quidem absque selectu, absque ordine, absque scopo, absque ulla Librorum cognitione. Emunt enim scripta, quæ ipsos latent, quorum contenta nesciunt, quorum titulis falluntur, quorum usus eos fugit, quorum Auctores illis sunt Africa nomina, nunquam sæpe antea audita, vel tantum ab aliis ex eodem semidoctorum genere commendata. Et quo magis erudita suppellex admiretur, operam navant, ut pretiosissimas splendidissimasque licet sæpe vilissimas, quales sunt plurimæ in usum Delphini, editiones Auctorum habeant,
utan-

P R Æ F A T I O.

ut anturque charactere chartæ, ut dicitur Regiæ, impressæ, quo eo magis splendor Bibliothecæ, ac illustris, si Dis placet, eorum nominis elucescat. Et ad hunc splendorem promovendum accedit splendida, & quidem vel Gallica, vel Italica, vel Anglica, æqualis Librorum ligatura, denudanturque libri priori, licet adhuc mundo, eleganti, longoque usui inservienti vestimento, & vel Gallico, vel Anglico habitu teguntur, ut eo magis externo aspectu placeant suis possessoribus, ab interna inspectione & lectione abhorrentibus.

S. 4. Equidem non aversor nec improbo elegantem exteriorum librorum cultum ligaturamque, probe sciens dignos esse pretiosissimis involucris claros scriptores, sed detestor solummodo externum eorum cultum, qui cum interno, in crebra lectione consistente, non est connexus. Non exararunt tanto studio optimi scriptores sua scripta, ut in tegumentis auro argentoque variegatis inclusa Pompæ inservirent, sed ut diurna nocturnaque manu versarentur, iisque homines erudiren-

MEUSCHENII.

*erudirentur. Arridet mihi hic S. HIERONYMI (in prolegom. in Jobum) ,
judicium : Habeant , qui volunt , veteres libros , vel in membranis purpureis auro argentoque descriptos , vel uncialibus , uti vulgo ajunt , literis onera magis exarata , quam codices , dummodo mihi meisque permittant pauperes habere schedulas , & non tam pulchros codices , quam emendatos.*

S. 5. Exornant porro Bibliothecas suas variis doctorum virorum imaginibus , non ut iis , qui præcipuus ac genuinus harum imaginum in Bibliothecis usus est , velut calcaribus ad imitationem tantorum virorum in virtute sapientia ac eruditione incitarentur , sed ut pompa vanaque gloria magis iis extollatur. Quam & augent multitudine antiquiorum (sed ut plurimum fraudulenta ac subtili novi artificis manu confectarum) statuarum deorum dearumque gentilium , picturarum , gemmarum , variarumque , quas Antiquitas coluit , Reliquiarum : Eoque quidam , sive dementiæ sive temeritatis ,
* * *pro-*

P R Æ F A T I O.

procedunt , ut non vereantur ostendere Orphæi lyram , Diogenis peram ac baculum , Herculis clavam , apri Calydonii cutem , Anubis simulacrum , Æschiti pugillares , Areopagitarum bacillos & mille alia risum potius quam fidem merentia , quibus hi homines majorem gloriam aucupantur. Taceo manuscripta , quæ sibi quoque comparant , cum tamen ea vix ac ne vix possint legere , nec eorundum ætatem discernere , antiquiorum characterum notitia plane destituti.

§. 6. Bone Deus ! quot ubique Terrarum reperiuntur hujus generis homines , elegantissimis instructissimisque sæpe Bibliothecis superbientes , quibus tamen nunquam utuntur , quarum libros per universam ætatem ne semel , fugitivo licet oculo , inspiciunt , imo quos ipsimet ne quidem norunt. Istiusmodi homines Tantalosimiles esse videntur , sitientes in mediis sapientiæ undis. Ludovicus XI. Galliarum Rex , ut G. SALDENUS (de Libris cap. VIII. p. 222.) refert , eos facete comparavit gibbosis ; nam cum de illi-

MEUSCHENII.

illiterato quodam audivisset, quod insignem multisque libris refertam Bibliothecam haberet, dicebat: Homo ille gibbo mihi similis videtur, qui licet magnum gestet in tergo gibbionus, numquam tamen id intuetur.

§. 7. Condonanda interim hisce hominibus facile sua dementia esset, si, licet ipsi libris suis non utantur, alios tamen veræ eruditionis cupidos, ad eorundem usum admitterent. Sed denegant quoque eundem omnibus, & optimos quosque non solum canino more ab aditu suarum Bibliothecarum excludunt, sed & communicationem suorum librorum iis, in totius sæpe rei literariæ damnum, denegant: more avarorum, qui quoque soli suis thesauris inbiant, eorum extero aspectu delectantur, iis incumbunt, eorumque usum aliis invident. Similes profecto dixeris hos homines Gryphis, sævo ac Scbytico ferarum generi, qui MELA teste (de situ orbis Lib. II. cap. I p. 144) Thesauros mire amant mireque custodiunt, ac attingentibus sunt infesti. Perstringit hos more solito falsè LUCIANUS (in Dial.

P R Æ F A T I O.

adv. Indoctum in fin. p. 781.) iisque irascitur, quod ipsi libris suis non utentes, eos tamen nulli unquam commodare velint, scribitque: eos hac in parte facere hoc tantum, quod canis in præsepi, qui cum ipse hordeo non vescatur, equum tamen volentem pasci haud finit.

§. 8. Sunt Bibliothecæ domicilia Musarum, sedes Apollinis, ac habitacula illustrium animarum, in quibus dulcem animi capiunt quietem: Sunt dapes animarum, quibus sapientiæ inhiantes animæ vescuntur, delectantur, satiantur, pascuntur. Sed invident avari hi Bibliothecarum vani possessores aliis eruditionis cupidis delicatiora hæc fercula, occludunt iis magnifica & splendida sua domicilia, eaque potius relinquunt gliribus, muribus, in quibus tamquam in magnificis Theatris, ludant consuetum ludum. Tradunt eos potius tineis blattisque ut illis tamquam acceptissimis ac sapidissimis eduliis sese delectent, uti Codrum olim fecisse auctor est Juvenalis, eum sequentibus idcirco exagitans: (Sat. III.)

Jam-

MEUSCHENII.

Jamque Vetus græcos servabat cista
libellos,
Et divina Opici rodebant carmina
mures.

Elegantissima sunt piissimi Isidori Pelusiotæ huc quoque spectantia verba, quæ (ex Lib. I. Epist. 127.) hic annectam: Plurimos, inquit, ut audio libros emisti, atque opinione locuples es, eorum lectionem ignorans, atque idem faciens, quod ii qui frumentum comprimunt, ac tineas alunt. Nam libri quoque tinearum Patres ac Nutritii sunt, cum vinciuntur. Quare aut opibus tuis utere, aut ingentem eruditionem ne læde, nimirum hic quoque comicos sales colligens, dum librorum corruptor, aut librorum sepulchrum, aut tinearum altor appellaris.

S. 9. Sed, quæres, quid faciunt hi Speudo-Philomusi cum tam insigni multoque librorum apparatu, si ipsi eo neque utuntur, neque uti sciunt, neque aliis ejusdem usum permittunt? Gloriæ suæ

** 3

hac

P R Æ F A T I O.

hac librorum multitudine, ut jam dixi, litant, seque vel sapientes esse existimant; si sapientum scripta possident, vel saltem apud alios ita videri & eruditorum numero adscribi volunt. Unde si in hoc vel isto eruditionis genere sese excellere aliis persuadere cupiunt, omnes eò spectantes libros sibi acquirunt; Theologos coeunt ut Theologi videantur; Jurisconsultos, ut inde Jurisconsultorum clarorum nomen acquirant; Medicos, ut illustrium Medicorum famam aquent; Philosophos, ut tanquam Philosophi admirentur; Philologos, ut pro magnis habeantur Criticis; Literatores, ut Polyhistoris gloriam apud alios sibi adsciscant; Antiquarios, ut universæ antiquitatis abdita latibula sese exhausisse alii putent; Auctores Græcos, Hebræos, Syros, Arabes, ut tanquam Literaturæ Orientalis peritissimi venerentur, cum tamen sæpius harum linguarum prima elementa ignorent. Cujusmodi delirans vanaque ostentatione distentus homo nuper in publica quadam fuit Auctione, qui omnes ferè libros Orientales, præcipue Arabicos solus mercabatur,

MEUSCHENII.

batur , ut circumstantes doctos emptores in sui tamquam excellentis Arabis, pro quo se venditabat, admirationem raperet , sed interrogatus præter opinionem a quodam adstante de empti cujusdam libri Arabici titulo ac contentis , obmutescibat , ac suffuso in facie rubore prodebat maximam suam ignorantiam , seque omnium risui ac ludibrio exponebat.

§. 10. Faciunt profecto hi docti Impostores idem quod circumforanei , qui optima ac prætiosissima sæpe pharmaca in Theatris suis imperito ac credulo vulgo ostendunt , ut summi esse Medici credantur, cum tamen rei Medicæ sint ignarissimi ; unde licet ab imperitis ut magni Æsculapii maximis in coelum evehantur laudibus , a peritioribus tamen , ut stupidissimi Acesiæ exhibantur , ridentur ac publice traducuntur. Digni sane eadem ignominia sunt semidocti hi syco-phantæ , licet imperitum vulgus laudibus quam maximis eos prosequatur , & ut Literarii orbis magnos Atlantes eos colat ; tamen rectius à doctioribus ac emun-
ctio.

P R Æ F A T I O.

*Etioris nasi viris excipiuntur sibilo ,
publiceque deridentur. Facit hoc more suo
doctissimus Aufonius , ita (Epigram.
XLIII.) festivè canens :*

Emptis quod libris tibi Bibliotheca
referta est ,

Doctum & Grammaticum te Phi-
lomuse putas ,

Hoc genere & chordas & plectra &
barbyta conde ,

Mercator hodie , cras citharædus
eris.

*Accinit huic semidoctorum flagellum
jucundus ille Juvenalis (Lib. I. Sat. II.)
scribens :*

Indocti primum : quamquam plena
omnia gypso

Chryssippi invenias , nam perfectis-
simus horum est ,

Si quis Aristotelem similem , vel
Pittacon emit ,

Vel jubet Archetypos pluteum ser-
vare Cleanthas.

MEUSCHENII.

Gravissimus morum censor SENECA
carpit quoque hanc inanem Bibliotheca-
rum pompam vana mque inde quæsitam
gloriolam, in elegantissimo de Tranquilli-
tate Animi (cap. ix.) commentario,
inquiens : Non esse elegantiam illud
aut curam , sed studiosam luxuriam.
Imo scribit porro , ne studiosa quidem,
quoniam non in studium sed spectacu-
lum comparuerant : Sicut plerisque
ignaris etiam fervilium literarum , libri
non studiorum instrumenta , sed cœna-
tionum ornamenta sunt.

§. II. Verum licet hi Amusi ex sua
librorum copia sese doctos putent , atque
ab aliis ex magnis suis Bibliothecis ipsi
Bibliothecæ spirantes & ambulantiæ
Musea judicentur , sapientiores tamen
non eadem existimatione eos prosequun-
tur , nec eruditionem librorum abun-
dantiâ metiuntur , scientes veram eru-
ditionem non in librorum magno nu-
mero consistere , darique sæpius doctos
absque libris , vel saltem paucissimis
libris instructos , quibus ad veræ ac so-
lidioris eruditionis apogæum sunt sub-
lati. Non indiget profectò vera erudi-

tio

P R Æ F A T I O.

tio tot voluminum acervis , sed paucioribus doctis instrumentis contenta esse solet. Novimus enim varios Doctissimos viros paucissimorum librorum ope ac usu ad maximam eruditionem pervenisse , ut Philippum Melanchtonem, communem literaturæ elegantioris ac humanioris in Germaniæ restauratorem, cujus Bibliothecam universam, præter Sacra Biblia, Aristoteles, Plinius, Plutarchus & Ptolomæus, LOMEIERO (cap. i. de Bibliothecis pag. 5.) teste , constituere; & Renatum Cartesium , qui præter Euclidem paucissimos libros habuit. Imitanda sunt illustria hæc exempla, cumulanda non sunt præter necessitatem Doctorum scripta , ne ex nimia copiâ animus potius distrahatur, quam erudiat, ne coactâ librorum turbâ spiritus supprimatur potius quam sublevetur.

§. 12. Dandæ sunt aures salutari SENECAE. L. C. monito, suadenti, comparandum esse librorum quantum satis sit, nihil in apparatus. Quemadmodum quisque Doctorum certum studii ac laboris sui scopum sibi præfixit, ita eos
quo-

MEUSCHENII.

quoque solummodo libros sibi acquirat , qui ad destinatum scopum consequendum faciunt , & hoc genus studii , in quo præcipue desudat ac excellere cupit , explicant. Et cum hodierno præcipue tempore nullum fere studiorum ac eruditionis genus extet , quod non infinitis libris , a doctis indoctisque simul sit illustratum , non omnes in eo genere congerendi sunt libri , sed præstantissimi ac exquisitissimi , adeoque librorum accuratus selectus , præcipue in tanta scriptorum copia , quibus mundus jam fere opprimitur , observandus est , curandumque , ne quam multos , sed quam bonos usuique nostro inservientes habeamus libros. Interim librorum numerum , non tam arctis hic circumscribere volo limitibus , quasi eos percurrere ac transilire nefas esset : Dantur tam vasta magnaque ingenia , quorum flagrans plura sciendi fames non nisi multis varii generis libris satiari potest , quibus itaque major eorundem copia est permittenda. Dandum quoque hæc in re aliquid censeo eruditorum oblectamento , ita ut

P R Æ F A T I O.

non solum servant libros necessarios, sed & quosdam in delectationem, quam librorum varietas parit, ut vario librorum genere languescentes ac alta meditatione defessi eorundem animi iterum permulceantur refocillentur ac suscitentur. Doctorum musea ac Bibliothecas vireta esse oportet, in quibus floreat non solum arbores, frutices, plantæ ac olera in communem usum necessaria, sed & vario amænoque colore splendescentes flores ac dulce fragrantibus herbæ, ad maiorem animi remissionem.

§. 13. Præcipuè vario ac majori librorum apparatu indigent illi, qui librorum scriptioni sese applicant, egregiisque ingenii sui monumentis mundum erudire & nomen suum immortalitati commendare gestiunt. Equidem Philosophis, in Philosophia præsertim naturali scripturis sufficere posset unicus universæ naturæ liber, qui uberrimam & inexhaustam scribendi materiam omnibus pandit, ex aliis scriptis non demum hauriendam. Interim & aliorum Philosophorum cogitata & opiniones illis cognitæ es-

MEUSCHENII.

esse debent, antequam cogitationes suas in publicam lucem emittunt, ne acta agant, operamque ac impensam omnem perdant. Quæratio & in alia scribendi materiâ probe notanda est, scrutandique prius alii auctores, ne eadem ab illis dudum scripta denuò proferamus, aut si eandem materiam iiscum tractemus, operam demus, ut saltem magis polita, emendata, aucta & Illustrata in publicum prodeat. Ex quo apparet, & claros scriptores majori librorum suppellectili non esse denudandos. Non sanè Athenæus eruditissimos suos Δειπνοσοφιστῶν libros nobis reliquisset, nisi Laurentiî sui magnâ Bibliothecâ fuisset usus: Non PLINIUS exarasset vastam suam Historiam Naturalem, Bibliotheca Romana destitutus: Non A. Kircherus, Cæsar Baronius tot procudissent ingentia volumina absque auxilio Bibliothecæ Vaticanæ: Nec Baronio opposuisset eruditissimas suas Exercitationes illustris Casaubonus, si non antea habitasset in Bibliotheca Regia Parisina. Taceo Franciscum Sylburgium, Salmasium ac

P R Æ F A T I O.

Grüterum, qui erudita sua opera maximam partem debent Bibliothecæ Heidelbergensi. Prætereo doctissimum C. Barthium, qui Adversaria sua composuit Bibliotheca Lipsiensi adjutus. Relinquo Gabrielem Naudæum, qui Bibliothecâ Cardinalis Mazarini, Nicolaum Rigaltium, qui Parisiana, Meursium qui Leidenſi, Morhofium, qui præcipue Gudii ac Gottorpiensi, Lambecium qui Vindobonensi Bibliothecis usi sunt, harumque ope tot illustria cedroque digna monumenta perpetuæ posteritati reliquere.

§. 14. Magnatibus & Principibus quoque permittendæ magnæ ac illustres Bibliothecæ, nam licet magnitudine regiminis & negotiorum publicorum prohibiti, ipsi Bibliothecis suis frui haud possint, tamen exstruunt hæc magnifica Minervæ sacrariâ in usum aliorum, omnibusque hujus Deæ cultoribus accessionem liberam permittunt, & ita verum Bibliothecarum scopum, nempe Usus, si non privatum, tamen publicum, intendunt, atque adeo exstructione splendidissimarum Bibliothecarum laudem
potius

MEUSCHENII.

potius quam reprehensionem merentur, quâ multo magis digni omnes illi Principes, Magnates, Respublicæ, Civitates, quæ in erigendis publicis Bibliothecis sunt negligentiores.

§. 15. Minime verò censendum est, quasi Magnatum Bibliothecæ tantum & aliis patere deberent, idem scopus esse debet & Privatarum Bibliothecarum a personis privatis in usum proprium instructarum. Quamvis enim Docti Bibliothecas suas in privatum commodum præprimis extruunt, inservire tamen tenentur quoque commodo aliorum Doctorum, ita ut illis, si opus sit, quoque aperiant docta sua scrinia, recludant literarias gazas, communicentque libros, talibus præcipue, quos bonæ fidei librorumque nitori studentes esse habent compertum. Dantur multi sordidi homines, qui communicatos libros non munde tractant, sed squalore & nescio quâ fœdâ illuvie profanant ac boum Cypriorum more maculant: Hi jure à Doctorum Bibliothecis arcendi sunt, his merito denegandi expetiti libri, uti & illis,

P R Æ F A T I O.

illis, qui Græcæ Fidei sunt, cultroque Flaciano frequentius utuntur, lacerando libros, diripiendo Bibliothecas: Quemadmodum hisce jure meritoque aditus ad Doctorem Bibliothecas intercluditur, tamen viri honesti ac candidi non sunt excludendi, sed admittendi potius, librique expetiti iis non denegandi. Nam sicut, secundum Christianæ charitatis regulas, omnia nostra, imprimis si citra damnum nostrum fieri possit, communicanda sunt indigenti proximo; Ita quoque libris nostris ad certum tempus frui proximo permittamus, præcipue si inde nullum in nos damnum, in proximum vero magnum emolumentum redundat.

§. 16. Unde aversandi sunt illi eruditi, quos adeo pallida invidia vexat, ut neque Bibliothecarum neque unius sæpe libri usurpationem anxie petentibus indulgeant, veriti, ne vel alii iisdem alis ad eruditionis gloriam se attollant, vel videantur ex quibus fontibus eruditionem sapientiamque suam hauserint. Sed verè Docti, qui cum eruditione simul pietatem conjunctam habent, ab hac canina ac detestanda

standia

P R Æ F A T I O

standa invidia sunt alienissimi, gaudentes potius ac gloriæ sibi ducentes, si libris suis aliis inservire eorumque & publicum usum hoc modo promovere possint. Sic Lucullus ac Varro illustrium suarum Bibliothecarum frequentationem, nemini invidebant, omnes eo confluentes viros Doctos maximo excipientes favore. Quod & fecere Illustres ac celeberrimi Viri, Thuanus, Bessarion, Hurtardus, Fuggerus, Peirescius, qui promptissima voluntate, omnes Bibliothecarum suarum fores pulsantes in easdem introducere, librosque necessarios illis suppeditare. Nec tacendus est hic sago togaque clarissimus ac Illustrissimus Dominus Baro de Wassenauer & Obdam, omnium Bataviæ nostræ Nobilium Primas ac Copiarum Fœderati Belgii Dux, cujus favorem in communicandis ex magna splendidissimaque ipsius Bibliotheca libris, non solum ego ipse expertus sum, sed & alii eundem comperiunt.

§. 17. Facillimus quoque in ostendenda sua Bibliotheca fuit quondam eruditissimus laudemque meam superans Thomas Bartholinus, illustre illud totius Daniæ Sidus. Antequam enim privata ipsius

ex

M E U S C H E N I I.

ex multis Librorum exquisitissimorum millibus constans Bibliotheca fatali quodam casu incendio consumeretur, eandem omnium usui sacratam quasi habebat, omnium libros ex ea petentium desideriis annuens. Nec minus promptam suam voluntatem ostendit clarissimus hic vir, postquam à Rege, in majus amissum thesauri sui solatium, Regiæ Hafniensium Bibliothecæ præfectus est, quando non solum continua Regiæ Bibliothecæ patefactione discipulorum studiis serviebat, sed et omnes Musarum cultores humanissimè ad Pallados hoc sanctuarium frequentandum invitabat; imo, ut majorem ex Bibliothecarum Visitatione ac Inspectione fructum caperent, eruditissimum Utilissimumque de Libris Legendis Tractatum An. 1672. scripsit, An. 1676. demum Haniæ editum. Hunc propter reconditam in eo eruditionem, multumque quem præstat usum hanc nova editio à situ vindicare lucique publicæ reddere volui, præsertim cum priora exempla jam pridem sint distracta, & in Officinis librariis vix compareant. Tu Lector Benevole! nova hanc editione frui re meisque studiis fave. Dabam è Musæo meo Hagæ-Comitum ipsis Nonis Decembribus A. Q. R CIO IO CC X. τὰ χίλια.

P R Æ F A T I O

TH. BARTHOLINI.

N possessionem universæ naturæ nos ea conditione misit Deus, ut labore mereamur usumfructum.

Cum vero tanta Naturæ sit amplitudo, ut uno spiritu nequeat exhauriri, partimur operas illi dicatas. Per temporum spiramenta assequimur quod simul non licet. In quatuor anni particulas cum Phœbo se natura divisit, & ut singularum fructu gauderent mortales, in menses revocata sui copiam, sed diversa facie, benigna fecit.

Hac duce partimur & nos studiorum vices Naturæ sacras, ne omnibus simul intentus minor sit ad singula sensus, Æstas Floram sibi vendicat. Autumnus adversæ valetudinis præsidia ex Pharmacopoliis visitatis quærit. Hyems in demortuis cadaveribus senescit. Ver denique omnium memoriam refricat, vel futuræ

P R Æ F A T I O

messis præludia tentat. Nullum temporis momentum sine linea nobis effluere patimur. Magna enim & ardua res est, tum Naturæ scientia, tum Medicina. Nec alterutra adhuc ulli se totam simul indulgit, nunquam plus laudis merita, quam cum ex intervallo dixit, sicut olim Portius Latro. Satis felix est, qui in penitiores illius partes successivè receptus gloriari potest ad scientiam se longo ævi spatio penetrasse. Quid hætenus inter Medicos Facultatis nostræ bono publico actum sit, omnium memoriæ obversatur. Ne semper Curios aut Luscinios loquamur, ad aliud studiorum genus Medicorum filios ante ferias invitamus, ut vel memoria Libris inspectis confirmetur, vel ad futuros sequentis anni labores animus instruatur. Neque enim sine Librorum lectione perfectum scientiæ Naturalis & Medicæ culmen assequimur, qua ea quæ vel

à

B A R T H O L I N I.

à Magistris audivimus, vel quacunque exercitatione accepimus, majorum autoritate & consilio robur acquirunt & lumen fœnerantur. Optimi Consultores mortui viventium traditiones animant & perficiunt. Hic tandem se exerit iudicium nostrum & decreta sancit, ut nova cum veteribus inter se composita, de palma ambigua certent, laudenturque hæc vel excusentur. Non omnia ignorarunt Antiqui, nec sciverunt. Maximam remediorum, signorum, totiusque Artis Medicæ cognitionem grati illis referimus acceptam. Ex observationibus autem recentiorum, quibus se supra veterum captum effecerunt non pauci, paucæ ita sua novitate excultæ incedunt, quin plumas ad sui ornamentum ex veteribus Medendi Auctoribus sint mutuatæ. Hinc tantam sapientiam in Hippocrate nostro deprædicant Doctorum penæ, ut nemo post eum sciverit, quod

P R Æ F A T I O

ipse ignoraverit. Non arrogantius ea dicuntur quam verius. Sine studio partium loquamur. Cuncta medicinæ semina in eo animadvertimus, quæ in facienda medecina melius elucent, ex concisa sententiarum subtilitate, & arguta observationum brevitate, si juxta mentem Naturæ, quæ se cotidie explicat, divini senis oracula interpretemur. Errarem verò non parvum errorem, si ab omni errore illos absolverem, & nihil addi ulterius posse serio vultu profiterer. Multa quidem egerunt, qui ante nos vixere, sed non omnia peregerunt. Posteris ex ampla Naturæ messe relictum est spicilegium. Nec ingeniis Juniorum viam Majores præcluserunt ad patentem rerum utilissimarum campum, per quem decurrant. Viam straverunt, quam commodius calcamus. Si breviori semita compendium cura nostra detexerit, non damnamus, sed laudamus Veterum vesti-

B A R T H O L I N I.

vestigia, parem à posteritate gratiam sperantes. Ex utriusque autem veteris pariter & novæ doctrinæ mixtura pulcherrimum animi eruditi nascitur temperamentum, quemadmodum in choro gravi seniorum & acuta juvenum voce perstrepenste, inter singulorum voces, sed occultas, admirabilis oritur concentus incredibili suavitate aures mortalium exsatiens: Sic Naturæ & Libris imputandum quod docti simus, quod cum fiducia morbis imperemus, quod præceptis animum imbuamus & firmemus experientia. Empiricis solisea, si Dis placet, prærogativa conceditur, ut sibi ex se sapiant, & sine cortice nantent. Spernunt Libros nec intellectos nec lectos, & thesaurum publicæ famæ vel negligunt vel contemnunt. Scilicet mel amarum existimant, quod degustare linguæ mentisque vitio nequeunt. At quicumque veri Medici decus tueri vult, ex Hippo-
crate

P R Æ F A T I O

crate Prognostica discat, Methodum ex Galeno, Remedia ex Avicenna, Herbas earumque vires ex Theophrasto & Dioscoride, Chemiam ex Gebero, Pharmaceuticam ex Mesue, Serapione & Nicolao, Anatomen ex Theophilo Protospatario; Chirurgiam ex Celso, Oribasio, Albucase; ut recentiores omittam, qui omnem medicinæ materiam exhauferunt & monumentis literarum ad posteritatem transmiserunt, digni ea propter, cum credentes sibi minimè fallant, qui cum veneratione legantur. Expediet quoque Medicis, aliorum scripta evolvisse, quanquam in alieno argumento versentur. Rarò quippe oculis occurrit Auctor, quin aliud agendo & scribendo, Medicam eruditionem augeat, unde ex non Medicis nata quoque Medicina prostat. Et hic & ibi invenient Artis filii, quæ usum exerceant præteritorum, & præceptis salutaribus, tot seculo-

ip-

B A R T H O L I N I.

rum authoritate firmatis, sequentia studia informant. Nolim tamen ad Librorum servitutem præclara Medicorum ingenia mancipare. Legendi enim Libri à liberis cum delectu & judicio circumspecto, ne Naturæ ipsi præferamus Naturæ interpretes. Labuntur hi aliquando & oneri cedunt, indulgentes ingeniorum suorum & seculorum voluptati. Fatigantur sæpe, ut dormitasse videas Demosthenem & Homerum. Quis miretur? Iliacos intra muros peccatur & extra. Summi fuerunt, homines tamen. Nemo nostrum ab errorum confinio se removit, aut omnia ante oculos posita cernit. Doctrinæ interim materiam à Natura mutuamur, leges methodi à Naturæ Mystis. His vitia, illi imputamus emolumenta. Sapientis judicii est utrumque discernere, ne damnentur non intellecta, nec pro perfectis omnia æstimentur quæ ex

Au-

P R Æ F A T I O .

Auctorum calamis profluxerunt. In his se tempore Vernali opportunè exerceant Asclepiadei , quo Hiemalia studia æstivis imminentibus locum fecerunt , meque Ducem vel sequantur , vel ad meliora Sacra ducant. Ad mortuos viam monstrabo non in tumulis cum fœtore colluctantes , sed scriptis nitidissimis in Palladio Bibliothecæ Academicæ sanctissimo doctè loquentes , non clades tantum Romanorum , sicut olim Publii caput mortuum , nec Cyri interitum , ut Orphei caput , nec Corcydam homicidam , quemadmodum caput olim sacerdotis Iovialis ; sed , quod clarius , semitam vitæ per virtutem , fortem animum , mortisque terrore carentem , & quævis denique præclara saluti mortaliū proposita. Hæc per exemplum docta , præceptis Auctorum animantur , & posthac docenda , methodo Majorum explicantur , in scriptis

ex-

BARTHOLINI.

expressa. Ita in secula regredimur
& veterum vestibus laciniam novam
atteximus. Ita ingenia majorum no-
bis nata nobis inferviunt , & Na-
tura se curæ nostræ subjicit. Biblio-
theca publica omnium votis se ac-
commodans veterum pariter & re-
centiorum loculos nobis excutien-
dos aperit , seculorumque omnium
industriam nostram facit. In fron-
te Bibliothecæ Sacræ Ægypti Osy-
manduas præscripsit : *Ψυχῆς ἰατρείον* ,
Animi medica officina. Nos nostræ
inscribimus : Animi corporisque
Medica officina. Hæc omnibus pan-
ditur quibus honestarum Artium cu-
pidine pectus incalescit. Sed ut in-
offenso pede in hac progrediantur ,
facem accendam , cui , superum be-
neficio , ista cura demandata est.
Antequam enim ad demonstrandos
in publica Bibliotheca Libros per
partes descendam , ut plena ad
omnes susceptæ operæ utilitas dif-
fun-

P R Æ F A T I O.

fundatur , tria mihi necessario expedienda existimavi. Primò Catalogum Universalem ordine alphabetico adornabo , ut sine mora Liber quicunque legentibus pateat. Deinde Chronotaxin Auctorum secundum seculorum serièm conficiam , ut tempora Librorum discernantur. Denique modum cum fructu legendi Libros tradam , sed brevissimè velut sacrum patinæ piper irrorando. Catalogus ubi ad umbilicum perductus fuerit , publicè prostackbit. Chronotaxin singulari Tabella adumbratam , publice suspendam. Modus legendi Libros aliquot Dissertationibus comprehensus , Librorum vel externa spectat vel interna. Illa Auctores expendunt in universum , eorumque vitæ genus , genium , ætatem & scripta , scriptorumque operam , linguam , numerum , valorem. Materiam quoque ad examen vocant in qua Libri olim scripti ,
la-

BARTHOLOINI.

lapides , lignum , æs , pergame-
nam , chartam , sericum , instru-
menta quibus Libri conscribebantur ,
stilum , calamos , modum
scribendi per varios characteres ma-
nu veterum & Typographia re-
centiorum , formam denique Li-
brorum , editionum varietate , lo-
corum , Typographorum , & in-
volucris distinctam. Hæc inter-
nam Librorum materiam propo-
nunt , Sacram vel profanam , seriam
vel ludicram , Formam methodo
comprehensam & verbis propriis.
Quo spectat ratio accuratior in le-
gendis Libris multis iisque selectis
pressius servanda a junioribus , se-
nibus , fœminis , Principibus &
Opificibus quibuscunque , assidui-
tate , sed cum lucrubrationum tem-
perantia , cum variis memoriæ sub-
sidiis , Imaginum , Tabularum ,
Locorum Communium & Indi-
cum. Denique ad iudicium ac-
cedendum , tanquam animam

P R Æ F A T I O.

Lectiois , quod de scriptoribus , eorumque tractandi modo & sensu assequendo ferre convenit , admiculis Lexicorum & Commentatorum , & remotis signorum notarumque obstaculis quæ passim in M S S. & Impressis Libris tyrones remorantur. Hæc erunt Dissertationum argumenta , in Palatio Bibliothecæ Academicæ pertractanda , quibus præmittam primos Natales & incrementa Bibliothecæ nostræ , grata in beatos Testatores Divum Christianum IV , Petrum Albertium , F. Wilhelmi Andreæ Lemvicum , Casp. Brochmanum , Petrum Gelstrupium , Henricum & Thomam Fuirenium , Joh. Mullenium aliosque Musarum Fautores memoria. Crastina diei hora 1 x. primam Dissertationem publicè ibidem recitabo , si Deus voluerit , & eandem
telam

B R T H O L I N I.

telam sequentibus diebus Mercurii
pertexam, si faverit cœptis.

Quisquis adhuc uno partam colit
asse Minervam.

Hafniæ xxix April 1672.



Breviaria Dissertationum LIBRARIARUM.

DISSERTATIO I.

AD libros legendos exhortatio. Illorum utilitas, necessitas, præstantia. A flammis furibusque quomodo præserventur. E terra olim protracti. Academicæ Bibliothecæ Natales & incrementa. Testatorum encomia. Propositum explicandi Libros & hujus officii occasio. Medicos Romæ Bibliothecis fuisse præfectos.

DISSERTATIO. II.

De ipsis Librorum Auctoribus. Supposititii nonnulli. Mali fugiendi. Anonymi cur prodeant. Ficti Fucatique metu vel modestia. Plagiarii.

Breviaria Dissertationum.

*giarii. Ex his excusati Severinus ,
Kragius nostri , aliique. Autorum
Patria & Aetas. Librorum cum
seculis immutata scriptio. Per Theo-
logorum , Juratorum , Medicorum
secula decurritur. Genius singularum
nationum & scriptorum singulorum
Aetatum discrimen. Status varius.
Autorum vitae à se vel aliis conscri-
ptæ. Legendæ Patrum. Effigies
scriptorum in Libris vel Bibliothe-
cis.*

DISSERTATIO III.

*De scriptorum Lingua , Ebræa ,
Græca , Latina. Romana generalis ,
Arabica quoque , Theologis imprimis
& Medicis. Lingua universalis im-
possibilis. Vernaculi Libri quibus uti-
les.*

Breviaria Dissertationum.

les. Milesii Scriptores. Versionibus quid tribuendum. Autorum Opera pondere non numero æstimanda, ex uno sæpe commendantur. Catalogus Operum cujusque.

DISSERTATIO IV.

De materia Librorum vett. Lapidibus & Saxis, foliis arborum & herbarum, ligno & corticibus, cera in pugillaribus, plumbo & ære. Linthei privatorum. Membrane usus ab Eumene inventus, charta succedente, etiam ante Alexandri tempora. Hujus hodie varietas. Librariorum vett. in describendis libris opera. Instrumenta Scriptoria. Styli figura. Quid nigra litera Martiali. Calamus arundineus Celsi. Literarum Romanarum

Breviaria Differtationum.

narum diversitas , à Longobardis corruptarum. De manuscriptorum antiquitate & valore judicium. Codices Danici , Islandici , Gothici. Typographiæ natales & incrementa. Meliorum Editionum Notæ , quæ primæ , vel notis auctiores , viventibus Autoribus. Typographi correctiores. Biblia in membranis. Forma librorum magna ad pompam , parva ad commoditatem. Volumina antiquorum qualia. Tabellæ complicatæ. Libri pumice lævigati , ornati coronide. Luxus in involucris recentiorum.

DISSERTATIO V.

De interna Materia Librorum , quæ vel sola est unius generis vel mixta. Titulos sæpe fallere. Invidia

Breviaria Dissertationum.

dia multorum. Historicorum differentia. Singulare Antiquariorum studium. Philologorum, imprimis Salmasii, libertas in transgressionibus. Damnanda ἀλλώτερον multa. Variæ eruditionis Scriptores varii. De Libris amœnioribus tolerandis, sed obscænis inutilibus, fugiendis. De Deo ubique scribendum. Forma Librorum interna explicatur. Methodus Philosophis adstricta, Philologis libera pro cuiusvis genio & multiscientia. Verbis propriis æqualibusque quomodo res ornandæ. Mediocritas laudatur. Barbaries in eruditis toleranda, sed ornatus decens præferendus.

DISSERTATIO VI.

De modo legendi, Senioribus junioribusque

Breviaria Dissertationum.

ribusque servando. Fæminæ an & quid legere debeant. Principum & Mechanicarum Artium libri evolvendi. Quinam omnes libros legunt. Pagani cautè lectitandi. Nullum tempus lectioni eximitur, sed cavenda nox, cæna & nimia assiduitas. Interrupta studia probantur. Intemperantiæ damna. Magna Volumina quomodo explicanda. An multos Libros habere conveniat. Memoriae subsidia varia, imprimis Repetitio. De Arte Mnemonica, quid statuendum. Tabularum usus. Excerpendi modus. Loci communes ex compendiis. Indicum utilitas, rerum, verborum, Capitulorum, Autorum. Registrum quid. Vett. libri sine distinctione Capitulum & Versuum. Κεφάλαια N. T. olim diversa. Κεφάλαις explicatur. Autorum Chronotaxis. De

Breviaria Dissertationum.

Lexicis Facultatum singularum. Indicum generalium varius ordo.

DISSERTATIO VII.

Judicium de scriptoribus ferendum à peritis. Electio ex optimis & necessariis , pro cujusvis usu vel genio. Ordo lectionis per Compendia singularum Facultatum. Methodi brevissimæ Autores. Virtus Interpretum. Obstacula legentium ex Notis. Punctorum origo. An Codici Ebræo coæva. Accentuum mysteria. Veterum scribarum notæ , ex primis literis, earumque ambiguitas. A Justiniano abrogatæ. Quid Sigla. Notarum celeritas perit. Chinesium hieroglyphica. Notæ Cabalisticæ. Abbreviaturæ Actorum , in allegationibus præsertim. Signa ponderum

Breviaria Differtationum.

*derum in Celso, & Chemicorum dam-
nata. Numerorum notæ ex literis.
Ziffre à Mauris introductæ, Basilio
quoque usitatæ. In Algebra & Musi-
ca notæ. Magicæ periculosæ. Synale-
phæ vett. Scribarumque inscitia vel
celeritas errorum causæ. Pandectæ Flo-
rentini an authentici. Permutatio li-
terarum in Manuscriptis ex Scioppio
deducitur.*



THE UNIVERSITY OF CHICAGO
LIBRARY
1850
CHICAGO, ILL.
JAN 10 1850
THE UNIVERSITY OF CHICAGO
LIBRARY
1850
CHICAGO, ILL.
JAN 10 1850



TH. BARTHOLINI

DISSERTATIO I.

D E

LEGENDIS LIBRIS.

*Ad libros legendos exhortatio. Illorum
utilitas, necessitas, præstantia. A
flammis furibusque quomodo præser-
ventur. Ex terra olim protracti.
Academiæ Bibliothecæ Natales &
incrementa. Testatorum encomia.
Propositum explicandi Libros, &
hujus officii occasio. Medicos Romæ
Bibliothecis præfectos.*

TUrpe semper nostrisque moribus
indecorum existimavi, quibus
animus ad honesta & ingenua me-
liorum literarum Scientiarumque
Studia altius assurgit, ut ignoren-
tur a nobis Libri, vel non satis usus Libro-
rum perspiciatur, quos ad acquirendas rerum

variarum scientias veterum recentiorumque industria nobis reliquit , & tanto apparatu in Bibliotheca publica, liberalitate magnorum deque Republica nostra meritissimorum Virorum , suo ordine per pulpita & capsas ornatissimas dispositos, omnium in se oculos convertere videmus. Periret certè his illisque labor, publico bono tantis lucubrationibus & impensis exantlatus , si ad pompam venusta hæc solam spectarent , oculos magis curiosos fatiatura, quam animos eruditioni inhiantes. Habent quidem etiam Agricolaë hybernis mensibus, ab opere rustico silentibus, instrumenta quasi in custodiam inclusa , vomerem , buram, rastrum , cylindrum ; sed ubi ad opus ventum fuerit vere primo jubente , nisi singulorum usum & fabricam exactius sciverint , perversus arandi conatus turbabit sementem , ut dentale pro stiva substituatur. In armario suo miles suspensa arma , loricam , galeam , scutum , gladios , ficas , hastas , sagittas , arcus , bombardas , pyrobolos , aliaque in perniciem humani generis excogitata organa servat, sed hostibus innoxia , nisi modum utendi perspectum habuerit, noveritque pulverem sclopo infundere , ea mensura quam capit canalis , glandem proportionatam ingerere , rotam intendere & remittere , arcum sinuare ,

vi.

vibrare hastam, gladium distringere, castrisque, quod suasit *Epaminondas*, uti, non palæstra. Quicumque igitur semina disciplinarum pectori suo inferere constituit, quicumque se contra barbariem & ignorantiam, pestes vitæ hostesque infensos armare generoso proposito in animum induxit, non nudos librisve ornatos parietes intueri debet, tanquam *Echionis* tabulas, aut signum aliquod *Polycteti*, sed ad penetralia intima admissus, reseratisque claustris pressius libros explicare cujuscunque commodum inservituros. Non juvabit aspectus pulchræ *Veneris*, nisi usus concedatur concupitæ.

Quid juvat ad surdas si cantet Phæmius artes?

Quid miserum Thamyra picta tabella juvat.

Quid amplissima regna, sine usu? quid fortuna, nisi ea fruaris? quid opes longo labore terra marique quæsitæ, si ab illis possideantur, qui nesciunt, quid valeat nummus, quem præbeat usum, congestis undique saccis indormientes. Ne de nobis fabula hæc narretur in opulentissimo hoc optimorum Librorum ærario, curæ nobis erit, ut tantis bonis sine precio concessis ad satietatem bonæ mentis fruamur, ne Eunuchos imitemur, qui Dominas suas custodiunt, nulla tamen *Veneris*

gaudia experiuntur. Pulcherrima Dearum Pallas, cujus hoc domicilium, cujus hic opes congestæ visuntur, nobis blando nutu procuratur, usumque sui offert, omnibus suo merito raras dotata per artes placitura. Non feret illa repulsam. In amplexus ejus ruimus, & ne oblati muneris parte meliore privemur, totâ perfruamur, quæ se totam nobis gratiose pandit, ut totam nudamque inspiciamus, nunquam pœnitenda animi ad tantam Dæ familiaris consuetudinem admissi voluptate. Quamquam castissimæ Dæ tunicam posuisse sit pudori, zonam tamen sibi solvi benigno assensu patietur. Neque enim induci possum ut credam, esse inter Vos, quotquot honestæ Dæ amore inflammati intra Palatium hoc Literarium adoraturi mecum convenistis, qui inutilem Liberorum supellectilem existiment, dignam illorum industriæ quorum tempora vel otio destinantur, vel minus proficua. Republicæ habentur, malintque hastam Palladis trementem venerari, quam vigilantem Ullam. Enimverò sine hac malè illa vibratur, ut utriusque nexus illis videatur per necessarius, qui ad summa enituntur. Non patitur susceptæ brevitatis filum, ut longius in hoc argumento extendatur. In transcurso saltem divini hujus inventi omnibus necessarii, omni-

ni-

De legendis Libris.

5

nibus sapientibus in pretio habiti meminisse conveniet, cujus auxilio Numen in mundo conservatur, memoria Majorum apud nos perennat, & Orbis vigeat. Hujus beneficio animi ad sapientiam, prudentiam, pietatem instruuntur, & supra plebem se efferunt. Huic debemus commercia cum Deo nostro, justitiæ normam, valetudinis præsidia, artium omnium origines. Hoc est, quod jucundissimam tot rerum, locorum, gentium, urbium, recordationem suggerit, exempla virtutum designat, religionem animat, spemque æternitatis felicitatisque recti amantibus ingerit. Verbo: sine libris Deus jam fileat, justitia quiescit, torpet medicina, Philosophia manca est, literæ mutæ, omnia tenebris involuta Cimmeriis. Non tamen soli libri vel sapientes nos reddunt vel beatos. Jungenda mens hominis, aecedat ingenium, experientia advocetur, ut librorum contenta augeantur vel corrigantur. Hoc instituto magni quidam Philosophi, qui inter eruditos caput efferunt, novam Philosophiam ex ingenio condentes, Libros omnes seponi jubent. At nisi lecti essent Libri veterum, quid boni vel mali inventum olim sit ante ætatem nostram & scriptum, ignorare cogimur. Horum auspiciis in præterita revolvimur, omnium

nium sapientum cogitationes perspicimus, Principum arcana propalantur, & ea per compendium discimus, quæ longam curam postulant, denique majorum inventis quid addendum aut subtrahendum intelligimus. Hinc apud magnos parvosque omniværo, etiam non satis cutlo, librorum dignitas invaluit, quovis ære præstantior. Nolo multorum exemplis rem notam tueri. Ptolemæus certè Rex pignoratæ quindecim argenti talentis ab Atheniensibus *Sophoclis*, *Euripidis*, *Æschylique* libros habuit describendos. Idem Rex ob versionem scripturæ ad Eleazarum Pontificem auri misit talenta quinquaginta, argenti centum, & gemmas non paucas. Illud *Galeno* nostro, hoc *Eusebio* & *Iustino Martyri* credimus. Sed frustra sum, qui in libris commendandis plura verba consumo. Quis unquam Herculem vituperavit, nisi ignavus? Quis libros damnavit, nisi barbarus? Nemo nostrum tam inficetum cerebrum extra calcaneum gerit, quin immensam Dei omnipotentis clementiam exinde metiatur, quod Verbum suum pretiosissimum, oracula Prophetarum & ipsius Filii Christi, & Sanctorum in Ecclesia Patrum scripta, & res gestas Literis ad nostra tempora salvis & incorruptis propagari voluerit. Vere enim D. *Hieronymus* : Audia scripturarum, & Librorum

De legendis Libris. 7

multitudine, & silentio, ac Librariorum sedulitate indigent. Nemo cordatus famam spernit præclarorum factorum, five majoribus meritam, five acquirendam. Annales doctorum, laudes Heroum in secula mittunt ut semper

— *Ingenio stet sine morte decus.*

Fama Mortales terrâ sublimes levat, fortunata Doctorum celebrata libellis. Quippe eam tutius Libri conservant, quam vel Pyramides Ægyptiorum, quæ collapsæ, vel saxa Runica, quæ exesa, vel Inscriptiones Romanorum, quæ vastatæ, & ut conservarentur Libris Criticorum debebant inferi, vel columnæ quæ perierunt, vel alia Mausolæa, quæ neque mortis conditione vacant. Habent quidem etiam sua fata libri, teredinibus & stammis infestati: Sed multitudine sua se defendunt ab interitu. In eo quippe desudarunt olim Autores vel Amici, ut pluribus scribarum manibus Codices in ævum victuri scriberentur, quod Orientales, Turcæ, Persæ, alique adhuc imitantur, &, inventâ Typographiâ, Librarii id sedulo curant, ut exemplarium copia & sibi de lucro, & auctoribus de perenni fama prospiciant. Hinc quoque nata ingens sollicitudo meliorum Hercum, ut Bibliothecæ securo a flammis vagis loco locentur, muro undique vallatæ,
&

& librorum singulorum involucra ligno, corio, charta crassiore, aloë aliisque amaris sollicitius confecta, vermes abigant. Romani iccirco privatas bibliothecas in balneis & Thermis collocarunt, non tam ut otiosè corpora curantes illis vacarent, quam ut à flammis tutarentur in Thermis magnifico opere & robusto pariete lapideo exstructis, & aquarum beneficio minus conflagrationi expositis. Publicæ in Porticibus Templorum tutæ credebantur. Ingens autem illa Bibliotheca Alexandrina Voluminum septingenta millium flammam evadere non potuit, quia apud Scrapéum constitit, vicinum portui & navalibus. Cum enim Cæsar in bello Pompejano tuitionis suæ causa ignem in naves misisset, vicina navalibus ipsaque Bibliotheca illo incendio consumpta igne fuere. Prudenter ideo cautum est Oxoniæ, ne in Bibliothecam Bodlejanam lumen aut accensa lampas inferatur. Contra furunculos ferreis catenis fibulisque armati sunt Codices in plerisque Italiæ Bibliothecis, & sic quoque in Veteri nostra Bibliotheca publica servatos meminimus. In nova hac Palladis Officina Claustris suis muniti latent.

Quamquam verò quod in his vitemus, nunquam ulli tantum satis hætenus sit, cum, si recte calculum ponas, ubique libro-
rum

rum sit naufragium, multisque infidiis Martis furentis, Jovis fulminantis, Vulcani comburentis, Neptuni devorantis, Æoli dissipantis & aliorum ex tartaro Dæmonum Potius quam Deorum exponantur Volumina quibus verus Deus continetur, sapientesque seculorum priorum ingenii diligentiaque testimonium referunt: efficere tamen omni conatu nunquam potuere, ut interirent Divina artium scientiarumque instrumenta, quibus vel ad pietatem admonemur, vel ad sapientiam instruimur.

*Nam chartis nec furta nocent nec secula
profunt,
Solaque non norunt hæc monumenta mori.*

Apud Sinas diluvium evaserunt, apud Græcos incendium Trojanum, apud Ebræos arma Nebucadnezaris, apud Romanos barbarorum vastationes. Delituit diu Liber Divinæ Legis ab impiis Regibus neglectus, tandem tamen cum nummis inventus fuit ab Hilikia Regique Josiæ oblatus. In Archivis Darii repertus inter cimelia Liber Annalium, quo ad Templi Hierosolymitani restaurationem Rex excitabatur. Græca Bibliorum Versio in dolio inventa, imperante Caracalla.

calla. Sic ubique Libris suis tuta locula-
 menta, DEUS præparavit, cæterisque hu-
 manæ societati necessariis. Inter tot Hun-
 norum, Vandalorum, Longobardorum, &
 Gothorum furias, Libri *Justiniani* Legum
 Romanarum in Bibliotheca quadam facti tecti
 remanserunt, quos everfa Melfitana civitate
 Apuliæ a Pisanis repertos, Lotharii Impera-
 toris tempore *Irnerius* vel *Wernerus* evulga-
 vit, & Jura Justinianeæ Occidenti postlimi-
 nio cum *Pepone* Bononiense restituit, barba-
 rorum imperio vel silentia vel corrupta.
 Libros *Aristotelis* sub terra conditos à blattis
 & tineis vitiatos Apelliconi Tejo magna pe-
 cunia addictos fuisse prodidit *Arabo*, qui
 erosos lacerosque describi curavit. Homeri
 Iliada atque Ulyssæam in templo ipso Vulca-
 ni Memphi securam delituisse autor est *Eu-
 stathius*. Medicis si invidit fatum Regis Sa-
 lomonis Libros Medicinales & Botanicos,
 plusculosque *Hippocratis* & veterum Medi-
 corum, DEI tamen indulgentia non pauci
 ex Græcis nobis supersunt, extra patriam
 inter Arabes & Saracenos ab interitu vindi-
 cati. In minoribus etiam curam superum
 satis admirari non possumus, quod tot secu-
 lorum vicissitudinibus injurias temporum &
 bellorum evaserint, ut si tutam stationem
 ne-

negarent homines, inferos custodes invenerint. Id quod *Dictum Cretensem* etiam expertum accepimus, qui bello Trojano interfuit, scripsitque, *Suidæ* teste, acta istius belli ab *Homero* prætermissa: deinde post multa secula collapsa per vetustatem, vel terræ motum apud Gnoson, olim Creten-sis regni sedem, sepulchro ejus, a pastori-bus inter cæteras ruinas exloculo in lucem demum Nerone superstite productus fuit, & ex Punica in Græcam, ex hac in Latinam linguam à L. Septimio Romano, si vera fama, translatus. Quod si denique inter mortales terra marique exularent Libri, in cælo tuti forent. Perennabit Liber vitæ Psalmographo laudatus, & in folio Apoca-lyptico sedens librum manibus suis excuti non patietur soli agno concedendum.

Huic Librorum Curatori Optimo Maximo vota solvimus, quod Academia nostræ Bi-bliothecam non tantum à primis Academiae nascentis annis conservavit, sed ingenti aug-mento cum virili ætate crescere voluerit. Ex parvis quippe initiis ad eam magnitudi-nem jam excrevit, ut Augusto isto amplissi-moque Palatio novo contineri vix possit, sed colonias suas ad minus illud Musæum Basilicæ B. Virginis contiguum miserit. Ne-

que interim silentio prætereundi munifici Testatores, qui ad ampliandam Bibliothecam publicam, Libros hæcenus contulerunt, & numero plures & pretio inæstimabiles, posteritatis cura tacti.

Manibus tuis benè precamur *Petre Alberti*, qui prima fundamenta jecisti, non Academia tantum tuo consilio erigendæ, sed Bibliothecæ tuæ liberalitate instruendæ. Prudentia tua magna in civibus regendis, quorum Consul eras, in Academia negotiis, quibus Professor præeras, in Legationibus Regis Tui nomine obeundis emicuit, sed major pietas in Librorum donatione eluxit, sine quibus studia docentium pariter & discipulorum florere non posse, qua eras Juris Civilis & Medicinæ sapientia, credidisti. Parem in promovenda Bibliotheca animum *Francisci Wilhelmi* Canonici & Telonarii circa eadem tempora deprædicamus posteris, laudemque ejus recentem volumus.

Quibus tertius successit, quanquam unius pene seculi intervallo *Andreas Lemvicius* Academiae Medicus, suam Librariam supellectilem, sic satis pro temporum ratione instructam, augendæ publicæ addens.

Sed præcedentium liberalitatem longissimè superavit, de Ecclesia & Academia optimè,
fi

si quis alius , meritis *Casparus Erasmus Brochmand* , Selandiæ Episcopus , qui ter mille nongenta & nonaginta quatuor Volumina Theologica, Juridica , Medica, Philosophica & Philologica Bibliothecæ legavit , quæ latus Palatii nostri Bibliothecarii Boreale totum implent ornantque , & æternam beati Testatoris famam loquuntur , nunquam apud nos morituram. Auxit hoc beneficium alia quoque liberalitate , quam *Cecilia* conjunx , femina gravis , benigna & antiquorum morum , post mariti fata , sua pietate extendit , ampla pecuniæ summa superaddita , ex cujus annuis Usuris Bibliothecarius & sub Bibliothecarius pro Bibliothecæ publicæ cura remunerarentur. Tanta ratione facultates suas , quas DEI munere amplas nactus fuerat , beatus senex Brochmannus , est meritus , ut bonæ mentis candidati & rerum inopia pressi , usu illarum fruerentur.

Neutiquam hic nobis tacendus *Henricus Fuiren* , Medicinæ & rerum Naturalium peritissimus Doctor , cujus tamen sine lacrymis meminisse vix possum. Ferreis columnis appensa in medio Palatii Librarii ambulacro videntur pietatis ejus monumenta , à Fratre *Thoma Fuiren* , publici boni amantissimo ,

B 3

sed

14 *Th. Bartholini Dissert. I.*

sed nuper, quod dolemus, nobis erepto, exaucta, selectorum nempe in Re Medica & Naturali Librorum, singulari judicio & magnis impensis collectorum thesaurus, qui de sincero utriusque publica Musarum & Apollinis studia juvandi animo semper testabuntur, velut trophæa æterno nomini suspensa, ferro perenniora. O candidissimæ Fui-reniorum animæ, quæ inter sidera in cœlo fulgetis, in splendido Musarum isto domicilio perpetua recordatione meritorum apud nos eritis superstites, quotiescunque Librorum vestrorum titulos inspicimus. In famam hominum, Literatorum ore pervenisse se Gordianus Junior gaudebat, nactus Bibliothecam morientis *Sereni Sammonici*, in qua 62. millia Librorum censebantur: *Fuirenii* vero nostri ex propriis libris, numero quidem paucioribus, sed pretio dignioribus, ad cœlum ferri merentur nomine æterno inter Medicos relicto. Laudent alii divitias, quibus immersi serviunt. Sapientiores *Fuirenii* virtutem in divitiis explicuerunt, fortuna, quam acceperant, in publicum emolumentum, inque gloriam patriæ & suam, conversâ.

Ingens & supra quam dici potest immensum beneficium *Johannis Mullenii Georgii*
Fi.

Filii, grati recolimus, qui ingenita generosæ mentis indole, & amore bonarum Literarum, quibus ipse præter cæteras virtutes Reipublicæ utiles excelluit, incredibilia Musis nostris officia præstitit, non tantum Bibliothecæ Theologis, Historicis, Philologis magno numero, ingenti ære instructæ, quæ meridionale Musei publici latus & occidentale universum occupat, accessione luculentissimâ, sed legato pio & provido aliquot mille Thalerorum, cujus redditus partim libris novis emendis, partim sub Bibliothecarii salario amplificando impendendos, voluit & testamento jussit. Non ponimus Tibi, Muleni beate, statuam, quam viventis modestia repudiaret, sed monumentum chartaceum erigimus, quod non imber edax, non Aquilo impotens possit diruere, nec innumerabilis annorum series, nec Jugu Temporum.

Denique *Petri Gelstrupii* Professoris Philosophi donarium, quo vacantes locuti & vacuæ deficientes supplerentur, illaudatum, nec alios magnos parvosque oblivione sepeliri sinemus, qui ad Palladis hoc Museum ornandum libros contulerunt, quorum nomina, ne beneficii periret memoria, in albo, quod servamus, æternitati consecravimus.

Sed

Sed dum cæterorum inhæreo laudibus , oculos meos perstringit mentemque & calamum ad se revocat gloriosissimæ inter omnes recordationis Rex Divus *Christianus quartus*, Pater Patriæ , & dum fata sinebant , optimus innocentissimarum Musarum stator. Fastos rerum Tuarum magnitudine illi impleant, quorum cothurni sufficiunt. Ego , Rex Magne , siquidem aliquis cineribus Tuis beatis sensus supersit, tanto

Si vacat exiguis rebus adesse Jovi,

Tuam umbram adoro, in vicino pariete per rarissimos Codices diffusam , quos maximo in Academiam tuam favoris argumento , ut Musas foveres & illustriores in Borea redderes, à nobis possideri clementissime voluisti. Et ut commodius augustiusque habitarent , illustre illud Palatium Librarium Regali Pyramidum structura splendidius , tuis auspiciis, velut Cæsaris Bibliotheca , inceptum, per Filium , Successorem Regnorum & Heroicarum virtutum Divum *Fridericum Tertium* Augustum consecrari cum stupore vidimus. Scilicet talem Musæ nostræ locum requirebant, qui sanctissimo Trinitatis Templo innixus , undique DEI tutela munitus,

supra

supra se cœlum, infra vero calentes DEI
veneratione aras respiceret, & inter DEI
sedem piorumque supplicationes versaretur.
Veterum Bibliothecæ, Ægypti, Græcorum,
Romanorum publicæ in Templis Deorum
vel illorum vicinia exstructæ fuerunt. Sed
immortalis DEI sacro loco incumbens Bi-
bliotheca nostra, ab interitu erit tutior. Hæc
igitur in Bibliothecam Academicam pietati
sapientiæque dicatam cura Regia & sollici-
tudo Paterna plenis honorum muneribus,
Tuas, *Auguste*, virtutes & publicos favores
in ævum per titulos, si pares meritis Tuis
inveniantur, memoresque fastos æternabit.

Tot tantisque Autoribus nata Bibliotheca
Academica & adulta, tantis auspiciis inau-
gurata, & ad invidiam usque ornata, usui
publico omnibus panditur, & bona Tua pul-
cherrima vult esse communia.

Operam quippe & Oleum perdidissent
beatissimæ animæ, quarum benevolo studio
crevit & ad eam, quam admiramur, magni-
ficentiam erecta est, nisi cultores suos in-
venire & publicos prostantium bonorum hel-
luones. Non canes ad Nilum requirunt,
non Tantalum mediis in undis sitientem
admittunt, sed omnes sapientiæ avidos, si
cum voluptate frui velint, pleno alveo satia-
bunt.

bunt. Hoc instituto Museum Alexandriae, diuturnum illud præstantium hominum domicilium, Hadrianus Imperator nonnunquam ingrediebatur, ut quæstiones multas Professoribus proponeret, aut propositas dissolveret. Hoc animo idem museum, sed altero addito Claudius Cæsar amplificavit, ut Græcæ illius historiæ ibi quotannis velut in auditorio recitarentur. Quod si vel ille vel iste nos invisere dignabitur, neutiquam vel in respondendo vel recitando nostram promptitudinem desiderabit. Omnibus officia nostra prostabunt, velut in publico mercatu, singulorum gustui accommodata.

Ut autem cum fructu sperato bonis oblatis sine ἀπεψία lautissimarum epularum perfruamur, ne nos tantis majorum largitionibus censeamur indigni, ne Autores pœniteat beneficiorum, pereatque optimi instituti fructus laudabilis, ne amplissima hac hæreditate abutamur, magno famæ nostræ & conscientiæ damno, ne immortales denique animæ, quæ hic loquuntur, nostra culpa obtumescere, & sibi non nobis loqui videantur, mearum duxi partium paucis Dissertationibus modum tradere in legendis cum fructu Libris occurate servandum, cujus deinde ductu velut filo ariadnæo per singulos
li-

Libros se quisque diffundat, propriosque sibi reddat, quos voto suo aptos judicaverit. Ferre non debui Andabatarum more hospites hujus loci Augusti in tenebris cespitare, & Librorum tantum titulos novisse, corticique externo inhærere, nucleo neglecto. Debeo hanc operam Majorum indulgentiæ, qui mihi curam Bibliothecæ concrediderunt, debeo studiosorum commodis, quibus me meaque studia hætenus nuncupavi. Et quanquam hæc rectius a magnis Viris qui in Officio isto Librario præcesserunt, *Thoma Bangio & Christiano Ostenfeld*, in omni Re Literaria versatissimis, didicisse è re communi fuisset; attamen cum ille in adornanda Bibliotheca occupatur, hic a valetudine justissimam excusationem meruerit, ne ego ulterius publica juventutis commoda remorarer, etiam non paucas inter occupationes alias, malui in gratiam meliorum ingeniorum balbutire, quam diutius damno omnium tacere. Video enim fato quodam ad has docendi partes me vocatum. Jactura privati meæ Bibliothecæ ad hanc publicam stravit viam. Namque ut solarentur Academici Patres infortunium nostrum à Vulcano, claudio alias furcifero, sed in exitio fortunarum mearum velocissimo procuratum, superioribus annuen-

tibus, me publicæ Bibliothecæ præficere decreverunt, pronâ in immerentem voluntate benignè testati, quanquam digniori *Varroni*, *Cæsaris* exemplo, tantum thesaurum & ex publica utilitate rectius concedidissent, sibi & fortunam meam & famam cordi esse, scilicet

*Notior est factus Capaneus fulminis ictu,
Notus humo mersis Amphiaræus equis.*

Si minus errasset notus minus esset Ulysses:

Magna Philoctetæ vulnere fama suo est.

*Si locus est aliquis magna inter nomina parvis,
Nos quoque conspicuos nostra ruina facit.*

Gloriam meam non minus hinc auctam existimavi, quam si sacerdos à Regibus olim mox *Cæsaribus* Museo Alexandrino præficerer. Non equidem sacerdos Ægyptius sum, sed *DEI* veri servus, sed, si profanum nomen non averfamur, *Apollinis* sacerdos, &, si is nemo nullus mihi invidet qui felicius in *Parnasso* somniat, *Panocratis* Poëtæ, sed sine adulatione, æmulus, cui in Museo Alexandrino *Hadrianus* Imperator locum & vicum concessit. Nec Medicos Roma indignos judicavit, quibus Bibliothecarum curæ committerentur, sicut ex veteri Inscriptione

patet Romæ infra Capitolium in quadam
Domo:

DIS.

MANIBUS

CLAUDIÆ - - - EUTYCHIÆ

CONJUGI. SANCTISSIMÆ.

BENE. MERENTI. ET. Q.

DOMITIO. HELICI. TI. CLAUDIUS.

AUG. L. HYMENÆUS. MEDICUS.

A. BIBLIOTHECIS. ET. DOMITIA.

PANNYCHIS. SIBI. ET. SUIS.

POSTERISQUE. EORUM.

Igitur ne judicia Patrum Conscriptorum,
quæ benigna expertus sum, conceptamque
de mea fide & industria spem fallerem, ne
in otiosum collata beneficia sint, spartam
concreditam pro virili ornare constitui, tri-
pliciue jam munere defungi, ut gratia Pa-
tribus & Mecænatibus cederet, utilitas ad
omnes derivaretur, mihi operæ fideliter na-
vatæ conscientia relicta. Agite bonæ men-
tis & Musarum Candidati, thesauro avide
inhiate, quem provida Majorum gratia nobis
communem voluit. Utimini eo, sed cum
delectu, sed ad satietatem. Æstimate calli-

de Majorum studia , & , mecum , more sapientum , propria verecunde. Ad Librorum cognitionem usumque optatum eo candore vos perducam , ut aliorum tamen messis intacta relinquatur , *Platonis* eruditissimi modestiam imitatus , qui conductores sacrae artis de modo & forma ejus secum sermonem conferre conatos , ad *Euclidem* Geometram ire jussit , scientiae ejus cedens , imo professioni. In cæteris , quicquid humeri valebunt , labori submittam , ut *Varronis* exemplo , in eodem lectulo & spiritus meus , & operum beneque de omnibus merendi cursus extinguatur.



TH. BARTHOLINI

DISSERTATIO II.

DE

LEGENDIS LIBRIS.

*De ipsis Librorum Autoribus. Supposititii nonnulli. Mali fugiendi. Anonymi cur prodeant. Ficti fucatique metu vel modestia. Plagiarii. Ex his excusati Severinus, Kra-
gius nostri; alique: Autorum Patria & Ætas. Librorum cum seculis immutata scriptio. Per Theologos, Jctos & Medicos decurritur. Genius singularum nationum & Autorum. Ætatum discrimen. Status varius. Autorum Vitæ à se vel aliis conscriptæ. Legenda Patrum. Effigies scriptorum in Libris vel Bibliothecis.*

S At hætenus verborum. Rem aggrediamur, quid in Libris legendis observandum necessario sit exposituri, ed, quam fieri potest, brevissimè, cum
re-

rerum dicendarum copia nos in arctum co-
 gat. In Libris legendis quædam externa nos
 remorantur, interna alia mentem calamum-
 que ad se trahunt. Externa circa Autores
 versantur, editiones Librorum & involucra.
 Interna nos occupant in argumento, seu ar-
 gumenti Libris comprehensi materia & for-
 ma, in judicio de iisdem ferendo & modo
 legendi. Singula strictim percurrenda, ut
 ad metam propositam deveniamus.

De Auctoribus Librorum sollicitos nos
 esse convenit, non tantum ut debita pro
 exæplato in Reipublicæ Literariæ commo-
 dum labore laus rependatur; sed quia ex
 auctore sæpe de operum dignitate judicamus.
 Nihil certe æquius quam meritam laboribus
 cuique mercedem solvere. At siquidem rari
 Mecænates sunt, qui aliquid esse putant:
 Doctorum Virorum lucubrationes, aut præ-
 miis remunerant, sola laus à posteritate re-
 manet, ut postera gloria recentes crescant.
 Hoc præmio animati ad majora accendun-
 tur, hoc applausu contenti, nominis im-
 mortalitati acquiescunt. Hoc solatio eri-
 guntur torpentes calami, & salutari sepiã
 implentur: Quanquam desint majorum præ-
 mia, non defutura posterorum encomia:
 nec omnes morituros cum seculo ingrato,
 sed

sed multam partem sui vitaturam Libitinam.
Non nocent erectis ingeniis silentia Mecæ-
natum, nec invidiæ malevolorum, cum ple-
no ore à meliori posteritate narrentur.

Famaque post cineres major venit.

De paupertate triumphant, quia virtute
& rerum bene gestarum laude instructi,
possessione æterni præmii ditescunt. Nomi-
na clara omnes venerantur, quibus honesti
amorem pectora incaluerunt; hæc Librorum li-
mini præfixa omnes titulos superantia Ope-
rum suorum commendationem præferunt,
& ad sui lectionem, velut Orpheus fæxa,
alliciunt. Dici non potest quantum laudis
Operi ex Autore accedat, cum ex cerebro
Jovis Minervam nasci sit necesse. Hinc ve-
terum non pauci ut scriptis suis fidem &
auctoritatem mutuarentur, magnorum Vi-
rorum nomina emendicata præfigere fatege-
runt. Unde tot supposititii Libri ad nostram
ætatem transmissi, *Hippocratis, Aristotelis,*
*Galen*i nominibus superbientes, digni qui-
dem lectu, sed tantis auctoribus indigni,
pondere rerum & verborum. Inter sacros
Auctores non pauci quoque irrepsērunt pur-
pura aliena vestiti, quorum fides suspecta
D cre-

creditur , & si nomen , quod mentitum , excipias , nihil sani coloris habentes. Quo referuntur *Manethon* , *Berosus* , *Chaldæus* , *Barnabas* , Epistolæ *Senecæ* ad S. Paulum , & *Abgari* ad Christum , *Protevangelium Jacobi* , *Prochorus* , *Linus*. Inter Patres primos posterioresque inveniuntur , quibus dica hæc falsorum titulorum scribitur. Quamquam & hic iudicium nonnunquam sit suspendendum , cum diversa ætatis ratio ejusdem auctoris & mentem & dictionem sæpe immutet. Ex Auctorum notitia id præterea commodi haurimus ; ut de doctrina vel damanda vel recipienda censeamus , & libros pravos fugiamus : mali corvi mala ova , quæ hæretica perversitate infecta , legentium , præsertim juniorum , sensus à vero deflectunt. Ita sibi libenter D E O deditæ mentes cavent à Libris qui *Pomponatii* aliorumque atheorum nomina præferunt , quique ex *Socini* Schola de D E O male sentiendi libertatem concedunt. Tituli remedia salutis promittunt , sed pyxides venena condunt ; sic ut conqueritur *Lactantius* de illo , qui cum veritatem Christianam penitus excidere connixus esset , ausus tamen fuit libros suos nefarios ac D E I hostes *Φιλαλητῆς* annotare. Fugienda hæc nomina scriptorum , non male
inter

inter Libros prohibitos recensita : licet & hic peccetur nimia severitate , cum cujus-
cunque Auctoris diversum aliquando sentien-
tis Opera nigro obelisco signentur , in qui-
bus nihil facile invenias , quod pium Lectorem
offendat. Quandoque olitor est opportuna
loquutus. Et in re bona non pudet nos ma-
li Auctoris , *Seneca* judice , optimo morum
magistro. Non tam in Libris consideran-
dum quis scribat , sed quid scribatur. Ut
plurimum tamen Auctori suo scripta consen-
tiunt , quem idcirco novisse expedit. Fuere
inter antiquos , & tales hodieque in Nundi-
nis Librariis incogniti reperiuntur , qui sive
modestia , sive astu & dedita prudentia , ne
innotescant , sive quod infra dignitatem pu-
tent , nomina sua reticeant , & sine Aucto-
re in vulgus scripta disseminent. Veteres
plerosque hæc modestia commendat , qui
Volumina sua Anonyma esse voluerunt , un-
de inter Criticos ortæ disputationes , de
Auctore vero litigantes. Vix ulli Veterum
suorum Commentariorum quiquam præno-
tabant , sed nomina ab Amicis vel Librariis
adjecta. Ita Acta Apostolica *Lucam* Evan-
gelistam non præferunt , quo Auctore scripta
esse ad Theophilum non dubitatur , & Episto-
la ad Hebræos sanctum *Paulum* , ejus sine

dubio auctorem, consulto, ut videtur, omisit. Modestiam hanc alii pudore imitantur, rebus obscœnis, ut Priapeja, vel fabulis vicinis diffidentes. Nonnulli convitiis referas chartas infamant, nominique suo parcunt, ne pœnas infamiæ incurrant. Satyrici non pauci ita impunè in mores vitamque aliorum grassantur. Alii prudentiores sub hac larva latitantes, vel vitia Principum vel rerum publicarum arcana vel alia propalant, quæ sine famæ vitæque detrimento eliminare esset nefas. Isti vero quocunque indicio proditi malè mulctantur. Ita Il Divortio Celeste, Il Curiero squalifato *Pallavicinum* auctorem dissimulatum prodidit, ferro expiantem penæ licentiam. Sic *Tullio* narrante Stalenus ea locutus fertur bonis Viris subauscultantibus pariete interposito, quibus patefactis, in iudiciumque prolatis, rei capitalis jure damnatus est. *Naso* exul librum suum, metu Cæsaris offensi, sine titulo in urbem misit. Ita enim ille ad Librum:

Ut titulo careas, ipso noscere colore:

Dissimulare velis, te liquet esse meum.

Eruditi quidam experiundi gratia, aliorumque judicia & censuras eliciendi, sine nomine

Opu-

Opuscula sua prodire patiuntur, Apellem imitati, qui post tabellam latens etiam futoris de crepida & anfulis monitum excepit. Hoc animo *Thomas Brouwne* Religionem Medici religiose divulgavit. Hac mente magnus Philosophus *Renatus des Cartes*, Methodum discendi artes Mathematicas sine titulo Leidæ lingua Gallica in lucem emisit, quam deinde pro suo fœtu agnovit auctore tanto dignissimam. *Gassendus* quoque de Chyli motu eruditus sine nomine proposuit Dissertationem paradoxam, nec à Medicis receptam, quam tamen inter opera sua postea legi non erubuit Vir candidus. Titulos alii quidem Libris suis inscriptos amant, sed fictos, ne vulgo noscantur. Nostro seculo hæc nominum vel inversio vel mutatio magis usitata quam apud antiquos, qui vel nomina sua in fronte Librorum profitebantur apertè, quanquam rarissimè, vel prorsus omiserunt, Nostris temporibus hunc fucum vel timor expressit, vel modestia. Concilii Tridentini Examen, seu Historiam, Pater *Paulus Sarpa Venetus* edidit, sed nomine Petri Suavis Polani, transpositis literarum notis. Celebris ille Criticus *Casparus Scioppius*, Comes de Claravalle, amicus noster Patavii, se mutatis literis *Paschasium Grosippum*, vel ficto

30 *Th. Bartholini Dissert. II.*

nomine *Alphonsum* de Vargaz (qui olim Archiepiscopus Hispalensis) prodidit , cum contra Patres Societatis Jesu pennam instrueret. *Petrus Servius* , Medicus Romanus , cum illi controversia esset de sero Lactis cum *Stephano Roderico Castrense* , Persium Trevium , confusis characteribus se appellavit. Amicus nolter *P. Angelicus Aprozio Vintimiglia* , Ordinis Augustiniani Monachus eruditus , Venetiis famæ fuga vel invidiæ , varia Opusculis suis Italica lingua nitide conscriptis nomina præfigere maluit , imprimis Sapricii , quam proprium. Polyhistor *Salmasius* Alexium de Messalia se nuncupavit , cum de Mutuo , an sit alienatio , contra *Cyprianum Regneri* Juris Consultum , quem Coprianum vocavit , disputaret. Wallonis Messalini nomen elegit , contra *Petavium* de Episcopis differens. simplicii Verini , Justi Pacii nomina præfixit Epistolis suis de Transsubstantiatione , adversus *Grotium*. Majores gentium Dii fictis nominibus se quoque posteritati commendarunt. *Augustus* Brunsvicensium & Luneburgensium Dux literatissimus , Gustavum Selenum se appellavit in lusu schaccio , & Libris Cryptographiæ. Et ne foris exempla petam , cum domi se offerant , Nobilissimi in Patria Viri *Oligerus Rosacranzius* , divina scien-

scientia incomparabilis Heros, Filiique ejus Illustres *Gundæus*, *Georgius* & *Ericus Rosæcranzii*, flores Nobilitatis Danicæ, variis Opusculis sacris, sed tectis nominibus, optimè de publico meriti sunt. Vir ad stuporem usque doctus *Jo. Wandalinus*, Episcopus Selandiæ magnæ famæ, Nubem sine Aqua scripsit, mutuato discipuli nomine, & Clarissimus noster *Borrichius* in *Deusingio* Heautontimorumenos, ut *Deusingii* mordacitatem evitaret, *Blottesandæi* nomen exprefit eruditissimis illis Epistolis, quas fictis titulis exaravit. Ut de *Annulone Orosio*, nostroque *Beringio*, heu quanto Viro, nihil dicam, qui ænigmatico titulo Regis sui Majestatem & jura, rerum & verborum ingenti pondere, tutatus non ita pridem est. Facile tamen, quorumcunque fucō oblinentur veri Auctorum tituli, ex ungue Leones in specubus suis latitantes dignoscuntur, & suo se indicio produnt, sive dictione, sive argumenti, quod tractant, robore, & modo docendi. Mos nomina fingendi nusquam frequentior quam apud Academicos, ut vocant, Italos, Gallos, Germanos, linguæ vernaculæ studio variis Libris, Satyris & Milesiis scriptis orbi inclarescentes Prævit *Euphormio Lusini* in Satyrico, hoc est *Joan-*

nes Barclajus, qui ficto nomine, florentissimo stylo & genio terrarum scelus, ut ipse loquitur, acerbé ultus est. Mitius de illis judicandum, qui nomina aliena vel ficta libris suis adoptarunt, quam qui alienis Operibus sua nomina obtruserunt. Temeritatis hi maculam incurrunt & plagii, illis modestiæ laus debetur. His aliena vitula, illis propria, campus aratur. Hi famam & honores malo astu, illi labores & opera referunt. Illi versiculos faciunt, hi præmio gaudent & meritam illis lauream suffurantur. Vel enim universa Volumina alieno labore parta in se transcribunt, vel flosculos ex vicinorum pratis suo horto inserunt, alienis se plumis ornantes, cum propriis, paupere penu careant. De tuo largire puer, ut de proprio liberalis dicaris. De his similibusque quidam Veterum præclarè dixit: magis esse impium suffurari scripta mortuorum, quam eorum vestimenta, quod vocant sepulcra, effodere. Virorum lucubrationes pro suis venditare, majus me iudice piaculum. At ingenui scriptoris est, palam cum laude & gratiarum actione profiteri, per quos profecerit, ut suum cuique tribuatur. Non dubito tamen multis, qui pro plagariis traduntur, injuriam fieri manifestam. Inno-

centes absolvendi & excusandi, præsertim cum sæpe simili genio multi animentur, in eodem argumento occupati. Hos manes passi sunt nullo merito quamplures, quorum catalogum non texam. *Homerum* antiquissimum Naucrates quidam plagii accusavit, ex repertis Libris in Ægypto à Phantasia fœmina scriptis. *Richardus Montacutius* asserit *Iustum Lipsium* omnia sua per plagium transcripsisse ex *Onuphrio* nunquam eo compellato. *Petrum Galatinum*, omnia sua, suppresso tamen nomine, desumpsisse ex Libro *Raymundi Medici*, qui ante 400 vixit annos, magna confidentia affirmat *Scaliger* & *Scioppius*. *Wowerii* Polymathia *Josepho Scaligero* tribuitur, *Zamosci* de Magistratibus Romanorum *Sigonio*, *Rondeletii* Liber de piscibus *Peletario*, *Petri Severini* Idea Medicinæ Paracelsicæ *Pratensi* Collegæ assignatur. Pro reliquis intercedant alii. Ego de *Severini* nostri innocentia securus *Hartmanni* præceps de eo iudicium admiror, qui *Pratensi*, Academiæ nostræ olim Professori Medico, cujus ad *Severinum* carmen Votivum in fine legitur, operis laudem concedit. Absolvunt virum de Re Medica bene meritum manu ipsius scriptæ chartæ & maculatæ, quæ in patria servantur, ejusque

E

de

defensionem *Ambrosius Rhodius* editis Commentariis suscepit, qui *Severini* neptem uxorem duxit. At *Nicolaum Kragium* nostrum auctorem doctissimum Librorum de Republica Lacedæmoniorum, cujus fratrem *Andream* male in Cista Medica *Hornungus*, & ab eo deceptus *Lindanus* in Catalogo Medicorum Crugium appellat, à Calumniis eorum qui *Cujacio* scriptum tribuunt, vindicavit *Henricus Ernsfius* Juris scientia & literis inclytus, ut hac opera supersedere possim. Reverendi *Tomasini* manes lædunt, qui operum Variorum famam cum *Rhodio* nostro partiuntur. Limam subinde illis à *Rhodio* adhibitam non ignoramus, & si forsan loca Auctorum desiderarentur pro amicitia, quæ utrique intercessit maxima, sicut inter doctos fieri solet, communicata, utriusque amicus testari bona fide debeo. Nec aliud hujus modestia & sueta longo scribendi usu penna suadet. *Tobie Aldini* Botanici Pontificii Hortus Farnesianus, qui *Petri Castelli* opera concinnatus fertur (nec etiam id ipse *Castellus*, quem *Messanæ* in Sicilia conveni, diffitebatur, tacitèque in Præfatione operis indicavit) autorem cujus nomen gerit, facile prodit, in re herbaria versatissimum, licet ad formam conciliandam & illustrandum

textum opera amici *Castelli* usus sit. Iniqui quippe sunt Censores, qui Auctoribus benè meritis & in argumento quod susceperunt peritis, ideo debitam laudem invident, quia vel in digerendo vel emendando vel nitori restituendo subsidium imploratur amicorum, quibus vel plus otii, vel latina verba promptius fluunt. Actum sane esset de *Casseri* operibus Anatomicis, aliisque quibus recensendis in præsentisupersedeo. Tantum igitur in Auctoribus noscendis momenti positum, ut ex illorum vel pietate vel eruditione vel parta fama libris increseat autoritas. In illorum porro vitam, ætatem & vivendi genus inquirendum non minori sollicitudine, ut expeditius in legendis eorum laboribus versemur. Vita inter virtutes omnes & experimenta artis, quam quisque profitetur, acta, fidem apud nos operum præclarorum conciliat. Patria seu natale solum ingenii fecunditatem prodet, si vel externo Phœbi calore incalescant, vel interno pectoris etiam inter frigidos Getas algentemque perpetua nive Boream calore excitati vim mentis exferant. Nulli quippe nationi noverca natura est, si ingenium diligentia acuatur, si latitantes igniculi bonarum rerum assidua ventilatione suscitentur. Cœlum undique su-

pra, & ignavia sola nos opprimit ne sidera sublimi vertice feriamus. Quanquam non segnem operam sectionibus Anatomicis hominum brutorumque olim impenderim, Profectoresque per Europam maximi nominis viderim, hætenus tamen nec lynceis oculis insignem differentiam in cerebro, corde, epate, cæterisque visceribus observare potui, nec observare aliis licuit, quæ Arabes, Græcos, Hispanos, Italos, Gallosque à Germanis, Anglis, Danis, Suecis, Norwegis, Islandis & qui in ultima Thule habitant, si partium conformationem consideres, separent, ut ab eruditione & rerum bonarum vel inventionem vel exercitationem, seu hi seu illi seu isti excludantur. Sed ex cujusque nationis temperie diversa varii animorum motus repetendi, & diversa studia accersenda, quibus populi discernuntur. Cæterum patet cunctis gloriæ campus, per quem decurrant. Et apertæ *Petri Apostoli* Confessioni credimus, Deum non respicere personas, sed in quavis gente acceptum ei esse quemvis, qui eum timet & operam dat justitiæ. Hinc Auctorum ætas prospicienda, sive seculi, in quo vixere, sive annorum, quos exegere, ratione habita. Secula de moribus & rerum tractandarum capacitate testantur, cum, ut eleganter more suo

quo *Barclajus* disserit, omnia secula genium suum habeant, qui in certa studia animos mortalium solet inflectere. Sub Augusto, pacis seculo, ad fastigium latina venustas provecta, produxit Poëtas felicissime numeris ludentes, Rhetores & aureæ ætatis Auctores, quorum deinde nitor & vigor labente post Neronem imperio Romano sensim expiravit, donec tandem irruentibus barbaris in barbariem Roma laberetur. Successis mox seculorum infelicitate Philosophia disputationibus miserè involuta, & Justitiæ cura inconditis voluminibus ad tædiosos discentium labores aucta. Tandem sub *Carolo Magno*, spiritum receperunt scientiæ diu cum barbarie sua luctatæ, & avorum nostrorum memoria literæ in Europa renascebantur, nunc sanæ Philosophiæ ardore increscente juxta *Aristotelis* ejusque Interpretum mentem, nunc Auctorum, Græcorum Latinorumque emendatione à Philologis Criticisque acerrimo ingenio procurata, Quorum omnium jam fatalem terminum adesse cerminus, plerisque vel experimentis Naturæ & Artis, Peripatetica subtilitate relegata, superiorum credulitatem castigantibus, vel vernaculæ linguæ decus, excussa meliore literatura, restituentibus. Ad sacrorum in Ecclesia Christiana Docto-

E 3 rum

rum fata si proprius oculos reflectamus , secundum seculorum mutationes genium quoque mutabilem & scribendi genus mutatum deprehendemus. Purissimam Evangelii doctrinam in incunabulis suis nobis tradiderunt *Evangelistæ* , *Apostoli* & qui proxime Apostolorum tempora sequuti sunt *Patres* Ecclesiæ primitivæ. Ætatibus sequentibus primo *Origenis* errore , Evangelium ad Philosophiam inflectentis , moxque *Pelagii* cœno inquinata tempora *Augustino* ingens negotium facefferunt , sicut ex scriptis ejus manifestum. Crescentibus deinde Ecclesiasticorum imperiis & opibus , Dominicanorum & Franciscanorum modesta vita & innocens emerisit ad Theologica studia mortales revocans , quæ transformare deinceps cœpit , duce *Alberto Magno* aliisque Scholasticis , Ecclesiæ doctrinam in Philosophiam. Unde *Thomæ* & *Scoti* invaluit contentio , quam nupera secula turbarunt , quibus reformandæ Ecclesiæ zelo intenti Doctores Germaniæ , in varias Sectas divisi amplam & dissensionum & Librorum Theologicorum messem , hodieque sine fine perennantem , reliquerunt. Æstimare ex hac seculorum serie pronum est , quibus rebus vel hic vel ille Ecclesiæ Doctor scripta sua condit.

liat. In brevi compendio ingentia aliorum Voluminum contenta refero. Nec enim nostri est instituti accuratius, quam ad rem nostram, hæc exponere. In jure Romano quid secula immutarint, ex Antiquitate Romana liquet. Regio statu durante leges Regiæ latæ, à Papirio in Librum relatæ. Exactis Regibus & in Reipublicæ formam mutata Roma, abrogatæ illæ, & ex Græciæ Rebuspublicis per Decemviros allatæ X. *Tabulæ* ex propriis Legibus Romanorum ad XII. auctæ. His addiderunt Senatus Consulta, Plebiscita & Magistratum Romanorum Edicta, quæ annua plerumque prout ipsi Magistratus annui, licet deinde lege Cornelia perpetua fuerint, & jussu Hadriani Imperatoris à *Juliano* Jurisconsulto in ordinem digesta, ut Edicti perpetui privilegio gauderent. Imperatoria dignitate succrescente, successerunt variæ Jurisconsultorum Sectæ, sicut fieri solet, Legum mutatio vel de sensu legum altercatio in mutationibus Regiminum, *Labeone* ex ingenio multa innovante, *Capitone* vero antiquarum Legum vestigiis presse insistente.

Ex horum discipulis & Sectatoribus tanta Juris commentaria emerferunt, ut numerus librorum ad duo millia & versuum trecenties

ties decem millia excreverit , quæ *Justinianus* Imperator ope *Triboniani* aliorumque Juris Consultorum contraxit & in ordinem redegit , in Digestis & Codice duplici , & pro status sui varia conditione , negotiisque variis in Imperatoria dignitate emergentibus , Novellas Constitutiones addidit. Labente post Justinianum Imperio , neglecti Juris libros novis Voluminibus refarcivit *Leo* Philosophus , sed omnium oblivionem inducere Longobardi & Gothi , qui suis juribus pro ratione temporum vivebant , donec illis expulsi , Lotharius per *Irnerium* leges Romanas revocaret , additis Authenticis. Cum post Phocam Pontificum Romanorum autoritas publico Imperatorum Juri nonnihil detrahere cœpisset , Constitutiones & Decreta nova Ecclesiastica condita sunt , quæ *Gratianus* Monachus in unum Volumen collegit , & Juris Canonici nomine confirmarunt Pontifices. Hoc adhuc apud suos valet , sed ab illis rejectum , qui his secutis postremis novas pro cujusvis confessione Constitutiones Ecclesiasticas sanciverunt. At Jus Civile Justinianicum hodie quoque in Imperio Romano Germanico vim legis obtinet , & apud alias Europæ gentes olim Romano Imperio subjectas servatur , nisi quod de meliore metho-

methodo cogitent Jurisconsulti quidam recentiores *Wesenbecius*, *Vultejus* aliique interpretes doctissimi. Nostris vero moribus *Waldemarus II.* Rex Daniæ Jus Cimbricum condidit, & successores in imperio Danico pro temporum ratione Recessus addiderunt, quæ mutata jam per Divum *Fridericum III.* regiminis forma, novus Codex Juris Danici vel emendabit vel illustrabit. Ad Medicos propero, quorum secula novisse convenit, ut de Autoribus rectius sententiam feramus. Parcior tamen in his ero, ne medicinæ scientia, quam profiteor, aliis videatur fraudi esse aut quicquam detrahere. *Hippocrates* Artis nostræ princeps conditor, in infantia medicinæ vixit ævo Artaxerxis, & cum pleraque ex *Æsculapii* templo præcepta collegisset, propriasque in *Coo* Insula observationes addidisset, pro rerum temporumque cruditate scripta sua nervoso brevique dicendi genere confecit. Medicinam rationalem, quam ex Empirica *Hippocrates* acceperat, sine æmulo non sine imitatore, à Græcis ad Romanos transtulit, qui tot seculis sine medicis, non sine medicina vixerant, post fata ejus *Cornelius Celsus* ex fontibus suis, h. e. *Hippocraticis* derivans & ad robur virile deducens, quanquam interea Empirici exper-

F

mentis

42 *Th. Bartholini Dissert. II.*

mentis faciundis cum *Scribonio Marcello* & *Sexto* occupati fuerint, nec non Methodici sua dogmata adstricta & laxa disseminarint. *Galenus* deinde post annos sexcentos, Romæ ab Hippocrate nonnihil desciscens Dogmaticam rem strenue egit, & Asiatica loquacitate, quia docere & *Thessalum* aliosque Sectarios debellare debebat, gravitatem *Hippocratis* vel Sententiarum brevitatem compensavit. Quem *Trallianus*, *Ægineta*, *Aetius*, *Oribasius*, *Actuarius*, alii secuti sunt. Horum doctrina ad Arabum tempora ubique floruit ad seculum Christi novum, ad quos, Saracenorum tyrannide licet infesta, medicina transiit, *Avicenna*, *Averrhoës*, *Mesua*, aliorumque amplis Compositionibus & Syrupis, pro delicati seculi gustu, ditata. Horum placita ad seculum tertium decimum in Scholis Europæ & Gymnasiis viguerunt, Librique in Cathedris lecti, tot Interpretum Commentis, barbaris & nauseam excitantibus repleti, donec superiori seculo naturam ipsam sollicitare Medici cœperint, partim Chemiæ studio per *Paracelsum*, partim Anatomes, duce *Carpo* & *Vesalio* quod sensim etiam nostra ætate beneficio Naturæ benignæ & Medicorum contentione ad illum perfectionis gradum vidimus provectum, ut ipsa

ipsa Natura invidere possit tot quotidie experimentis sollicitata, tot observationibus omnium oculis exposita. Hisce singulorum seculorum fati, quibus auctores vixisse constat, si spiritus ille impetusque addatur, qui singulis regionibus proprius, nascentibus hominibus ingeneratur, & ad varium studiorum genus impellit, de Auctoribus judicandi promptior via aperietur. Illum autem mores animosque mutantem ex temperamento nationum singularum æstimamus, ex quibuscunque denique principiis repetendo, in quibus eruendis præclare occupatur *Huartus* Hispanus, ejusque censor *Possevinus*. Hinc in historiis satyrisque conscribendis nonnulli felicius versantur. Alii artes mechanicas bellandique gloriam præferunt. Mathematica hi sectantur genii quadam inclinatione, illi sacra, medicinam isti, plures amœniora studia, alii per experimenta naturam venantur, alii ratione, singulæ nationes suo modo Palladi procantur. Cujusque Auctoris genium, si in universum consideremus, seculum & patria prodit. Et, ne hic subsistamus, ætatis quoque ratio tenenda in singulis. Alia enim juvenilia sunt studia, senectutis alia, illa ingenii plus, hæc prudentiæ habent. Ex posterioribus se æstimari vo-

F 2

lunt

lunt Auctores , cum non raro impetum juvenilium scriptorum matura senectus sistat. Unde nati retractationum Libri , post Curæ , & δευτέρου Φροντίδες σφωτέρου. Temeritas quippe , ut *Tullius* censet est florentis ætatis , prudentia senectutis. Injuriam tamen juventuti detrahunt famam , ingenio meritam , qui cum *Nævio* Poëta inclamant. *Proveniebant Oratores novi, stulti, adolescentuli.* Omnes ad Rempublicam literariam operas partiuntur , sicut in navi malos alii scandunt , alii per foros cursant , alii sentinam exhaustiunt , alii anchoris præsumt , ad clavum alii sedent. Non faciunt ea senes quæ juvenes , sed juvenum labores vel suppleant ætate vel judicio moderantur , fundamentis adolescentiæ constituti. Non damnanda Auctorum juniorum monumenta , sed laudanda ; neque enim histrioni , ut placeat , peragenda est fabula , modo in quocunque fuerit actu probetur. Nec omnia senectutis vitia amplectimur. Memoria enim imminuta cespitare nonnunquam & dormire bonos Homeros cogit. Cui tamen senectutis morbo remedium inventum scimus. Resistendum senectuti mente vegeta , ut diligentia defectus tacite obrepens compensetur , sic ad extremum spiritum posteritatis nos cura conficiet.

Dubitandum non est , si Medicus cum *Abenzoare* centesimum & tricesimum annum attingat , & a 25. ætatis anno medicinam exerceat , quin rerum usu & judicandi dexteritate præferendus sit præcoci Medicorum juniorum audaciæ , qui cruda sua studia in Nosocomia protrudunt , nocteque una nascuntur Doctores , ut fungi. In vitæ instituto occurrunt non pauca , quæ faciunt ad legendos libros. Quis fidem sacris scriptis denegabit , quæ DEUM auctorem habent , vel à DEI instinctu scriptores *θεοπνεύστis*. Quis Libro sapientiæ non amet innutriri à Regum sapientissimo *Salomone* concinnato ? Quis belli artes aciemque instructam melius describet , quam *Julius Cæsar* , qui primis in bello Civili & Gallico partibus functus est ? *Sallustius* in Curia princeps Jugurthæ & Catilinæ nefandas artes depingere in historia potuit , quia talibus ad senatum referri solitis assueverat. Inter recentiores *Cominæus* & *Guicciardinus* bellis ipsis præsentibus fuerunt , quæ scriptis conceperunt , hic dux , ille consiliarius. Oratorem nemo melius delineabit , quam *Tullius* Oratorum summus. Agriculturam nisi à peritis frustra expectaveris. Quam laudem sibi *Varro* , *Cato* , *Palladius* , *Columella* , sumunt. Medicinam Medici ,

tractantque fabrilia fabri. Monachorum vi-
tas & regulas Monachi claustris suis devoti,
optimè persequuntur. Nec idcirco com-
mentaria Monachorum in *Mesuen* vilescunt,
siquidem Monasteria singula suos ex ordine
habent Pharmacopœos, nonnunquam & Me-
dicos, eosque doctissimos. Non diffiteor
extra professionis suæ terminos non paucos
evagari, ut Reges de Tabaco & Agricultu-
ra, Principes de concionibus sacris, Nobi-
les de Psalterio, sartores de animalibus, sa-
cerdotes de morbis differant, sutores de
pictura cruris judicent, de clericis Laici.
Sed hanc damus veniam petimusque vicissim.
Nam utinam totus populus Jehovæ essent
Prophetæ, indente Jehova spiritum suum il-
lis. Sunt vasta ingenia, quæ intra angustos
unius scientiæ fines se nesciunt continere,
sicut nec Euripus intra limites se constringi
patitur, quin subinde increscens extra al-
veum prorumpat. Regum, qui nihil ne-
sciunt, verba, ut edicta submisce admitti-
mus & veneramur. Principum Nobilium-
que pietatem exosculamur. Pastores ad De-
cretalia amandamus, sartores aliosque insigni
curiositate rerum Naturæ contemplationibus
deditos laudamus, sutores denique cum
Apelle supra plantam ascendere inhibemus.

De legendis Libris.

47

Neque enim familiis se eruditio adstringit , magnis parvisque per Librorum monumenta inclarescentibus. Illi generosam majorum ortusque sui famam ingenio docili ad artes optimas perficiendas conferunt : hi obscuros natales propria industria & rebus præclare gestis vel scriptis illustrent. Sic *M. Porcius Cato* nomen suum Tusculi ignobile Romæ nobilissimum reddidit. Ornata enim sunt ab eo literarum latinarum monimenta, adjuncta disciplina militaris , aucta Majestas Senatus , prorogata familia , in qua maximum decus fuit posterior Cato ortus : *Euripidis* mater olera , *Demosthenis* pater cultellos venditans nihil prorsus obfuit , quin ille Tragica, hic Oratoria vi se orbi conspiciendum præberet. Hæc *Nasonis* confidentia est :

*Sit quoque nostra domus vel censu parva ,
vel ortu ;*

Ingenio certe non latet illa meo.

Salva omnibus sunt sua jura nativitatis pariter & ingenii , modo , quod *Flacci* est consilium , qui scribunt , materiam suis viribus æquam sumant. Indicia indubitata præbet indoles , educatio , peregrinatio , studium
me-

meditatione assidua, lectione antiquorum recentiorumque, experientia haud fallaci continuatum & cæteris auxiliis, quæ bonæ mentes ad perficienda ea quæ Cedro digna sunt requirunt, sublevatum. Auctorum de his vitæ testabuntur, quas expediet evoluisse. Pauci sunt, qui propriam vitam descripserunt, inter quos *Cæsar Augustus*, *Tiberius*, *Claudius*, *Antoninus Philosophus*, *Severus*, *Carolus IV.* Imperator, Jac. Aug. Thuanus, Mareschallus Bassompierre. Hi quippe, ut *Tacitus* loquitur, suam ipsi vitam narrare, fiduciam potius morum, quam arrogantiam arbitrati sunt. Nec id Rutilio & Scauro citra fidem aut obtrectioni fuit. Plures aliorum virorum illustrium vitæ curriculum sibi describendum sumpserunt, ut *Suetonius*, *Laertius*, *Plutarchus*, aliique ex antiquioribus. Inter Christianos vitas Sanctorum bona fide nonnulli recensuerunt, nonnulli fabulis inspersis corruerunt, quæ in *Legendis Patrum* eminent. De quibus dolenter potius quam contumeliose dixit *Melchior Canus*, multo à *Laërtio* severius vitas Philosophorum scriptas quam à Christianis vitas Sanctorum, longeque incorruptius & integrius res Cæsarum exposuisse *Suetonium*, quam exposuerunt Catholici Martyrum, Virginum

ginum & Confessorum : Idem de *Abdia* historia Apostolorum fabulosa judicat *Bellarminus*. Nostro seculo historicorum Græcorum & Latinorum vitas erudite *Ger. Jo. Vossius* pertexuit, Eruditorum Scriptorum Germaniæ *Melchior Adamus*, Italiæ *Tomasinus*, *Laurentanus*, *Crassus*, Belgii *Meursius*, Daniæ *Vindingius* noster, Sueciæ *Schefferus*, ut prioris seculi decora, Crinitum, *Gyraldum* præteream, quibus curæ fuit Poëtarum vitas recensere & illustrare. De Medicis *Capellanus* sollicitus fuit, & uberiores illorum historiam à *Jo. Henr. Meibomio* conscriptam à Filio ejusdem *Henr. Meibomio* expectamus. Juris Consultorum recentiorum Vitas *Fichardus*, *Mantua*, *Zilletus*, *Freymonius* attigerunt, ut taceam hinc inde Virorum Clarissimorum vitas, a variis sparsim editas, quas & referre difficile & perlegere operosum. Quibus lucem offerunt effigies magnorum Auctorum olim in statuis, auro, argento, ære, gypso in Bibliothecis, imo & nummis, hodieque in ære conspicuæ. Latentem enim ingenii vim & genium scriptorum ex imaginibus & vultu dijudicamus. Multorum imagines æri incisas novem partibus congeffit in Chalcographia *Ammonius*

à *Boissardo* inchoatas. Illustrium Juris Consultorum effigies ex Musæo *M. Mintua* prodierunt. Et Medicorum *Sambucus* dedit. Non culpanda plerorumque hodie consuetudo, libris à se editis imaginem sui præficere, non terriculamentum avium aut Zoilorum, sicut jocatur *Riolanus*, in quod conspuant, sed ut lutum illustri facie conspiciatur. Olim quoque in Librorum fronte effigies expressas indicat *Seneca*, Ista, inquit, exquisita & cum imaginibus suis descripta sacrorum opera ingeniorum. In Bibliothecis Romæ suspendebantur, vel in Atrio, quod inventum Pollioni tribuit *Isidorus*, vel in pluteis ante suos quæque libros, *Juvenalis* indicio, de quibus plura monuit *Lipsius* quam enarrare in præsentiqueamus. *M. Antonius Philosophus* tanti præceptores suos æstimavit, ut imagines illorum aureas in larrario haberet. Adduci nunquam potuit *Caspar Scioppius*, quanquam sæpe ab amicis rogatus, ut effigiem suam vel coloribus pictorum vel æri cælatorum committeret. Nescio an fascini metu, quod adversariorum, quos & magnos & multos habuit, præstigias timeret. Hinc maluit cum *Actio* poëta voluminum, non imaginum certamina exercere.


Cer-

De legendis Libris.

51

Certe nec *Palæottus*, nec *Velserus*, nec *Pinnellus*, viri magni se vivos depingi voluerunt, sicut *Calceolarius* in Museo prodidit. Mens scilicet illis cum *Nasone* eadem, qui amicum imaginem auro insculptam habentem ita alloquitur:

*Grata tua est pietas : sed carmina major imago
Sunt mea; quæ mando qualiacunque legas.*



TH. BARTHOLINI

DISSERTATIO III.

D E

LEGENDIS LIBRIS.

De scriptorum lingua. Ebræa, Latina omnibus utilis. Romana communis. Arabica quoque, Theologis imprimis & Medicis. Lingua universalis impossibilis. Vernaculi Libri quibus utiles. Milesii scriptores. Versionibus quid tribuendum. Autorum opera pondere non numero æstimanda, ex uno sæpe commendantur. Cæterus operum cujusque.

AUctores eorumque præclara nomina nos ad se operaque edita alliciunt, magna fiducia accensos, exactam genii & eruditionis tesseram ibidem inventuros, præsertim si ita publice loquantur, ut privatim legi & intelligi possint, ne
usu

usu nobis Lectoribusque aliis eveniat, quod *Accursio*; magni alioqui nominis Juris Consulto, sed variarum linguarum ignaro, accidisse legimus, qui ad Græcas voces substitit, causatus, Græcas esse eas, nec posse legi. Idcirco circumspiciendum Lectoribus statim erit, qua lingua Auctores in conscribendis Operibus suis utantur. Est vero illa vel Eruditorum communis, vel vulgaris cujusque nationis. Inter eruditas linguas Hebræa, Græca, Latina recensetur, quas, etiam in cruce Christi sacratas, illi plerumque callent, qui inter eruditos nomen ambiunt, quippe, quibus omnis sapientia divina & Humana consignata extat, ideoque omnibus Facultatum Studiosis intellectu necessariis. Et quamquam cum Imperiis Ebræorum, Græcorum & Romanorum linguæ hæ Cardinales fatali quadam revolutione interciderint, successeritque corruptela singularum, nam Rabbini Ebræam vel ex orientalibus Syriaca, Arabica, Persica, Græca, corruerunt, in *Talmude Babylonico* nec vulgo latis intellectam, ut etiam Lexicis novis indigent, vel ex linguis gentium ubi conspersi degunt, conflarunt, & solis literis Ebræis detruncatis legi voluerunt, sicut Ebræi Lusitani Lusitanicam, Germani Germanicam, Poloni Polonicam hodieque

characteribus exhibent. Græcos pariter pergræcantes potius quam Græcè loquentes invenias; Romani denique Ramano ore loqui docendi jam sint: singulorum tamen incorrupta lingua in Libris ad finem seculorum perennabat, in Codice Ebræo, in Græcis sacris & profanis, & Latinorum voluminibus singulari cura ad nos posterosque conservatis. Omnium adhuc usus est in sacris peragendis, Bibliorum Ebræorum in Synagogis Ebræorum, Novi Testamenti in Templis Græcorum, & Latinæ Bibliorum Vulgatæque, ut vocant, Versionis in Ecclesiis Christianorum Occidentalium, ut omnibus istarum linguarum notitia adhuc opus sit. Theologis in pretio est Ebræa, libros *Veteris Testamenti* & *Rabbinorum* lecturis, Græca, *LXX Interpretes*, *Novum Testamentum* & *Patres* Græcos *Canonesque Conciliorum* evolventibus, Latina propter *Patres Latinos*. Juris Consultis Ebræa lingua vel utilis vel ornatui est. Leges enim Ebræorum forenses inspiciendæ, quas *Seldenus* Jctus enodavit. Respublica Judaica pernoscenda, quam nervose descripsit *Cunæus* Jctus. Græcam ignorare non possunt propter *Theophili* Institutiones Juris Græcas, Orientales leges Græcas, editas a *Stephano*, Novellas *Leonis* & alio-

De legendis Libris. 55

litorum, Historiam Græcam, imprimis
Agathia de imperio Imperatoris Justiniani &
Βασιλικῶν libros. Ipse *Justinianus* ex Græ-
cis legibus multa additamenta suis inseruit,
& in *Florentinis Pandectis* multa legum in-
terpretamenta Græcè addita observavit *Scipio*
Carteromachus. Latina familiaris illis esse
debet & domestica, Imperatoris *Justiniani*
in gratiam, ex cujus Digestis Latina lingua,
si periisset, ut *Valla* pronunciavit, restau-
rari posset. Medicis quoque meis istarum
Linguarum peritia vel scientiam afferet vel
famam. Ebræa morbos, herbas & alia ex
Sacro Codice docebit. Græca *Hippocratem*,
Theophrastum, *Dioscoridem*, *Galenum* aliof-
que hujuscommatis interpretabitur. Latina
Celsum, *Scribonium*, *Aurelianum*, *Plinium*,
ceterosque posteriorum temporum Inter-
pretes bene multos necessario conciliabit.
Omnes denique, quos vel Philosophia de-
lectat, vel Historiæ afficiunt, vel amœniora
studia oblectant, in Libris Ebræa, Græca
& Romana lingua loquentibus invenient,
quod & prodesse possit & delectare. Quan-
quam Versionibus superficialia rerum co-
gnitio acquiratur, nihil tamen certius est,
quam dulcius ex ipso fonte bibi aquas. Sed
ex omnibus Linguis Romana inter eruditos
max-

maxime adorari cœpit, qua animi sui sensa, ut omnibus innotescant, exprimunt, quia singulas nationum linguas addiscere, nec vacat scriptoribus, nec lectoribus tempus sufficit. Hæc dialecto inter doctos recepta, plerique eruditarum gentium Scriptores sua volumina consignerunt, & adhuc utuntur in Fœderibus Magni parvique. Ipsi Ebræi se huic submitunt, & Græci, quicunque nostro seculo ab omnibus legi & intelligi cupiunt. *Castrenses, Lusitani Amatus & Zacutus, Chebibi*, Medica tradiderunt, *Menasseh ben Israel* de Creatione, resurrectione, Conciliatione locorum pugnantium, *Termino vitæ*, latino idiomate libellos divulgavit Græci *Allatius, Cotunnus*, aliique Philologica & Philosophica nuper tractarunt, & priori seculo *Argyropylos & Trapezuntius* in traducendo Aristotele fatigati: Tantumque invaluit communis hæc lingua, ut hodieque custodiat secreta Principum & Eruditorum. Nec aliter oportet scribere, quam ejus Monarchiæ sermone, cujus etiam nunc vestigia integra supersunt. Huic tamen, quia Orientale imperium ab Occidentali divisum, in Oriente post Græcam protritam & exulantem, succedit Lingua Arabica, quæ *Alcoranus* scriptus, & passim per vastas nationes illas se diffundit. Innume-

ros Libros variarum materiarum ea scriptos, ex oriente advectos vidi. Hæc certe non tantum propter commercia, quæ nobis cum Oriente intercedunt, & utinam majora non imminuant, Europæis addiscenda, sed egregiorum Voluminum causa, quæ dedecus esset vel non legere vel non intelligere. Habet Theologus in Alcorano quod satagat. Pulchrius sane & Christiano orbi utilius in illo refellendo, convertendisque ad fidem Christianam Mahometanis occupatur, quam sæviendo, in propria viscera. Non facile autem sectæ lativagæ se opponet, nisi linguæ, qua *Coranus* conscriptus est, sit gnarus. Unde *Gisb. Voëtius* multiscius Theologus, exoptavit Alcoranum edi Arabicè cum versione latina & notis textualibus, ut & *Sunnan*, aliosque libros, qui parem aut proximam ab Alcorano auctoritatem obtinent. Quanquam quam plures recenseantur, qui oppugnationem ex Christianis moliti sunt, irrideri tamen nonnunquam à Mahometanis Christianos mihi testabatur *Jacobus Golius*, vir clarissimus, quod congregiantur de religione disputaturi, qui linguæ imperitiâ, falsa dogmata sectis affingant, nec dubitare Christianos de Mahometanis mitius judicatu-
ros, si ex fontibus de veritate sibi pate-
rentur

58 *Tb. Bartholini Dissert. III.*

rentur persuaderi. Ne nos hæc calumnia tangat, Arabica lingua debet esse familiaris, cum etiam N. T. libri ista lingua prostent. Medici quidem *Avicennæ*, *Averrhoës*, *Abbenzoar*, *Mesue*, *Serapionis*, lectione vera frui nequeunt, nisi ad hanc linguam se convertant, quod etiam strenue *Veslingius*, *Plempius* aliique pauci sunt conati. Magnum Arabum in Medicina excolenda studium eluxit, quorum beneficio multa Græcorum Medicorum Opera servata. Nam quæ de administrationibus Anatomicis in *Galeno* desiderabantur vel injuria temporum bellorumque perierant, postremi scilicet, conservati sunt apud Arabes, in versionibus diligentes, quorum Manuscriptum exemplar benevolentia laudati Golii possideo, publico destinatum. In Poësi, historia & Philosophia præclari Codices se commendant, quos *Abulfarai*, *Lochmannus*, *Ales*, aliique reliquerunt, quorum versiones *Erpenio*, *Kirstenio*, *Pocockio*, *Elichmanno*, &c. referimus acceptas. *Livius* ex Arabica lingua translatus habetur. Tantæ linguarum diversitati, qua & Libri & Epistolæ laborant, ut ab omnibus intelligantur, licet remedium aliquod ingeniosa recentiorum curiositas invenire tentaverit, vel lingua universali, vel cha-

characteribus generalibus, Chinenſium imitatione, necdum tamen de ſucceſſu inventi ſperare certi quid poſſumus. Dubito quoque de felicitate, cum in pœnam mortalium inducta polyglottorum varietas, quamdiu mortales erunt, hoc eſt, pœna digni, perennatura videatur. Tot capitum varietatem, quis ſub unius linguæ obſequium reduxerit? Quis dona DEI imminuet, quibus hæc annumerantur? Sed nihil periculi. Augentur potius in dies ſingulos linguæ, vel linguarum licentiæ, in calumniis conſarci-
nandis, in libris conſcribendis, quos ſingulæ gentes vernacula loquendi conſuetudine amant, vel commodi proprii occaſione, vel nationis ſuæ prærogativa, & natalis ſoli ſermonisque privilegio. Crevere hinc in immenſum Bibliothecæ, pro nationum multitudinem. Unde Libri Sinenſes, Ruſſici, Samaritani, Perſici, Æthiopici, Turcici, Coptici, Syriaci, Illyrici, Italici, Hiſpanici, Gallici, Anglici, Germanici, Gothici, Danici, Suecici, Norwegici, Iſlandici, Finlandici, & alii, quibus curam futuri nominis vel linguæ quiſquis egit. Inter quos variarum linguarum Codices dum verſamur, mirum non eſt, ſi deſuetudine hac vix ſubeant nobis verba Latina argumento paria,

vel certe minus , quam olim , pura. Neque ea propter propriæ linguæ innatam curam in ullo damnanda , qui animo Musis dedito , etiam plebeculæ inservire paratus , vel sacrum DEI verbum sacrasque cantilenas proponit , vel Leges Municipales divulgat , vel salutaria inquilinis remedia suggerit , vel res gestas majorum canit , vel jucundis sermonibus demulcet , vel denique vulgaria verba dat , ut a vulgo applausum mereatur. Imprimis gratum est studium , quod linguæ patriæ excolendæ impenditur ab illis , qui profusa erga patriam pietate , bene de publico mereri in laudis parte ponunt. Hinc vel Milesia pocula propinant , vel in veterum libris transferendis occupati , sermonis nitore student cum antiquitate certare. Imo ad Majestatem spectare Idioma proprium Politici contendunt veterum autoritate fulti , in judiciis , Responsis , Instrumentis publicis. At qui res serias , novaque ingenii inventa privatæ linguæ elegantia circumdant , nihil aliud ea invidia agunt , quanquam maxima agant , nisi ut laborem versionis relinquunt aliis , qui ingenia nationum rem publicam faciunt , sicque laudem cum pluribus dividant , quam soli merentur. Milesiorum scriptores , quorum ingens nunc in Ita-

Italia , Gallia , Germania numerus , verba
Lectoribus magnifica vendunt ut verbis pro-
sint , linguamque suam papavere & sesamo
sparsam aliis commendent, qui in hoc musta-
ceo laureolam in aulis Principum & Rerum-
publicarum Curiis quærunt. Scilicet ut in
Myropoliis , sic in Bibliothecis & salutaria
medicamenta prostant , & nihil & fumus
venditur pro cujusvis arbitrio. Poësis vul-
garis pari laude eminet, qua velut bellariis,
opiparas coenas nuptiarumque festivitates
claudimus, & nauseantem jam meliorum re-
rum satietate stomachum placamus. Sed pa-
rum abest, quin de his dicamus , quod ille
de lusciniâ : Vox est, præterea nihil. At
versionibus, quas Eruditi lingua vulgari pro-
curant, veteresque Historicos vulgo loquen-
tes faciunt , majori emolumento tempora
nostra partimur. Pauci enim sunt , qui
laudent *Petr. Pauli Vergerii* institutum, quod
de industria inculto sermone Arrianum ver-
terit. Cæteri quippe non verbis tantum
propriis ad Græci vel Latini Auctoris men-
tem accedentibus rem ipsam insinuant , sed
Commentarii vice esse possunt , lucem ob-
scurioribus locis fœnerantes. Quo encomio
dignus est *Ludovicus Aurelianus* Gallus &
Scipio Ammiratus Italus , quorum hic Itali-

cum ille Gallicum Tacitum nobis dedit , ex quo & linguam , qua loquitur Interpres , & sensum Auctoris obscuri , sine alio Commentatore haurimus. Idem sentiendum de Danica Senecæ Versione non ita pridem à Nobilissima *Brigitta Tottia* elaborata , & de Hesiodo , quem Danicis Rythmis ad vulgi captum nuper dedit *Henricus Thomas Gerner* , sed doctioribus quoque inservituram. Taceo Suetonium magnifica Generosi *Comitis Holckii* penna translatum. Neque enim , amplitudine argumenti circumseptus , ad plures me extendo , quoniam id tantum hac pagina suscepi explicandum , ut Auctorum , de quibus sermo erat , lingua à Lectoribus expendere , antequam ad alia mecum descenderent.

Hisce quippe obiter cognitis ad Auctorum Opera propius accedimus , quorum numerus variat sicut valor. Non ex numero paginarum , nec Codicum Auctores æstimandos censemus , sed ex operum dignitate , sive exilium , sive grandiorum. Pluris enim apud æqui arbitros reputatur folium Sybillæ , quam Annales Volusi. Magnum librum magnum esse malum *Callimachus* Grammaticus apud Athenæum pronunciavit. *Plinius* contra ut alias bonas res , ita bonum librum

me-

melio-rem judicavit, quo majorem. Sed & in parvo magni errores, & in magno pauca vitia esse queunt. Genius victurus utriusque pondere & discrimine examinatur. Responso acuto paucitatem suorum versuum contra Alcestem Tragicum Poëtam vindicavit olim *Euripides* : qui cum apud illum quereretur, quod eo triduo non ultra tres versus maximo impenso labore deducere potuisset, atque is se centum perfacile scripsisse gloriaretur : sed hoc, inquit, interest, quod tui in triduum tantummodo, mei vero in omne tempus sufficiunt. Sunt qui modum nesciant in scribendo, alios parcos videas. Hi otio abutuntur, negotio illi. Utrisque temperantia optanda ne in necessariis novisque docendis operæ chartæque parcant, vel in notis luxurient, ex charta in papyrum transcribentes. Vasta volumina vel materiæ ingeniique secundi ubertas procudit, vel scriptorum avaritia & dicacitas, cum finem verba sæpe inania &, velut enecans crambe, centies cocta non inveniunt, nec satiari marsupium potest, quod numero aureorum quaterniones & plagulas metitur, quæ, ut excrescant, implendæ sunt corrasis undique subsidiis, aliorumque librorum testimoniis longis potius & prolixis quam necessariis.

64 *Th. Bartholini Dissert. III.*

cessariis. At si variæ eruditionis fertile feceraxque ingenium intra angustias paginarum se contineri haud passum, per susceptum argumentum latius decurrat, nullo Lectoris periculo fiet, ut ex amphora urceus exeat. Nec legendo fatigabitur curiosus avidusque doctrinæ animus, nec scribendo calamus, qui corrente stylo opus eruditum per omne ævi tempus plenis gloriæ velis deferret. Cum linea lineam ducat, semperque nova sub manibus materia nascatur, vel uno Volumine pertextuntur suscepta, vel partitis sectionibus plurimisque Tomis absolvuntur. Divisa opuscula in fasciculum conjunguntur, ne pereant, ut Autorum famæ vel posterius consulant, vel Lectorum commodo Librarii. Sic *Apollodorus* Atheniensis *Epicharmi* Comici fabulas in decem tomos coëgit, *Andronicus* Peripateticus *Aristotelis* & *Theophrasti* Opera in Tractatus distribuit. Si plurimorum Doctorum Collegique totius communis Opera ad conficiendum Volumen concurrat, mirari non debemus augeri Bibliothecas numero Librorum & pondere. Collata enim variorum studia efficiunt, ut quæ unus non novit, fortasse notit Ofellus. Hac arte crescunt fertilius Libri, facilius respublica promovetur, felicius discenda in-

veniuntur. Hinc natum *Collegium Conimbricense* Philosophicis disputationibus refer-
tum. Diverforum Auctorum congeries *Bibliothecam* Patrum condidit, *Consilia* Eccle-
siarum, ingentia Volumina Consiliorum à *Surio* collecta dedere. Ita Byzantinæ Histo-
riæ, Rerum Alemanicarum &c. Scriptores
iuncti prodierunt. Sic ex multis interpre-
tibus, XXVIII. grandia *Volumina Juris* Ve-
neti Librarii anno 84. seculi superioris con-
cinnarunt, in quibus pleraque Jcti inve-
niunt, quæ sparsim alibi frustra quæsierint.
Medicorum quoque fautores plusscula Volu-
mina Medicorum veterum, Auctorum *de*
Febribus, *de Balneis*, *de lue Venerea*, *de*
Morbis Mulierum conderunt, nuperque de
unguento Sympathetico *Noribergenses*. Ex
uno vero calamo à nemine intervulso vel
centum volumina profluxisse, id demum ab
ignavia & imperitia Auctores eximit. Nam
Didymi Grammatici exemplum qui quatuor
millia Librorum scripsit, nemo posterorum
est affecutus. Scilicet in nullas se dat an-
gustias virtus & eruditio, laxum spacium
desiderans, expellitque omnia frivola, ut to-
tum pectus scriptioni vacet. Notandum ta-
men in hac Librorum fertilitate, ex uno
plerumque alterove labore palmam meritam

66 *Th. Bartholini Dissert. III.*

Auctori efflorescere , ex reliquis diligentia laudem. Sic inter innumera *B. Augustini* Opera Libri de Civitate D E I eminent. Coacæ prænotiones ex *Hippocrate* seliguntur, & ex *Aristotele* Libri de Animalibus , Analytica & Politica. Ex operoso *Galen*i Catalogo paucos excerpimus reliquis præferendos , de usu Partium , Locis Affectis , Methodo Medendi , simplicium Facultatibus, &c. Ex *Theophrasto Paracelso* Chirurgiam retinemus. Inter *Liceti* opera spontaneum Viventium Ortum, alterumque de iis qui diu vivunt sine alimentis deprædicamus. Ex opusculis *M. Aur. Severini* Librum de Abscessibus , qui famam seni peperit , utilissimum judicamus. *Josephi Scaligeri* de Emendatione temporum , *Petavii* Rationarium Temporum , *Salmasii* in Solinum exercitationes Plinianas , *Heinsii* Aristarchum sacrum , *Casauboni* in Baronium exercitationes , *Tychonis Brahei* nostri Mechanica efferimus, quibus magna ista seculi lumina inclaruerunt , si nihil aliud posteritati suæ reliquissent. Posset per alios quam plures evagari oratio, nisi his indiciis judicium quivis suum posset ipse persequi. Quod ut porro expeditius fiat, singulorum Auctorum Opera vel sparsa , per publicos indices , vel collecta ,
per

perquirenda erunt. In Vitis Eruditorum plerumque Opera cuique Auctori subjiuntur, vel in ipsis Voluminibus, quomodo *Plinius* primum naturalis historiæ Librum implevit. Operose secundum annorum seriem vel alii, vel ipsi Auctores sua Opuscula exhibuerunt. Omnium Galeni Operum Synopsin *Lucius Scaranus* confecit, Hippocratis *Lemosius & Mercurialis*. *Galenus* ipse Librum scripsit de Libris propriis, aliumque de ordine Librorum suorum. *Licetus* quoque integrum Volumen explicavit de scriptis suis, & qua occasione ad singula scribenda devenerit. Ita & *Thomas Campanella*. Catalogum Lucebrationum suarum edidit *Thomasinus*, *Hornius*, per filios *Meursius & Ernstius*, per Ernstium *Caselius*, per Volcamerum & me *Severinus*. Quanquam nos nostra non delectent cum majorum comparatione, ut tamen operæ exscribendæ amicis rogantibus parcerem, non semel passus sum indicem publicis typis & ipse & per discipulos, Opusculorum meorum excudi, quæ vel juvenis vel provectior sed properante calamo, adeoque impolito, posteritati, si quæ futura, consecravi, non laudis cupidine, quam meritis non sum, sed diligentiae testimonio, & publi-

68 *Th. Bartholini Dissert. III.*
cum juvandi sollicitudine. Ab arbore enim
nemo expectat fructus , sed exigit :

*Nec ego Te meis
Chartis inornatam sileri ,
Totve tuos patiar labores
Impune , Pallas , carpere lividas
Obliviones.*



TH. BARTHOLINI

DISSERTATIO IV.

DE

LEGENDIS LIBRIS.

*De materia Librorum vett. Lapidibus & saxis, foliis arborum & herbarum, ligno & corticibus, cera in pugillaribus, plumbo & ære. Lin-
tei privatorum. Membranae usus ab Eumene inventus, charta suc-
cedente, etiam ante Alexandritem-
pora. Hujus hodie varietas. Libra-
riorum vett. in describendis Libris
opera. Instrumenta scriptoria. Styli
figura. Quid nigra litera Martiali.
Calamus arundineus Celsi. Litera-
rum Romanarum diversitas, a
Longobardis corruptarum. De
Manuscriptorum antiquitate & va-
lore judicium. Codices Danici,*

Gothici , Islandici. Typographia natales & incrementa. Editionum meliorum notæ , quæ primæ , vel notis auctiores , viventibus auctori- bus. Typographi correctiores. Biblia in membranis. Forma Librorum magna ad pompam , parva ad commoditatem. Volumina antiquorum qualia. Tabellæ complicatæ. Libri pumice lævigati , ornati cor- nide. Luxus in involucris Recen- tiorum.

Singulorum Librorum , quos docti Au- ctores ex penu eruditionis suæ de- prompterunt , editiones ad examen vocandæ , ne in his labatur Lector si vel priorem vel malo fidere editam pro po- strema & correctâ eligat. In hoc enim ma- gna cautione opus est , cum editiones , quas præsens Auctor procuravit , aliis præferri debeant , quæ vel inscio Auctore vel absen- te , alibi Bibliopolarum avaritia vel legen- tium desiderio prodeunt , & posteriores curæ ab ipsis Auctoribus susceptæ primas emen- dent deferantque. Ut distinctius in hoc pa-
ragrapho

ragrapho progrediar , distinguenda nobis erunt tempora librorum. Alii manu scripti prisca secula indicant , posteriora typis expressi. Antiquissimi Libri à nostris diversam & materiam & formam habuerunt, sive ut apertius loquar , alia fuit materia in qua scripti sunt characteres literarum , aliud instrumentum cujus auxilio scribebantur, alius modus, alia ratio omnium. In uno tamen veterum modus, licet inter se diversus, conveniebat , quod manus semper opera fuerit adhibita immediatè. Nostri manu quidem utuntur, sed intermediis typis , qui calami vice funguntur. Materiam primam Librorum lapides præbuere, quibus ipse Jehovah legem suam inscripsit. Sethi filii, quæ invenerunt, in columnis duabus inscripserunt , altera ex lateribus, ex lapidibus altera, ut ab imbribus essent secura. Babylonii istorum forsan exemplo, & Phœnices, coctilibus laterculis mores, leges & instituta conscripta tradiderunt. In marmoribus Saxisque Romani notas publicas , & quæ scire posteritatem voluerunt , inciderunt. Nostri Dani antiquissimi cautibus gesta majorum , posteriores saxis literas Runicas impresserunt, quarum hodieque passim vestigia exstant in Cœmiterio , quod Bibliothecam Academicam ambit

ambit conspicua, ex tumulis suis hinc inde collecta, cum monumentis *Olai Wormii*, nostri dum vixit Patris & Præceptoris, etiam post fata colendi, perennatura. Quo suafore ad hunc locum commodum transferri curavit Augustissimus Rex Divus *Fridericus tertius*, ut ab imbris & edace tempore immunia de antiquitate sua testarentur, & diversum scripturæ genus conservarent, ab illo quo Bibliothecam videmus libros suos ostentare, sed nitidiores. An magis diuturnos, posteritatis testimonio constabit. Illa si ab impluvio removeantur, ad finem mundi insculptas literas servare apta videntur, & à teredinibus secura. Cæterum flammis omnia patent, tam ista quam hæc, quas *DEUS* stator hujus Basilicæ clementer averruncet. Quid à flammis saxa pati possint, meo periculo didici. Cum conflagraret aula mea *Hagstadana*, cujus acerba adhuc memoria, ingentia saxa quadrata fundamentis supposita, vi flammarum dissiluére ut per lamellas conciderent. Ipsæ quoque tabulæ æncæ XII. *Tabularum* passæ injuriam apud Romanos. Nam literæ liquefactæ memorantur *Coss. M. Cæfone & C. Antonio*. Successerunt lapidibus folia arborum, palmarum, malvarum, oleæ, quibus etiam nunc Indi utuntur. Flo-

rum

rum folia, quibus nomina inscripta leguntur, amantium erant vel augurum ludus, elegantiorumque puellarum, quæ nitidissimis manibus flores ex floribus conficiunt. At libri arborum, seu cortices interiores, pro foliis placuerunt, unde librorum nomen hodieque servatum, sicut & foliorum, licet usus desierit. Apud Indos, teste *Q. Curtio*, libri arborum teneri, haud secus quam ceræ, literarum notas capiunt. In *Tilia Dictys Cretenfis* Historia Trojana Scripta memoratur *Q. Septimio*. Tiliam, Philyram, & papyrum *Ulpianus* Jctus nominat. Sed & fagi meminit *Virgilius*, ejusque viridis :

———— *In viridi nuper quæ cortice fagi*
Carmini descripsi ————

Ex ipso præterea ligno, magis ut creditum duraturo Codicilli dolati, ex quo Codex Evangelii *S. Mathæi* Ebraicè scripti inventus fertur in monumento Barnabæ, Dani nostri sua Calendaria In ligneo affere consueverunt olim designare, cujus in Musæo nostro exemplar servamus. Antiquior Othinus apud *Saxonem* cortice carminibus adnotato Hotheri Regis filiam, lymphanti similem reddidit. Exinde addita cera nati pugillares cerei dicti, in quibus deleri poterant & corrigi ea quæ deinde in pergamenis

nis rescribi debebant, item citrei, eburnei, membranei, & ex lapide scissili, quorum hodie mercatoribus & peregrinantibus usus probatur. Plumbeis voluminibus seu laminis monumenta publica confici Romæ cæpta sunt, quorum etiam mentio occurrit apud *Jobum*, Ære demum perenniore, cujus in Capitolio Romano hodieque vestigia supersunt, nostris Cælatoribus perfamiliari. Tabulæ XII. Legum æri incisæ fuere, quam alii eboreas velint. Tandem & linteis privata monumenta confecta *Plinius* auctor est, quorum Librorum linteorum in Historiis Romanis passim fit mentio. Sed membranæ pecudum membræis deglubitæ & detractæ commodissimæ sunt visæ quibus res quævis inscriberentur. Pelles vocantur *Martiali*, quibus *Homerum* & *Livium* condi & arctari canit. Harum cum magnam copiam, inopiâ chartæ, Pergami Eumenes confici jussisset, ipse Eumenes Rex eas invenisse creditur *Varroni* & *Plinio*, cum, ut recte explicat *Hermannus Hugo*, longè ante inventæ fuerint membranæ, quippe membranaceos libros antiquissimos ab *Eleazaro* pontifice Judæorum ad *Ptolomeum Philadelphum* missos tradidit *Josephus*. A Pergamo tamen nomen accepere membranæ, adhuc vulgo ser-

servatum: Denique charta Alexandri Magni victoria reperta, conditâ in Ægypto Alexandria, omnium votis satisfecit, quibus res Literaria cordi fuit, quanquam contra *Varronem Pliniumque Guilandinus*, literatissimus Patavii Medicus & herbarum peritiâ celebris, evincat longè ante Alexandri tempora chartam ex Papyro fuisse confectam, de qua controversia judicent in hac palæstra antiquaria magis exercitati. Superfunt etiam nunc pluscula volumina antiquorum in membrana crassa pariter & tenui ex agnellis vel eorum secundinis, uti & in charta varia scripta in Bibliothecis publicis Italiæ, Patavii, Venetiis, Florentiæ, Romæ, & in privatis Eruditorum, nec in nostra desiderantur. In membranis se strenuè exercuerunt scribæ in Monasteriis Ecclesiæ occidentalis ante Typographiam inventam, describentes Auctores sacros profanosque pluribus exemplaribus tandem multiplicatos, sed pro vario scribarum captu vel nitida manu vel intricata & vitiosa, unde tot natæ Criticorum dissensiones & Lectionum varietates, quæ crucem cruditis Philologis figunt. Aureo Romanorum seculo pluribus quoque exemplis Libri, quorum aliquod pretium, describi solebant. Id de suis carminibus *Naso* testatur:

*Quæ quoniam non sunt penitus sublata, sed
exstant.*

Pluribus exemplis scripta fuisse reor.

M. Claud. Tacitus Imperator jussit quotannis aliquot exemplaria *Taciti* describi, quo ab omnibus legi posset, sicut prodidit *Flor. Vopiscus*. Servorum literatorum ad id præcipuè opera utebantur, qui idcirco Librarii vocabantur, quales plurimos in familiis suis aiebant. Nam Autorum propria manu exarati Codices ad nostram ætatem non pervenerunt, nisi quod de Manuscripto quodam *Paulino* fama sit, sed ea dubia. At Græcorum Volumina vario charactere & charta pene sola fuere scripta, qualia complura & possideo & in Bibliothecis Italiæ vidi, præsertim Venetiis, quæ secum ex Græcia attulerat *Cardinalis Grimanus*. Charta fere omnis illorum bombycina & glabra. Sinensibus ex Serico. Persis Arabibusque ex bysso quoque nitet, sicut ex Arabico codice & Japonico, qui in Bibliotheca publica servatur, videre est. Europæis nostris detrita linteorum quicquiliæ chartas componunt, in molis subactæ & alumine firmatæ, pro quarum nobilitate, & crassitie linorum, modo charta Regia vel
posta-

postarum elegantissima conficitur, modo Emporetica vilissima, ad thus & piper verius quam libros condemnanda. Operæ compendium fecit *Petrarcha*, qui in veste pelliacea scripsisse dicitur. Instrumenta quibus veteres usos in scribendo constat, stylum, pennam & calamum præcipuè complectuntur. Styli ferreis in saxis, lignis, ære, plumbo scribebatur, & in pugillaribus cera oblitis. Hinc styli ferrei una parte acuti, altera lati, ut illa literæ formentur ac delegantur. Unde Latinis vertere stilum pro delere usurpatur. Talem stylum ex armario *Pignorii* apud *Rhodium* nostrum vidisse me memini, nec absimili figura ex Musæo *Hopperi* depingit *Hugo*, in literariis his Antiquitatibus doctus, sed spicilegium aliis relinquens. Hos stylos in armario quodam, quod graphiarium vocabant, librarios pueros condidisse ex *Martiale* conjicimus, quam alii graphiarium pro ipso stylo ferreo interpretentur. In pugillaribus vero eburneis, nulla cera nigra tristive incrustatis, carbone usos suspicor, ut nigra litera pingeretur, de qua *Bilbilicus* alibi ita loquitur :

*Languida ne tristes obscurent lumina cera.
Nigra tibi niveum litera pingat ebur.*

Sed chartis calamos dabant arundineos , quos ea propter *Celsus* & *Scribonius* scriptorios vocant, & *Dioscorides* ad βιβλιογεαφίαν accommodatos tradit, & tandem avium pen- nas illis minores , crena extremitatis incisa , ex qua liquor stillat literas efformans , sive atramentum nigræque loliginis succus , sive minium aut muricis succus , illud vulgaribus hic Imperatoriis Libellis & Edictis , vel titulis , qui adhuc Rubricæ nomen retinent , vel universim scribendis advocari solitus. Ita quisque suo modo suisque characteribus Libros olim conscripsit. Latini & Græci à sinistra ad dextram ductis lineis, Ebræi contra & Arabes cæterique Orientales à dextra ad sinistram progrediebantur , manumque scribentis ducebant , nam aliarum gentium varios scribendi modos sursum deorsumque non tangam , quorum Librorum apud nos rarior usus est. Characteribus quoque diversis singuli suum pensum librarium absolvebant. Romani literas quadratas seu Unciales amabant , quibus Inscriptiones adhuc quam plurimæ leguntur & Librorum veterum principia , quas decurtarunt & depravarunt barbari,

bari, unde novo minutoque scribendi genere post barbarorum irruptiones succedente, impediti illi variisque abbreviaturis, & vel ignorantia linguæ purioris vel nimia festinatione corrupti libri post Constantini Magni ætatem, & deinde Carolo Magno imperante in Monasteriis Christianorum bibliothecas implerunt Longobardicis literis, pluteosque onerarunt verius quam ornarunt. Elegantior scribendi per capitales literas modus καλλιγραφία dicta est. Huic opposita ταχυγραφία, vulgaris scriptio privatorum. Talia instrumenta literarum publicarum composita a tabellione ætate Justiniani vidit Cl. *Salmasius*, uno quasi ductu continentur exarata, quæ vix legi possunt, longis & complicatis characteribus, quos latinos esse nemo diceret. Vidit etiam tabulas privati alicujus ceras antiquissimas, Romano sermone & minutissimo caractere Romano scriptas, sed tantum differenti a κεκαλλιγραφημένω, ut Armenius potius videatur, aut Georgianus quam Latinus. Tali scriptura minuta & intricata in membranis Macrum habui dono Cl. *Holstenii*, quem mihi non ita pridem Vulcanus surripuit. Et B. *Hieronymi* Versio Bibliorum Latina in tenuissimis membranis eo scribendi modo in Bibliotheca publica servatur.

vatur. Hincque de ætate & pretio Librorum Manuscriptorum judicium ferri potest, cum pro vetustissimis & carioribus censendi sint, quilibet majusculis minusque negotii oculis legentium faceissentibus scripti sunt, quorum nonnulli passim in Bibliothecis integri custodiuntur. Quo in numero referimus *Livii* membranas elegantes in Musæo *Rhodii*, & *Pandectas Justinianas* in Techniotheca Florentina thesauri instar curiosis patentes. Correctiores autem censendi sunt Codices quo antiquiores, quippe qui correctorum curiosorum vel indoctorum manus effugerunt. Hinc Arato quærenti, ubi locorum haberetur *Iliadis* pisticæ copia, Timon Timarchi filius dicitur respondisse, quærendam esse in exemplaribus antiquis, sed nondum correctis. Non contenti corrigere, plura sæpe addebant, quam omittebant, sicut docte probat *Gronovius*. Codices Ebræorum antiqui, inprimis sacrosancta *Biblia* majusculis literis exarata extant. Sed Rabbini posteriores festinantibus characteribus & quasi mutilis sua insomnia vel commenta tradiderunt. Arabum autem Persarumque nitidissima scriptura, insigni manuum varietate, omnes lectores afficit, quam assidua scribendi consuetudine hodieque perficiunt

ficiunt in Alcorano , in Poëtis suis , Philosophis & Historiis , siquidem squallorem typographorum averfantur. In Græcorum Voluminibus parvam characterum differentiam invenias , nisi quod posteriora abbreviaturis se prodant , & sermonis corruptela. Ferè enim semper minuto scribendi genere usos videas Græcos scribaces , ut celerius prompta manu dicacitatem suam chartæ illinerent , nisi quod *Dioscoridem* litera majuscula descriptum Constantinopoli viderit *Busbequius*. Numero Voluminum Romanos vicerunt , quibus armis cedere coacti sunt. Inprimis Imperio ad Constantinopolitanos devoluto , ferax fuit Græculorum calamus. Sed dum strenue ingenio vacabant , & monumentis literarum ad posteritatem transmittendis , libertati illorum insidiati primo Romani , deinde Saraceni , contra eos pugnarunt strenue. Hinc ingentia & numero & mole Volumina Græcorum sepia Bibliothecis reliquit , quæ Europa curiosæ antiquitatis reverentiâ servat , cum pauciora Romanorum Arabumque monumenta , eaque ex Græcis plerumque desumpta , supersint , fortiter agere quam multa scribere laborantium. *Scaligeri* judicio Græcorum libri paulo ante vel post everisionem Imperii Constantinopolitani Literis Græcis conscripti. Illos

characteres primi omnium Christianorum
 Hispani, à Mauris, ab Hispanis Latini Chri-
 stiani, ab illis Græci acceperunt, vulgo nun-
 quam apud Græcos notos. In septentrione
 nostro serius librorum scribendorum ratio in-
 valuit, Christianæ fidei introductæ felix fru-
 ctus, cum olim Codicum usum à cautibus
 mutuarentur. Danorum enim antiquiores,
 majorum acta patrii sermonis carminibus vul-
 gatæ linguæ suæ literis, saxis ac rupibus in-
 sculpserunt, & *Scaldris* suis, seu *Runis*, Poëtis
 excellentissimis floruerunt, quorum vestigiis
Andreas Sunonis & *Saxo Grammaticus* inhæ-
 rentes, Historiam Danicam undecimi seculi
 pertexuerunt, quorum hic ex Archivis Ma-
 nuscriptis *Burgeri* Archiepiscopi Lundensis,
 opera *Christiani Petræi* typis Badii Ascensii
 primum Parisiis prodiit A. C. 1514. ille ex
 Bibliotheca nostra Hafniensi non ita pridem
 per *Aephanium* editus, cujus etiam *Sunonis*
 beneficio Leges Scaniæ in latinam linguam
 translatas habemus, Hafniæ postea typis ex-
 scriptas A. C. 1590. Literis autem usi sunt
 Dani Christiani veteres propriis Runicis,
 quadratis ad Romanorum morem, quorum
 fidem susceperant, quæ in Saxis adhuc con-
 spiciuntur, in Codicibus nonnullis, quos
 patriæ suæ vindicavit *Olaus Worm*, patriæ
 lu-

lumen & ornamentum immortale, in nummis aureis & toreumatis. Deinde oblitteratæ illæ, in monumentis ferè solis adhibitæ, Gothi-
cis vel barbaris characteribus locum fecerunt. Nec Tylenſium ſeu Iſlandorum noſtrorum diligentia ſilentio oblitteranda, qui & aliarum nationum res geſtas libris à ſe ſua lingua ſcriptis ad poſteros miſerunt, & propria Norwegorumque facta & Mythologias varias monumentis manu exaratis conſignarunt. Ex illis *Saxo* operis ſui hiftorici partem contexuit, tales arbitros habere cupiens, quos tanta vetuſtatis peritia callere cognoverat. Hæc etiam nunc manibus curioſorum volvuntur, magna-
que illorum ſupellex ad beatum *Wormium* venit, *Elichmanno* ceſſit, fumofos iſtos Libros inter Bibliothecæ theſauros numeranti, & ad Auguſtiſſimum Regem *Fridericum Tertium* miſſa, & per Interpretes ſuos Iſlandos conquiſita. Inter cætera eminet *Edda* Iſlandorum, ſeu Mythologia, veteri lingua Iſlandica a *Snorrone Aurlaſonio*, Nomophylace Iſlandiæ circa annum Chriſti 1215. conſcripta, quam poſt tot Manuſcriptorum concertationes, tandem cum Latina verſione publicis typis exhibuit patriarum Antiquitatum amantiſſimus *Petrus Reſenius*, Academix noſtræ Profeſſor, & Regiæ urbis præſes. Nolo ad

84 *Th. Bartholini Dissert. IV.*

Libros in Norwegia Olim scriptos me diffundere, nec vicinæ Sueciæ monumenta, quæ sensim à situ & pulvere extrahuntur, nec utriusque Regni scriptas Leges advocabo, quia typis jam publicis leguntur. Jus Aulæ Norwegiæ antiquissimum quod Hirschgraa vocant, *Dolmero* interprete & Glossatore proficit. *Canuti* secundi Jus aulæ Danicum, *Vietherlags Roett* dictum, A. C. 1035 conditum, ex Bibliotheca Magni Olai *Wormii* nuperrime cum Versionibus & Notis publico vindicavit laudatus *P. Resenius*. Danorum Leges vetustissimæ à Frothone Tertio promulgatæ, sine dubio etiam literis fuerunt traditæ, ut perennarent ad posteros, sicut *Waldemari Primi* Lex scaniæ A. C. 1158. ejusdemque leges Selandicæ, A. C. 1171. promulgatæ, & *Waldemari Secundi* Codex Juris Cimbrici A. C. 1240. conscriptus inter membranas chartasque varias multorumque describentium manus perennarunt, donec non semel typis Hafniensibus exscriberentur, hic quidem primo apud Gotfridum de Gehmen A. C. 1508. cum Notis & summariis *Thordonis Legiferi*, deinde cum Recessibus A. 1590. & 1643. *Erici Glippingi* Leges municipales, vulgo *Birckerætt* A. C. 1269. ad nos quoque illibatæ pervenerunt. De Gothi-

thicis Manuscriptis ne verbum addam, nec Anglo saxonice, nam illorum gustum dedit *B. Vulcanius*, horum *Spelmannus*. Tacere interim non possum *Ulfila* Gothorum olim in Mœsia seu Wallachia Episcopi Versionem Novi Testamenti Gothicam, quam bono publico ex Manuscripto, quod tamdiu delituerat, protractam, auspiciis Illustrissimi Comitis *Magni Gabrielis de la Gardie*, Cancellarii Regni sueciæ, & fautoris Literarum, in orbem ire iussit nobilis Antiquitatis patriæ promotor *Stiernhielmus*, cujus versionem latinam antea dederat in Belgio *Fr. Junius Junior*. Scilicet hoc artis Typographiæ est beneficium, ut sine operoso manuum labore pluribus communi fiat quicquid vel pietas vel eruditio meliorum ingeniorum paritur. Seculo quarto decimo hujus inventi nativitas celebratur, quo nihil utilius mortalibus DEUS, omnium bonorum auctor, indulgit, quanquam artem typographicam à quinque retro seculis, imo ante natum in carne Servatorem, à Sinensibus usu receptam aliqui propugnent. Attamen in Europa innotuit primum Harlemensi civi *Laurentio Joannis* Aedituo ex *H. Junii*, *Scrivenerii* & *Boxhornii* narratione, A. C. 1411. Is quippe forte in suburbano nemore spatatus, cœpit

faginos cortices principio in literarum typos conformare, quibus inversa ratione sigillatim chartæ impressis, versiculum unum atque alterum animi gratia ducebat, nepotibus exemplo futurum. Quod ubi feliciter successerat, cœpit animo altiora agitare, primumque omnium atramenti scriptorii genus glutinosius tenaciusque, quia vulgare lituras trahere experiretur, cum genero suo *Thoma Petro* excogitavit; inde etiam pinaces totas figuratas additis characteribus expressit, quo in genere excudit adversaria, operarum rudimentum, paginis solum adversis, haud epistographis. Is liber erat vernaculo sermone, ab auctore conscriptus Anonymo, de speculo nostræ salutis. Postea faginas formas plumbeis mutavit, has deinceps stanneas fecit, quo solidior esset & durabilior materia. Inter operarios domesticos *Joannes Faustus* artem hanc jungendorum characterum fusi-
lium & typorum peritiam edoctus, clam insalutato hero Coloniam Agrippinam se subduxit, mox Moguntiam, ubi incisæ tabulæ, qua Harlemi *Donatus* fuerat excusus, exemplo artem hanc perfecit *Joannes Guttenberg*, Argentinâ oriundus, primumque iisdem Laurentianis typis 1442. in lucem edidit *Alexandri Galli Doctrinale*, cum *Petri Hi-*
spa-

spani Tractatibus, deinde ulterius artis subtilitate progressus A. C. 1450. *Biblia Latina* grandiori scriptura, quali Missalia solent imprimi, typis divulgavit, quale exemplum in Regia nostra Bibliotheca cernitur Coloniae impressum. A *Conrado* deinde quodam Germano 1458. aliis 1460. Romam translata ars nova Libros *Augustini* de Civitate DEI & *Lactantii* Institutiones excudit A. C. 1465. à *Sixto Ruffinger* Argentinate Neapolin advecta Venetiis ab *Aldo* seniore illustrior redita, & tandem à *Nicolao* Jenfon, gallo, in Galliam Venetiis fuit adsportata. Ita propagata fuit ars Divina, quæ scribendi compendium facit, operosumque scribarum studium ingenti onere sublevavit, certatim jam conantibus Typographis, ut Auctorum diligentiam æquent, nec sibi tantum sed & publico prospiciant. In infantia tamen rudes literæ, & ad Longobardorum Monachorumque exemplaria effictæ, Lectores remorantur, quas sensim expoliverunt curiosi Typothetæ, ut ad illarum nitorem nihil addi posse amplius videatur. Sublato igitur laborioso scribarum fastidio, variæ per typos procuratæ Librorum editiones, etiam illorum qui claustris catenisque Cœnobiorum constricti in publicum nunquam essent eluctati,

nisi

nisi mortalium felicitati & curiosæ cupiditatⁱ nova arte Superi consuluissent. Cumque a primis artis hujus incunabulis, excreverit Librorum cumulus, & vel avaritia mercatorum vel auctorum celebritas varias editiones ejusdem Libri sæpe incude repetita fatigati orbi dederit, operæ pretium me existimavi facturum, si meliorum editionum notas investigarem. In omni hac materia libraria principe cura advertendum est ad Libri typis editi formam seu magnitudinem, typorum elegantiam, chartæ nitorem, typographum, locum & annum editionis, quibus notis universum de hoc negotio judicium absolvitur. De singulis, chartæ temporisque parci, erimus brevissimi, ad alia anhelantes. Sed à postremis ad prima progrediemur. Æra plerumque addita, vel in fine vel in fronte, de ætate Libri & Auctoris testatur, scitu necessaria. Editiones Auctorum quæ ad natales Typographiæ quam proxime accedunt, typorum ruditatem auctoritate compensant. Pares enim habentur apud criticos codicibus manuscriptis, ex quibus proxime sunt depromptæ. Ita *Plinius* Romæ 1470. vel Parmæ A. C. 1476. apud Stephanum Coralum, vel circa ea tempora Venetiis impressus, & *Celsus* Florentiæ 1478. editus cum

Co-

Codicibus Manuscriptis certant, ad quos velut ad manu exarata exemplaria provocare licet, si de fide lectionis alicujus dubitetur. Posteriores Editiones, ad normam primarum expressæ, pedetentim à bonitate deficiunt, nisi critica manu vel emendentur vel conserventur. Quibus idcirco pretium accedit, quod cum pluribus Manuscriptis collatæ, Auctoris sensum melius assequantur; plerumque aliqua laudabili accessione commendentur, qua emtores alliciuntur, commentariis nempe Virorum Doctorum, Notis, Indicibus & aliis additamentis pretiosisque laciniis eleganti purpuræ assutis. Exemplo nobis sint *Biblia* splendidissima, & vilissimus *Petronius*, ne pluribus rem notam illustrem. *Biblia Polyglotta Waltoni*, quæ nuper Anglia excudit aucta variis versionibus & Criticis Commentariis præferuntur Bibliis Regiis *Parisiensibus*, quæ tamen Samaritana & Arabica versione auctiora sunt Bibliis Regiis *Antwerpiensibus Montani*, & hæc *Bombergensibus*, vel *Complutensibus*. *Petronius*, nequitix magister, notis variorum nuper in Belgio illustratus reliquas editiones post se relinquit, novo supplemento superbiens non ita pridem Traguri invento. Corpus Juris Civilis *Dionysii Gothofredi* Notis brevissimis

sed nervosis illustratum amplissimis veterum
 Juris consultorum *Glossis* præferimus, illud-
 que quod J Cti Batavi his annis eleganti ty-
 po & charta procurarunt. *Galen*i nostri ope-
 ra Latina apud Juntas sæpius quidem sunt re-
 cusa, sed nona editio perfectissima. Nam
 prima Lugdunensis apud Colinaum 1536.
 mutila est, novis, hinc inde repertis, po-
 strema Juntarum editioni ad complementum
 egregii Operis additis. Nisi *Charterius* Pa-
 risiensis & *Hofmannus* Altorfinus expectatio-
 nem nostram frustraissent, Græco-Latinam
 editionem omnibus numeris perfectam ha-
 beremus, nec reliqua est spes, nisi clarissi-
 mus *Volcamerus*, penes quem Galenus Hof-
 manni latet, eam impleat. *Vesalii* Anatomie
 A. C. 1555. Basileæ edita primam laudem
 meretur iconibus, charta aliisque optimæ
 editionis notis conspicua. Et sic de cæteris.
 Æra nos quoque ad Auctoris ætatem manu-
 ducit. His quippe superstitibus, emenda-
 tiores libri prodeunt, & opera auctorem
 præsentem clarius indicant. Et in univer-
 sum postremis vitæ annis editi libri pro per-
 fectissimis censentur, posterioribus cogita-
 tionibus ad limam redacti. Præsentia Aucto-
 rum quantum momenti conferat ad libros
 emendate legendos, meo exemplo testari
 possum.

possum. Sed mea parcius tango, ne hac scena digniores personæ excludantur. Opera diligentissimi *Sennerti Wittebergæ* 1628. & sequentibus Auctore ipso inter vivos superstite & præsentē, legi debent ab Artis Tyronibus, nisi in dosibus medicamentorum aberrare velint, magno famæ & salutis damno. Nam quæ Lugduni, Venetiis & Parisiis prælum subierunt, innumeris erroribus Typographicis referta spem medentium destituunt. Ne de nostris fileamus, conquerentes Manes Witfeldianos video, quod defuncto patriæ Historico *Arnoldo Wufeldio* opera ejus in majori forma sed majoribus erroribus Sententia, & non uno loco mutila Typographi Hafnienses A. C. 1652. deperaverint, cum emendatiora ille ipse superstes Hafniensi prælo minori reliquerit. Conquestum & *Parentem nostrum* beatum meminī, quod Argentoratenses non malo animo sed incauti Physicam ejus nomine ediderint, ex scriptis propriis & aliorum compilatam. Denique, ne longior sim, *Brochmanni*, optimè de publico & Bibliotheca nostra meriti, Systema Theologicum Auctore præsentē & operas corrigente Hafniæ 1633. ex prælo emergens pro legitimo reputatur, quicquid & Lipsienses & Ulmenenses pro sua editione

pugnent. Pauca ex multis libo. Quis modus foret, si omnia persequerer, inprimis quæ de Editionibus Patrum Ecclesiæ veteris dici possent, an Basilienses, vel sequentes alibi divulgatæ, quas pro castratis nonnulli traducunt, pro sinceris æstimandæ. Rem nec mei arbitrii nec censuræ illis relinquo decidendam, qui in hoc pulvere ætatem triverunt, de *Hippocrate* Medico unum addidisse contentus, nec primam Editionem Græcam Venetam 1526. approbari, quia manca, nec primam Latinam Romanam *Calvi* 1549. quia in sensu deficit, nec primam Græco-Latinam *Mercurialis* Venetam 1588. licet novo ordine digestam, quia in numerum Interpretum male ille se ingessit judicio *Castrensis*, nec ultimam *Lindani* Leidenfem 1663. licet nitidissimam, quia ingenio suo abusus in textu emendando audacius, sicut in *Celso*, versatus est Vir ille multifcius; sed mediam in Latinis *Cornarii*, in utraque lingua *Foësi* à *Wechelio* 1595. cum variis ad autorem lectionibus expressam, Medicis commendari. Verborum faciam compendium. Primæ veterum Auctorum editiones legitimæ sunt, sed non integræ semper, posteriores semper auctiores, sed ab interpretibus eruditioribusque mutantur lumen

men quod prioribus præferant. Adhæc locus editionis commendat Libros. Ubi scilicet correctissima præla doctis Correctoribus foventur, qualia priori seculo Veneti habuerunt, Basilienses, Lipsienses, Lugdunenses, Parisienses, Antwerpiani. Nostrium seculum ubique torcularia Typographorum alit. Sed sunt bona mixta malis. Mel alia fundant, alia venena. Quæ cum Gallis, Anglis, Belgis conferri hodie possint, nulla sunt. Genevensium editiones omnium pessimæ. Rari quidem libri in Hispania, Italia, Sicilia cuduntur, sed, quia sub censura prodeunt, plerumque rari & docti. Alibi scribunt indocti doctique poemata, ubicunque libera sunt præla, nisi famæ suæ Typographi & religioni consulant. Hinc de Typographis sollicitos nos esse par est, quos peritissimos prius seculum tulit, nostrum subinde negligentiores. Illos, ut creaturam agnoscant suam, in Librorum frontispicio vel calce videmus lucem non fugere. Ab eorum peritia vel negligentia Librorum fata Auctorumque dependent. Hi laudem cum Auctoribus æqualem trahunt, & in famæ participationem admitti volunt. Ita de Operino doctissimo Typographo Basiliense lussit *Encomiastes* :

*Tu famam libris , vitam scriptoribus addis.
Pars tibi mercedis sic ab utroque venit.*

Sœpe tamen vitiis suis bonos auctores commaculant , indigni qui publice legantur , aut per orbem ferantur , fumis potius addicti , cauponis , ganeis , sordido lucro , famam typis suis concilians scriptoribus , sed propriam amittentes. Obscura hæc sordidaque nomina Correctores cum erroribus recte expungerent , & ex libris spongia acri extergere-
rent. At Typographos doctos , sobrios , diligentes quis libris invidet , quibus inclarescant ? Inter hos *Aldus* Venetiis , *Basilæ Frobenius & Operinus* , *Lutetiæ Henricus Stephanus* , *Fed. Morellus* , *Antwerpiæ Plantinus* , *Leidæ Raphelengius* , doctrinæ gloria & artis Typographicæ exercitio de Auctoribus à se editis , emendatis & castigatis , præclarè meriti numerantur. Quorum nomina , cum editionibus bonorum Librorum præfixa vides , de illarum pretio noli dubitare aliis præferendo. Fuere quippe eruditissimi omnes & Græcis Literis & Latinis , & scriptorum veterum literate periti. In typorum elegantia chartæque nitore paria cum illis faciunt *Junta* Veneti , *Lugdunenses Gryphii* , *Rovillii* , *Parisienses Cramosii* , *Leidenenses*
El-

Elzevirii & Hackii, Noribergenses *Enteri*, *Stella* Luneburgenses, ut alios quam plures omittam, qui illustrem artem exornarunt, quorum ea propter præla immortalitate donantur. Typorum varietate incredibili & elegantia oculos legentium oblectant, & ad amorem Librorum alliciunt, chartæ Regiæ & subtilis & candidæ nitore veterum nonnullorum crassa folia emendant, quibus *Decretalium Libri*, *Avicenna* Commentatores & alii cum typorum barbarie & ruditate coluctantes arcent Lectores, manusque fatigant. Membranæ enim usus apud Typographos, tanquam minus commodus, obsolevit, in Manuscriptis olim profusæ, nisi quod in Bibliotheca hac publica, dono divi *Christiani IV. Biblia Germanica Lutheri* in pergameno impressa monstrentur. Magnifico Operi nunquam satis digna forma aptatur. *Homeri* Opera Draconis intestinis inauratis inscripta veterum quidam memorant. Sed Sacrosancta *Biblia* omnem mortalium Majestatem superant & ornatum, cordibus nostris inscribi dignissima. Formam aliorum Librorum seu magnitudinem, materiæ ubertas, conditio Auctorum & Librariorum, & usus particularis determinat. Vastam paginarum extensionem *Geographicæ Tabulæ* in

At-

Atlantibus vulgo dictis exigunt. Qua formæ amplitudine nos *Anatomen Augustam* olim exorsi eramus. Majoribus Voluminibus, seu folio majori, *Lecturæ Nicolai Abbatis* super Decretalium Libros, *Decreta Gratiani* cum apparatu *Bartholomæi Brixienfis*, *Ptolomæi* *Geographia*, aliaque quarto decimo seculo impressa in veteri nostra Bibliotheca servantur. Hortus *Eichstadiensis* ad magnitudinem Plantarum se aecommodat. Nuperis annis melioris farinæ Auctores Latini & Novum Testamentum amplissima forma, characteribus Regiis & charta augusta ex Typographia Regia Parisiis prodierunt, alii-que exinde Libri tanquam ex Equo Trojano emerferunt, de Regis sui magnitudine testantes, quibus nihil ad splendorem deest. Alii intra mediocritatem se continent. Plures minutis formis se legi volunt. Pompæ, oculis lippientibus, & Bibliothecarum ornatui inserviunt magnificæ editiones. Senilibus oculis Matrona Nobilissima *Helena Marswiin* Psalterium Danicum grandi characterè in folio excudi curavit. Et pro *Vidua Serenissima Holsatiæ Ducis* Biblia Germanica duobus Tomis majoribusque literis *Olearius* nuper ex Officina Sleswicensi procuravit. Minimæ editiones discentium captui aptantur, portatili

tatili forma expetitæ. Sic in sylva proceræ & annosæ quercus protenduntur, frutices germinant mediocri altitudine, & humiles plantæ terram lambunt. Singulorum necessitatem usus varius expendit. Hic fructus ex proceris arboribus carpit, alius baccas ex repentibus humi furculis colligit. Magnatibus divitique penu instructis pomposus ille vastorum Voluminum thesaurus convenit, tenuiori sorti exigua reservantur, quæ minus & ornatus habent & sumptus. Quacunque forma & specie incedant Musæ nostræ, frigori tamen externisque injuriis haudquam exponuntur, sed habitu decenti ornata in publicum procedunt, pro cujusque facultate. Ut apertius sine ænigmate loquar, involucro teguntur Libri, magno splendidoque magni, parvo sed sufficienti necessarioque parvi, toga ita cujusque corpori aptata, ut & pes & caput uni formæ respondeat. Alius veterum in Libris erat cultus, alium nostri postulant, quia nostra Librorum forma ab antiquorum voluminibus differt. Romanorum libri uno expanso folio constabant in Cylindri formam circumvoluto, unde Volumen dictum, intra bacillos plerumque duos instar fasciarum, vel cornua, quæ etiam ornatus gratia in umbilicis seu mediis voluminibus

minum bacillis varie pictis addebantur. Cum volumen convolutum iterum Lectoribus explicabatur, patebat & explicitum erat, unde in antiquis Manuscriptis servata veteri formula *explicit* reperitur, pro fine Libri. Voluminis membranei exemplum in Bibliotheca nostra extat, imitanturque Belgæ in mappis, quas circa bacillos volvunt revolvuntque. Has extremitates, frontes vocatas, Romani pumice poliebant. Aliam præterea librorum formam invenio per tabellas complicatis vel concisis membranis. Hanc massam multiplici tabella structam vocat *Martialis*, ubi de *Nasonis* Metamorphosi in membranis scripta loquitur, quarum tabellarum prima vultum Auctoris gerebat, quod de *Virgilio* in membranis idem *Bilbilicus* testatur. Membraneo tegumento ex involuebantur, variis coloribus ornato pro Auctorum statu & conditione, vel nigro, vel rubro & miniatio, vel purpura seu murice. Pumice etiam has membranas lævigabant, ut essent manibus tractantibus benigniores, & cedro seu oleo è cedri arbore expresso chartas notabant, ut a vermibus præservarentur. Tandem in fine Librorum Coronidem appingebant, quam ideo in longo libro seram appellat *Epigrammatographus*, aliis pro lunula,

la , seu cornibus Voluminum habitam. Quicquid sit vel Tabellæ membranaceæ pugillarium speciem sectæ æmulabantur , vel foliis laminatim complicatis constabant , quali forma complicatas membranas Runicas in Musæo curiosis exhibere possum. Quos posteriora secula Bibliothecis Europæ Libros concredidere , sectis ex ligno tabellis , pelle involutis & bullis ferreis cupreisque munitis tectos videmus , minimo ornatu sapientiam multorum seculorum involvente & regente. At crescentibus per typos arte typographica Libris , crevit & ornatus , crevit luxus , ut vestium ita librorum. Et ne desit hic pompa , auro involucra foliaque incrustantur , bullæ fibulæque aureæ & argentæ affiguntur , & pellium vices sericum supplet. Neglectus fuit magnificus Librorum cultus , cum nudi asseres tegendis iis sufficerent , mox superinductæ pelles porcinæ , deinde vitulinæ & agninæ , tum coria Cordubensia , & demum variegatæ membranæ. Charta grossa Itali contenti adhuc sunt , quam ligaturam alla rustica vocant , usibus Lectorum sufficientem , licet , nisi subtili manu tractetur , ætatem longam haud ferat. Sub sordido palliolo sæpe sapientia latet , & splendida scientia sub vili Librorum tegmine. Indul-

gere possumus in his cultui, modo non excedat modum. Sæpe enim vestis ipso corpore pretiosior, & parcius libros volvimus, si à macula contrectantium manuum deformitas nitidissimis Libris metuatur. Non negamus interim pulchro habitu plerosque invitari ad amplexus Deæ formosæ. Me tacente, quivis ex vestitu specioso libri pretium pensabit & pulchritudinem, sed majori Voluminis aperti & interni cultus desiderio flagrare convenit. *Homerum* in nuce ille quondam inclusit, qui tantum virum nolebat inornatum. Non igitur omnem ornatum removemus, sed elegantem & mundum laudamus, qui ad interni corporis amorem nos pelliceat. Ego ad illa me revocabo, ne nimia in minutiis curiositate & rerum cortice, pulcherrimum fructum, intus delitescentem, sapientiæ cupidis videar longis ambagibus invidere. De modico non esse curandum Juris periti docent, levius enim esse damnum, si de mille fabæ modiis negligamus unam.

TH. BARTHOLINI

DISSERTATIO V.

De

D E

LEGENDIS LIBRIS.

*De interna Materia Librorum , quæ
 vel sola est unius generis vel mixta.
 Titulos sæpe fallere. Invidia multo-
 rum. Historicorum differentia. An-
 tiquariorum studium singulare. Phi-
 lologorum , imprimis Salmasii , li-
 bertas in transgressionibus. Dam-
 nanda adducta multa. Variæ eru-
 ditionis Scriptores varii. De Libris
 amœnioribus tolerandis , sed obscænis
 inutilibus fugiendis. De D E O ubi-
 que scribendum. Forma Librorum
 interna explicatur. Methodus Phi-
 losophis adstricta , Philologis libera,
 pro cujusque genio & polyhistoria.
 Verbis propriis & æqualibus quo-
 modo*

*modo res ornandæ. Mediocritas
laudatur. Barbaries in eruditis to-
leranda, sed ornatus decens præfe-
rendus.*

AD interiorem Librorum usum Vos
manuducturus, ne sine ordine pro-
cedat oratio, materiam contentam
considerabo, formam & modum
cum fructu legendi ea quæ Libris continen-
tur. Materia vel una est, vel varia. Utra-
que vel sacra vel profana, hæc seria vel lu-
dicra. Quibus capitibus complecti me posse
videor, quicquid de contentis librorum dici
meretur. In forma methodus expendenda,
& verba quibus res ornantur. Modus le-
gendi vel Generalis est ad omnes Libros
spectans, quales nempe legendi & quo ordi-
ne, à quibus, quando, quomodo & judicio;
vel specialis pro cujusvis instituto, studio-
rum genere, & Librorum seu Manuscripto-
rum seu Impressorum varietate. Amplius de
his mihi dicendi campus panditur, per quem
passibus exiguis decurram, ut largioribus vos
eum, qui ad legendum animos contulistis,
emetiamini. Brevis idcirco ero ego, ne
vobis uberior legendi materia præripiatur,
itinera.

itineraria ipsa demonstraturus, non ut ipse sim Dux in singulis, quod & infinitum est & non necessarium, sed ut commonstrem tantum viam, &, ut fieri solet, digitum ad fontes intendam. In his mihi pro laude erit negligentia diligens, dum vobis magnæ fertilitatis opus panditur.

Inspecto libro quocunque, qui ad legendum forte offertur, vel studiose quæritur, de materia statim solliciti simus, quam sibi Auctor sumsit pertractandam, videndumque est cursoriis oculis, an uni ita inhæreat susceptæ materiæ calamus, ut id solum agat, quod promittit, & rerum dicendarum copia exquirat: vel si perfunctorie, alienis ab instituto admixtis, versetur in proposito argumento & libri fronte promisso. Sæpe enim tituli nos fallunt ex fulgore apparente in fumum resoluti, adeo fucata specie prodeunt volumina multorum, ut cum castam virginem quæras, meretricem invenias. Cumque dignum aliquid expectas quod

Tanto ferat hic promissor hiatu!

Parturiant montes nascatur ridiculus mus.

Vitium hoc vel invidia parit, vel ignorantia. Illa tegit quæ promittit, & spe vana cre-

credulos lactat. Hæc humeris suis vana temeritate plus fudit, quam sint ferendo, & ut se in Doctorum classem intrudat, sibi minus convenientia aggreditur, medioque itinere virium impotentia deficiens Lectorem destituit ad solidam sufficientemque argumenti explicationem arrectis auribus plenoque discendi impetu accedentem. Sed vere *Naso*:

Quod parum novit nemo docere potest.

Vires suas quemque metiri decet, & si curta domi est supellex, rectius & famæ suæ Auctor & Lectorum expectationi consulat, si prius discat præclara, quam doceat mutila. Hi misericordiam merentur, illi bonorum indignationem, qui mala invidia supprimunt quæ propalare fas esset. Quo vitio laborant plerique Chemicorum Libri, in quibus multum fumi parum ignis. Quos ea propter cum tædio & imprecatione aggredimur, aurum sperantes, revera vix lutum lectis iis referentes. Rectius domi libros suos servarent, volatili Mercurio consecrandos, ne tempus legentibus verba suffurarentur. Culpæ huic affines alii amplo Commentario de secretis agunt, sed ubi ad rem ventum est propalandam, muti magis sunt quam pisces, vel sibi arcana reservantes, vel aliam occasionem

sionem commodiorem, ad Calendas Græcas scilicet, captaturi. His illisque pervolutandis opera & oleum perditur, utilioribus impendendum. Præstat sane nihil legere, quam umbras rerum venari. Satius est nihil agere integris sensibus, quam frustra agendo sensus debilitare. Sunt utiliora alia quibus ocium nostrum partimur. Sunt quippe Doctores, qui materiam suis viribus æquam sine invidia expromunt, & lectores cupidos vera voluptate doctrinæ satiant. Hi quando ingenii & eruditionis suæ censum uni argumento excolendo impendunt, non dubium est, quin clarissima rebus lux accedat, Lectoresque navatæ operæ pretium haud pœnitendum referant. Nolo per exempla ire, ubivis obvia. Historicorum natio sola rem confessam illustrat, quorum alii universalem rerum à mundo condito vel Christo nato gestarum narrationem susceperunt, alii singularum vel gentium, vel personarum, vel bellorum historiam contexuerunt. Et his & illis sua laurea debetur, sed Lectori ad particularum nationis cujuscvis, vel Principis, vel belli cognitionem suspiranti, hi magis satisficient, qui dato studio singula & fideliter & veris narrationibus Archivis Principum & Annalibus propriis deprompta tradiderunt. Sic Judæorum

historiam Sacer Codex & *Josephus*, Romanam, *Livius*, Græcam *Herodotus*, *Xenophon*, Danicam *Saxo*, *Huitfeldius*, *Pontanus*, Gallicam *Thuanus*, Hispanicam *Mariana* & *Curiata*, Polonicam *Cromerus*, Anglicam *Cambdenus* optime descripserunt. Bello Peloponesiaco *Thucydides*, Trojano *Dictis*, Civili Romanorum *Julius Caesar*, Gallico *Davila*, Jugurthino *Salustius*, Dithmarsico *Cilicius*, Belgico *Strada*, Pharsalico *Lucanus*, Obsidioni Grollæ *Grotius*, Sylvæducis *Heinsius*, Bredanæ *Hugo* & *Boxhornius*, unice incubuerunt. Alexandro Magno *Arrianus* & *Curtius*, Carolo Magno *Eginartus*, Ludovico XI. & Carolo VIII. Galliæ Regibus *Cominaus*, Christiano III. *Stephanus*, Comnenis *Cinnamus*, Pisauris *Crassus* Venetus, Alphonso *Facius*, Ty-choni Brahæo *Gassendus*, Tamerlano *Anonymus* per *Erpenium* editus, integram pennam laude integra commodarunt. Nolo velut explorator ulterius in Martio Campo progredi, ne ab insidiis comprehendar, in quo tamen Antiquarii mihi amici cum olea occurrunt, aurem vellicantes, quia proximum ab Historicis in Parnasso locum, vel habent, vel plurimorum suffragio merentur. Sunt ex iis qui universas Romanorum Antiquitates uno systemate includant, per compendium de Magistratibus, Legibus, Militia,

Ri-

Ritibus differentes, quorum agmen *Rosinus* ejusque Glossator *Dempsterus* ducit, alii singulos titulos accuratius propriis voluminibus dicarunt. Ita de Magistratibus Romanorum *Sigonius* & *Fenestella*, de Amphitheatro *Lipsius*, de militia Rom. *idem* & *Salmasius*, de Arte Gymnastica *Mercurialis*, *Ciacconius* de Triclinio, de Vasculis *Baysius*, de luxu *Meursius*, *Pignorius* de servis, de Annulis & Funeribus *Kirchmannus*, *Rhodius* de Acia, *Ferrarius* de Re Vestiaria, de Pænula *B. Bartholinus* frater, de statuis *Figrelus*, de Re navali & vehiculari *Schefferus*, de Triremibus *M. Meibomius*, *Sagittarius* de Januis, *C. Bartholinus* filius meus de Inauribus, & sic alii ita uni argumento excolendo desudarunt, ut nihil intactum reliquerint, nec ulli post accuratam messem spicilegium. Possem per omnium scientiarum libros vagari & in argumenti perfecti probationem multa afferre vel *Fabii* eloquentiam lassatura, sed aliquid Lectorum studio relinquendum. Post hæc tamen in exemplorum enumeratione partiri conabor pensum inter scriptores, quos in scenam simul producere non vacat. Quanquam autem unius tantum materiæ laborem in se suscipiant eruditi Scriptores, in qua doctrinæ magni-

tudine versentur, non raro tamen extra semitam ingenii amplitudine exspatiantur, carceresque laxant. Est quippe illa *Platonis* vera vox a *Tullio* laudata, omnem doctrinam harum ingenuarum & humanarum artium uno quodam societatis vinculo contineri. Ubi enim perspecta vis est rationis ejus, qua causæ rerum & exitus cognoscuntur, mirus quidam omnium quasi consensus doctrinarum concentusque reperitur. Hinc capaces rerum plurimarum, ad illustrandam materiam, quam principe instituto examinant, alia præterea conferunt quæ proprie eo spectare non videntur. Magna sui fiducia jactat *Apulejus*, se universas Philosophiæ crateras bibisse, canere *Empedoclem* carmina, *Platonem* dialogos, *Socratem* hymnos, *Epicharmum* modos, *Xenophontem* historias, *Xenophanem* Satyras, se omnia hæc, novemque Musas pari studio coluisse. Majori veritate de *Cl. Salmasio* Polyhistore magnifice loquor, cujus sæpe memoriam, quia recens, libens recolo, de quo præceptore & amico semper mihi impense sum gratulatus. Cum omnium scientiarum & literarum Encyclopædiam animo vasto complexus esset, temperare pennam nunquam potuit, quin ad varias dilaberetur ambages, licet unius argumenti metam sibi pro-

proposuisset. Testes, præter alios, sunt Libri de Usuris, in quibus vel data vel arrepta occasione, plurimas Criticas & Sacras Controversias contra magnum Criticum & Sacrarum Exercitationum Auctorem *Danielem Heinsum* docto sed aculeato sermone persequitur. In ultimo Volumine de Fœnore Trapezitico, quanquam se contra Theologum *Cloppenburgium* defendat, Magistratumque & Trapezitam tueatur, affirmando hunc non peccare dum Usuras sibi a Magistratu decretas accipit in exercenda mensa quam è publico conduxit, & sub 115. conditionibus de quibus in lege contractus Trapezita conductor & Magistratus locator inter se conveniunt: multa tamen quæ videntur ab instituto aliena, sed quæ Lectores scire expedit, nexu sermonis suscepti ita ferente inferit grata pariter & utili varietate. Cur nempe uxor Apostolo dicatur vas proprium. Quo ritu caput operiebant, qui vapulabant. De Episcopatus in veteri Ecclesiadignitate Quo sensu & qua veritate in synodo prima Hierosolymitana sanguis & suffocatum sint prohibita. De meretricia apud veteres professione. Quales milites Evangelium suos stipendio contentos vult, an præsidarios, ordinarios, an emeritos. Quod panis ἐπίσσιος, quem

quem in oratione Dominica nobis precamur, sit *Christus*, ideoque textum latine ita vertendum: Panem illum nostrum, qui venturus est, da nobis hodie. Et alia infinita ex penu immenso variæ eruditionis deprompta. Male quidem hac calami profluentis fœcunditate, apud non nullos audit parsimonix studiosos, contra quorum censuras se tutatur illorum exemplo qui Varias Observationes & Lectiones ediderunt nemine improbante. Nec ab hac μεταβάσει εἰς ἀλλογένην, ut Græci loquuntur, immunes sunt Veterum plurimi, etiam in Historiarum serie occupati. Certe ægerrime Viator manum temperat, quin ab itinere subinde deflectens elegantissimos flosculos extra semitam carpat, forte obuios. *Livius* l. IX. transgreditur ad Historiam Alexandri Magni, sed, quia ab instituto aliena, veniam præfatus. Nigro autem Obelisco digni sunt, qui indocta inutiliaque ἀλλώτεια scriptis suis immiscent, ridicula, obscœna, trivialia, quibus rhapsodiis volumina mole increpescant, sed pretio apud eruditos severosque temporis exactores immi-
nuantur. Consultius illi cum Albutio Rhetore, de omni causa scriberent non quæ debebant, sed quæ poterant. Saluberrimum est monitum *Flacci Lyrici*, ne humano capiti cervix equina jungatur, ne cum placidis coëant immitia, neque ut.

Serpentes avibus gementur, Tygribus agni.

Variam illi materiam certe consilio eligunt, qui suas tantum observationes & sparsas in Collectaneis animadversiones in fasciculum compingunt, nulli vel Auctori certo illustrando vel argumento pleno astricti. Non male illi Lectorum desiderio consulunt & typorum labori, cum una alterave observatione nova, integros libros corrasis undique auxiliis non impleant. Inter sacros veteres non pauci hoc nomine celebrantur *Photius*, *Theodoreus*, *Isidorus Pelusiota*, *Anastasius*, *Sidonius Apollinaris*, *Cassiodorus*, *Bonifacius*, & alii, quorum vel miscellanea vel Epistolas varii argumenti habemus. Inter recentiores eminent *Aeneas Sylvius*, *de la Cerda*, *Novarinus*, *Strigelius*, *Camerarius*, *Rittershusius*, *Festelius*, *Fullerus*, *Capellus*, *Drusius*, *Voëtius*, *Jos. Arndius*, aliique numero plures; quibus Electa sacra, Hypomnemata, Schediasmata, Adversaria, Critica, Miscellanea, Sacrae Lectiones, Exercitationes & Disputationes mixtae debentur. Juris Consulti in hac varietate materiarum, sed ad Jus suum spectantium sibi placuerunt & publico. Magna illa nomina *Alciati*, *Cujacii*, *Pithaei*,
Au-

Augustini, Connani, Fabri, quis pro dignitate laudaverit, quorum Miscellanea Juris, Emendationes, Observationes omne tulerunt punctum. Ut immensa Consiliorum & Decisionum Volumina Jctorum sicco pede transeam. Medici nostri in hac palæstra se strenuè quoque diligentesque præbuerunt. Neque tantum Variis Auctoribus Medicis illustrandis operam suam condixerunt in Variis suis Lectionibus, ut *Mercurialis, Cagnatus, Hofmannus, Reinesius*, sed infinitis Libris Observationum Medicinalium, Historiarum, Consultationum, Epistolarum, Casuumque singularium rem Medicam auxerunt, quorum nomina, immortalitati sacra, recensere supersedeo. At Philologorum tanta est multitudo, ut angustiis unius Parnassi includi nequeant, qui in Auctoribus passim emendandis illustrandisque plurimum olei consumpserunt, veterum exemplis excitati, *Æliani, Gellii* aliorumque. Hinc natæ superiori seculo *Cælii Rhodigini, Calcagnini, Turnebi, Erasmi, Alexandri ab Alexandro, Mureti, Canteri, Nanni, Junii* lucubrationes multiscix in Adversariis, Variis Lectionibus & Epistolis, æterna nominis fama & Auctorum veterum luce impensæ. Quibus nostro seculo *Barthius, Gruterus, Scioppius,*
Ca.

Casaubonus, *Rutgerius*, *Rubeus*, *Modius*,
Swartius, *Gronovius*, *Cuperus* & alii bono
publico nati feliciter successerunt, quorum
de varia materia eruditionem inque vete-
rum Auctorum salute occupatam testantes
Libri omnium manibus teruntur. In sacris
& profanis hi illique sed feriis occupati pu-
blicum eruditi orbis applausum obtinuerunt.
Impar est illorum studium, qui ad res ludi-
cras scribendas se contulerunt. Scilicet varia
hominum ingenia vel ad severitatem vel
amœnitatem composita, vario quoque liquo-
re seu atro seu rubro calamos scriptorios im-
plent, hoc ut se aliosque grata varietate de-
lectent, illo ut cunctis sine joco prosint Ca-
tonis vultu. Captui Lectorum se accommo-
dant, quorum aliqui severa doctrina profi-
ciunt, aliqui crustulis blandis elementa
discunt. Sunt vero in varia differentia lu-
dicrorum libri. Vel amœni, vel obscœni,
vel inutiles. Amœni, vel ingenio exer-
cendo idonei, vel linguæ excolendæ, vel
reficiendis sensibus. Ingenio abutuntur
scholastici scriptores, Scotique affectæ in
Entibus Transscendentalibus miras tricas
nectentes, araneis haud absimiles, ut *Nau-*
dæus jocabatur, quæ telas quasdam nectunt

tenuitate quidem fili operisque subtilitate admirabiles, verum quæ sunt prorsus inanes, & sapientum cachinnis & ludibrio expositæ. Eruditionem ostentant qui de Nihilo doctè commentantur. Milesiorum Scriptores veteres & recentiores linguarum studiosos exercent. Quo referenda dissertatio Italica severi alioquin Viri, *M. Aurelii Severini*, de particula Et, cujus querelam inducit quod unica litera mutiletur apud Italos. Sensibus inter his recreandis plures dicati, præsertim Epigrammatographi, Facetiarumque Auctores. Auribus Musici, oculis Pictores, manibus pugiles, pedibus Saltatores blandiuntur. Sed maximam amœniorum Librorum partem conficiunt mores hominum & seculorum per Satyras, Comœdias, Tragœdias castigandi & corrigendi. Hinc sub ignobili titulo Asini, Umbræ, Pediculi, Stultitiæ, mortalium desidiæ, vanitatem forditæ & arrogantiam taxarunt elegantissimi Auctores. Sunt ex hoc ordine qui per Emblemata jucunda Amantium vitia notent, Politicum statum emendent, Pietatem instillent, Naturam doceant. Inutili materiæ describendæ illi se applicant, qui artem discendi, amandi, volandi, potandi tradunt

dunt ocio suo abundantes. In quibusdam Doctore nullo indigemus, in aliis deludimur. Male etiam chartas commaculant, quæ de Hæreitate, Peditu ejusque variis speciebus & differentiis eructantur, typis indigna. Majori scandalo scribuntur obscœna quorundam argumenta, quam leguntur. Quod *Aretini* fuit studium ineptum in Libro figuris obscœnis defædato, aliorumque quibus tantum sepiæ superfuit, ut de Arte Meretricia paginas conspurcarent, Lectores inventuri non laudatores. Quanquam nullus liber tam sit malus, quin ex eo aliquid boni possit elici, sicut ex stercore Ennii aurum *Virgilius* dicitur eruisse. Ita postremi forsitan eo nomine se excusant, quod artes doceant fugiendas, non sequendas. Priores in sterilibus tardisque & impotentibus labenti vel torpenti naturæ succurrere existimantur. Quocunque autem fūco se adornent, cum Archilochi Libris e civitate exportandi essent, more Lacedæmoniorum, quia illorum parum verecunda ac pudica lectio juniorum moribus plus nocet, quam ingeniis prodest. Sic scripsit quoque *Petronius* res Nerone suo dignas, at ingenio, ut *Bussiæres* eleganter loquitur, Scipione digno, ut mo-

rum interfuerit, si nunquam scripisset, elegantia linguæ, si aliud. Obscœna enim quacunque dulcedine sermonis dicantur, mella tamen sunt venenum regentia, sicut *Lactantius* illa vocat. Magnus ille *Thomas Aquinas* tanti fecisse dicitur *Chrysostomum* super *Matthæum*, ut mallet illum quam civitatem *Parisiensem*. Ego *Thomas*, sed illo minor, si pro *Regia Clementia* mihi *Rex Galliaë Christianissimus* ex *florentissima urbe Parisiensi*, vel potius *Orbe*, vilissimum ejus lutum *Lutetianum* concederet, non permutarem istiusmodi lutulentis *Libris & obscœnis*. Sed omnium odia & execrationes merentur *Atheorum scripta*, quæ vel *DEUM* negant, vel in *DEUM* sunt injuria. Recte illa fumo flammisque traduntur, ut mundi interitum prævertant. Piæ Deoque dicatæque mentes pro materia *Librorum* principem *DEUM* eligunt, qui utramque paginam impleat. Et quanquam necessaria alia humanæque societati proficua argumenta a *JCtis*, *Medicis*, *Philosophis* & *Philologis* in manus sumantur expedienda, ubique tamen, quacunque occasione *DEUM* rebus suis immiscent, ne sine eo quicquam dicatur, vel gry inferatur. Hic omnium materiarum, quas *Libris* com-

pre-

prehendimus , principium erit & finis , ut Libris autoritas, Lectoribus utilitas, scriptoribus denique pio calamo instructis, conscientia facta maneat & illibata. Arabum scriptorum pia exordia laudamus , quorum librorum initium perpetuam inscriptionem hanc habet. In nomine DEI miseratoris misericordis. *Justinianus* Imperator ita quoque pie exorsus est Titulum 27. Codic. de Offic. Præf. Prætor. Africæ : In nomine Domin. nostri Jesu Christi. Et *Leo* Imperator Constit. 72. sancivit, ut omne pactum in quo ex divinis adjumentis aliquid idoneum insit , firmum solidumque robur habeat. Certe si toto opere filetur DEUS, sine cujus numine nihil præclare scribimus , minimum ab eo auspicemur scribendorum seriem , & in Sancto ejus nomine finiamus. Omnia post religionem ponenda semper Romana civitas duxit , etiam in quibus summæ Majestatis conspici decus voluit. Quapropter neque dubitemus nos sacris DEI nostri volumina scribenda servire , ita illarum rerum futuros successus existimantes , si Divinæ potentiæ & majestati bene atque constanter fuerint famulatæ. Hinc illud apud *Aratum* :
ἐν Διὸς ἀρχαῖς μεθεῖσα. Hunc pie imitatus *Maro* :

*Ab Jove Principium Musæ , Jovis omnia
plena :*

Ille colit terras , illi mea carmina curæ.

Proxima his cura ad internam Librorum formam vocat. Nam Mechanicos imitantur Auctores, ut subjectæ materiæ idoneam concinnamque formam inducant. Frustra sunt Sartores si ex panno selecto vestes informes consuant. Ludit operam Cocus & gulam convivarum defraudabit, nisi ex arte præparet Apiciana fercula. Artis suæ imperitiam prodit pictor, si elegantem vultum indignis coloribus deformet. Architectus calce, lapidibus, lignis damno possessoris abutitur, nisi ad leges mechanicas domum numeris suis absolutam construat. Par est de Libris ratio, quibus ad eruditorum palatum Lectorumque compendium faciendum conscribendis tum demum officio suo rite functus videbitur Auctor, cum convenienti artificio corpus extruxerit, dignumque habitum induxerit. Ne arena sit sine calce, ne chaos opus confundat, summa imis, cocta incoctis, bona malis misceantur providendum. Itaque ad materiam, quam sibi describendam sumpsit Auctor, ubi satis animum legendi di-

discendique amore inflammatum adverteris , prima exinde cura sit de methodo circumspicere , seu ordine in discursu servato , modo tractandi & quibus verbis per susceptum argumentum calamus decurrat. Methodus Analytica vel Synthetica quibus servanda , Philosophorum filii docent. Neque isti ordini tam arcte se emancipant scriptores , quin pro arbitrio hanc vel illam methodum deferant , & liberius subinde per materiæ campum exspatientur , serie illa servata quam fors obtulerit , vel memoria suggererit. Habent Oratores suas leges , habent Historici , habent Polemici , quibus vel propriam sententiam stabiliant , vel adversariorum destruunt , habent & suas Commentatores & Interpretes , singula scientiarum genera suas ; sed unicuique scriptori , pro vario genio , propria est & singularis ratio docendi loquendique , quam in singulis examinare in præsentem non licet suo loco temporique reservandam. Expendendus cujusvis scriptoris eruditi & famam adepti scribendi modus. Cum seculorum revolutionibus etiam hic varietatem invenias. Ratio scribendi jam exactior cultiorque , olim negligentior. Mutantur calami sicut pilei. Quod homines , tot vultus indiscreti , tot manuum sensuumque

suumque differentia. Suo quisque genio litat, suoque modo & docet & scribit. Hic longis ambagibus utitur, alius rei tractationem sine mora & circuitione aggreditur, iste longam Argumentorum seriem amat, ille per compendia incedit, laxat alius, alter constringit doctrinam, sententias meras loquitur tertius, dat sequens verba pro rebus, summa: quisque suæ Junoni blanditur. In Artibus docendis & scientiis tradendis Philosophorum accurata methodus observanda. At Polyhistores aliam sibi licentiam sumunt. Sine legibus Philosophorum vivunt, scribuntque, quorum imperia detrectant. Quia sine cura curiosa calami currentis ductum sequuntur, libere & sæpe sine ordine manifesto scribendi impetum effundunt. Quibus bis scribere inconsuetum, subita pennæ facilitate expromentes cogitata, methodi strictioris rigorem negligunt, stylumque velocissimum nunquam interrupta manu pergentem, vertere nesciunt. Cæterum qui tardo calamo vel decem annos cum *Isocrate* in Panegyrico elaborando consumunt, vel nonum in annum cum *Cinna* Smyrna premunt fœtus suos sæpiusque lambendo perficiunt, pumice edolatos, ordine commodo & decenti methodo expolitos in

lucem

lucem mittunt. Videtur quidem libertas illa Eruditorum & cursoria penna Polyhistorum imitabilis vulgo existimanti à numero eos esse vomentium, sicut Marco Imperatori respondit *Aristides*; sed nihil est experienti minus. Vastam enim scientiam prodit & promptam ad obsequium dictantis manum, quæ nec lassatur nec emendatur, sed diu meditata & cocta æternitati tradit, quanquam celeritati assueta, & uberrimo divitis ingenii penu sublevata, diu cum Zeuxe non pingat. Non quærunt enim Polyhistores operose rerum momenta quæ longo tempore robur acquirant, sed oblata referunt cum delectu, genio dictante sine modo & modio, nec in ordine scrupulosi locum quemcunque idoneum reputant, qui Lectores excitatos doceat. Rerum methodo cuicunque paria verba sociantur, quæ in Lectione Auctorum observanda sunt. Rebus vero illa se accommodant, ut humilia trivialibus exprimantur, sublimia ad rerum sublimium altitudinem assurgant. Ibi humi serpunt verba, hic cothurnis incedunt. Oratorum imprimis & Poëtarum certantia in his studia cernimus, ut rerum dicenda-

Q

rum

rum majestati paria verba aptentur. Nam magnæ Numina Romæ, non ita cantari debent, ut ovile Menalcæ. Et propria requiruntur, ut, *Flacco* dictante.

*Sit Medea ferox, invictaque, flebilis Ino,
Perfidus Ixion. Fo vaga. Tristis Orestes.*

Æqualia quoque, ut sibi constent ubique, ferventurque ad extremum Operis, qualia ab incepto processerant. Operi prolixo copiosa verba destinantur, paucioribus parva rerum supellex ornatur. Cavendum tamen ne brevitate sensus Auctorum abscondatur. Quo vitio non pauci laborant. De Alcibiade, Critia, Therameno conqueritur *Tullius*, quod grandes verbis, crebri sententiis, compressione rerum breves, interdum ob eam ipsam causam subobscuri fuerint. Hinc, ne vel brevitatis rerum ubertati explicandæ officiat, vel prolixus sermo legentium animos obtundat tædioque deterreat, mediocritatem laudamus cum perspicuitate, mixtamque hanc gloriam in scriptoribus commendamus. Loquendum quippe scribendumque ut intelligamur, ne illius indignatione, abjecto libro obscuro, dicatur : Si non vis intelligi, neque

que debes legi. *Socrates* olim modestius sed acute respondit, cum obscurum *Heracleti* librum legisset: Quæ intellexi, inquit, proba sunt, credo & quæ non intellexi. *Fabii Quintiliani* de *Lucretio* judicium contemnendum hoc loco non est, quem cum *Macro* comparans, legendum quidem utrumque concedit, sed non ut phrasin id est corpus eloquentiæ faciant, elegantes quosque in sua materia, sed alterum humilem, alterum esse difficilem. Certe eloquentiam & dicendi ornatum, sermonisque puritatem à Grammaticis exigimus, sed reliquarum artium doctoribus indulgendum, quod argumentorum pondera non tam verbis elegantibus expendant, quam rerum claritate, contenti docere non declamare. Ornatus purusque sermo Auctorem commendat, & flosculis suis Lectorem invitat, sed doctus fatiat animum ad graviora rerum momenta erectum. Sic sine magno famæ detrimento verbis barbaris *Lyra* utiles in sacrosanctos libros notas congeffit, *Accursius* in jus Justinianæum, & alii Jcti commentarios ediderunt à *Zasio* ad Censuram vocati, qui sermonis proprietatem negligentes rem ipsam spectarunt. *Hugo Senensis*, *Gentilis de Fulgineo* & alii Medici,

opere non verbis æstimandi. *Avicenna* interpretationem & artis Medicæ dogmata rudi & impolito stilo pro temporum illorum ratione prodiderunt. Nec tersior in Philosophia *Scotus*. Scilicet vere *Cardanus*, illum quoque sapere æstimat, qui rudis linguarum ac barbarus, rectæ tamen multa nobis tradidit non solum in Philosophia, sed & in arte Medica. Et puerilem angustique pectoris reprehensionem putat *Arnobius*, barbarismis, solæcismisque obsitas esse res nostras. Rara vero seculi ingeniique felicitate utrumque quidam pari laude præstiterunt, ut res serias decenti verborum pompa persequerentur. Quo encomio digni inter veteres Theologos græcos *Chrysosthomus*, inter Latinos *Augustinus*, *Tertullianus*, *Lactantius*, *Arnobius*, *Minutius*, inter recentiores *Flaminius*, *Castalio*, *Petavius*, *Brochmannus* noster : Ex JCtis *Cujacius*, *Hottomannus*, *Gifanius*, *Faber*; ex Medicis Græcis *Galenus*, ex Latinis *Celsus*, *Plinius*, *Aurelianus*, inter novitios *Fernelius*, *Biso*, *Hofmannus*, *Tulpus*, *Veslingius*, aliique quorum arduæ res æquis, & cum *Tullio* vel *Nepote* pari elegantia fluentibus verbis expromuntur. Ornatissima hæc sapientiæ utriusque mixtura non potest non
Le-

Lectoribus grata esse & utilis, cum altius
animo inhæreant quæ tanta suavitate addis-
cuntur, sicut palato gratiores cibi sunt, quos
& perita coci manus & dulcissima condimenta
ex arte commendant.



T H. BARTHOLINI

DISSERTATIO VI.

D E

LEGENDIS LIBRIS.

De modo legendi, senioribus junioribusque servando. Fœminæ an & quid legere debeant. Principum & Mechanicarum Artium Libri evolvendi. Quinam omnes Libros legunt. Pagani caute lectitandi. Nullum tempus lectioni eximitur, sed cavenda nox, cœna & nimia assiduitas. Interrupta studia probantur. Intemperantiæ damna. Magna volumina quomodo explicanda. An multos Libros habere conveniat. Memoriae subsidia varia, imprimis Repetitio. De arte Mnemonica quid statuendum. Tabularum usus. Excerpendi modus. Loci communes ex
com-

compendiis. Judicium utilitas, Rerum, Verborum, Caputum, Auctorum. Registrum quid. Vett. Libri sine distinctione Caputum, & Versuum. Κεφάλαια N. T. olim diversa. Κεφαλῆς explicatur. Auctorum Chronotaxis. De Lexicis Facultatum singularum. Indicium generalium varius ordo.

DUcit nos cœptæ orationis filum ad pulcherrimum modum legendi Auctorum Opera, quæ hætenus a materiæ splendore & methodi præstantia ornatuque deprædicavimus. Ad hanc metam collinearunt pleraque quibus dicendis nos defatigavimus, quam prope prospicientes, tanto alacrius in stadio decurremus, quanto nobilior corona emenso cursu, rerum nempe utilissimarum fructus nos expectat. Auspicato cœpimus arenam ingredi, de felici progressu nihil dubitantes. Adscribimus veteri formula, Bonum factum, plenisliteris, non notis, ut ab omnibus, qui nobiscum ad metam propositam properant, intelligamur. In universum, si ad eos mentem dirigamus, quos cum fructu ad Librorum lectionem in-

vitam, nullo discrimine omnis ætatis, sexus & conditionis Lectores operæ suæ facturos pretium existimandum, si huc temporis oleique particulam contulerint. Juniores ut discant, senes ut memoriam recolant. Illi honesta à turpibus discernent, imperabunt voluptatibus, sapientiæ studebunt, eruditionem sectabuntur, de prospero rerum successu certi. Hi cum Solone senescunt multa indies addiscentes : Utrique lectis Philosophorum veterum Libris, tranquillitatem mentis, animi moderationem, in utraque fortuna constantiam referent. Senectuti sane nihil jucundius lectione, nihil ex hac vita migraturæ utilius. His studiis in præterita tempora revertitur, Senatam, Aulam, Scholas, instituta moresque & labores examinat, seque ad placidam mortem, & immortalitatis, quæ sequitur, possessionem instruet. Senectutis commoda ex *Tullio* discet, privilegia ex *Joh. de Monte Leone*, medicinam languentibus senio membris ex *Davide de Pomis*, *Anselmo* & *Ranchino* hauriet, mortis contemptum ex *Heinsio*, artem bene moriendi ex *Bibliis*, *Bellarmino* Theologo, *Beustio* Jcto & *Sennerto* Medico ruminabit. Nunquam enim ullum sapientem coëgit in suis studiis, etiam extremis, obmutescere

senectus. Philosophi istius curiosus fertur ad extremum spiritum provectus discendi multa ardor, cum vicinus fato libri lectione delectaretur, ut ante abitum, etiam ista sciret, similis Leontino Georgiæ, qui centum & septem annos complens, nunquam in suo studio atque opera cessavit. *Anselmum* Cantuariensem Archiepiscopum, cum 76. ætatis anno mortui esset vicinus, dixisse referunt, optare se adhuc modicum temporis, ut quæstionem obscurissimam de Origine animæ, quam cœperat, absolveret. Valde dubito, si vel totidem annos, quot vixerat, illi addidisset DEUS vitæ arbiter, an ad finem quæstionis dubiæ unquam potuerit pervenire. Junioribus præcepta non dabo, quos meliorum Librorum amor ad sapientiæ maturæ aditæ perducet, famæ inferet, virtuti conciliabit, ad Senectutis auctoritatem promovebit, rerum omnium, sed animo possidendarum, possessione ditabit. Nec sequior sexus a boni hujus participatione excluditur. Disciplina feminas esse capaces Libro singulari & proprio exemplo probavit Nobilissima *Schurmanna*. Non desunt nobis domestica exempla *Belowiæ* & *Tottiæ*, quæ libris erudite volitandis ætate consumpta se supra sexus sui conditionem extulerunt, ut aliarum gentium

tium Heroínas doctissimas propriis Annalibus relinquam. Nulla sane meliori arte sexus imbecillitatem emendant, quam animum mollem sapientum præceptis roborando, nulla ratione commodiori voluptatibus, ad quas infelicitas sexus plerasque damnavit, fræna injiciunt, quam negotiis serioribus & recto, ex libris petito, mentis usu, ut quemadmodum *Sophocles* in confecta ætate, sic illæ, quod gloriosius, in florente, literarum cultu à libidinibus libenter profectæ, sicut à Domino agresti ac furioso, profugiant. Sic amore *Palladis*, non *Cupidinis* aut *Paridis* inflammata, elegantissimam corporis formam, pulcherrimo animi masculi & sapientis cultu illustriorem & Deabus comparandam efficiunt. Non arrogabo mihi licentiam libros legendos feminis commendandi, quos cujusque genius aperiet. Ex sacra tamen *Judithi* & *Estheri* Historia ad fortitudinem & animi submissionem incitabuntur, cum pusillanimitate & fastu, contrario inter se vitio, optimas plerumque animas & innocentes corrumpant. Ex Cantico *Salomonis* pulchritudinis suæ notas expressas ipsæ admirabuntur, duce *Ernesto Vanio*. Tertulliani liber elegans de Virginitatibus velandis, frustra ab illis inspicitur, quæ

quæ alieno capillo comisque apposititiis frontem, animi indicem, splendide vel tegunt, vel ornant, velut corona Martyrum, seu potius galericulis sutilibus, formam, ut ille loquitur, annosve impunè mentientibus. Nec *Andr. Schröderum* de Platonis Saltationibus operose legendum censeo, quia ex se pedes agiles docilesque ad novas choreas excitantur. *Weckerianæ* mulieris artem Coquinariam negligere possunt, quod eo labore à peregrinis cocis sublevantur. *Georgium* tamen *Vivienum* de officio probæ matrisfamilias commendarem, si tantillum temporis a negotiis domesticis suffurari vellent. Impudens vero *Anonymi* istius scriptum, qui mulieres non esse homines probare sustinuit, summa in nitidissimam creaturam injuria, legere serio velim, ut contemnant & supra humanam conditionem, si homines non sunt, virtute surgant. Et ut propriæ valetudinis cura tangantur, ne pereat vel labem contrahat tot injuriis naturæ expositus sexus suavissimus, Morborum Muliebrium scriptores adeant, qui vel internam medicinam præscribunt, *Hippocrates*, *Mercurialis*, *Castrensis*, *Warandæus*, *Primerosius*, vel externi vultus pulchritudini consulunt & pilorum ornatui, ut *Cosmetici* per fucum, purpuram,

132 *Th. Bartholini Dissert. VI.*
pulveres odoratos Cyprios sexui blandientes. Scilicet

Nec tamen indignum, si vobis cura placendi :

Cum comptos habeant secula nostra viros.

In quam rem *Ovidius* pervolvendus Libro de medicamine faciei. *Erotin* pen-
omississem, vulgo *Trotulam*, qui licet mul-
lier non fuerit, nec, ut alii censent, *Eros*
Augustæ Medicus, sed *Salernitanus Doctor*,
de Mulierum tamen morbis à mulieribus fa-
nitatis studiosis legi meretur. Obstetrices
ad lectionem *Scipionis Mercurii & Burgesia*
vocare frustranei laboris est, cum Sectioni-
bus Anatomicis publice in Theatro nostro
administratis adesse, vel negotiis impediri se-
causarentur, vel rustica arrogantia. Neuti-
quam interim tam rigidi sexus delicati Cen-
sores sumus, ut invidemus pudicis oculis
& castis manibus amœniora librorum diver-
ticula vel ex Historiis, quæ omnium fere
gentium linguis leguntur, vel ex *Amadisii*,
Astrææ aliorumque Milesiis scriptoribus pe-
tenda. His quippe legendis occupatæ &
animum curis domesticis lassum recreant, &
de publicis maritorum negotiis minus erunt
sol-

Sollicitæ. Poëtarum imprimis, Emblematumque jucunda varietate captæ, pro lubitu, quæ linguæ Belgicæ peritiam habent, *Jac. Catzii* operibus invigilent, carmine facillimo & dulce fluenti palmam in hoc genere meriti, ubi Virginum, Matronarum & Viduarum status graphice depingitur. Si scribendi solertia gaudeant, sequantur *Teclæ* nobilem apud Ægyptios feminam, quæ Biblia eleganter sua manu descripsit, adhuc in Angliæ Bibliothecis servata. Principes quique in præsidiis Reipublicæ collocantur, lectis veterum monumentis, quibus regendi præcepta continentur, discent

Parcere subjectis & debellare superbos.

Incunabula Principum informabit *Xenophonis* Pædia Cyri, perficient *Palæologi* præcepta educationis Regiæ, & *Belisarii Aquavivi* Libri de Principum Liberis educandis. *Platonis* Respublica & *Mori* Utopia ad perfectum Reipublicæ statum in idea ducet. Princeps ex *Tacito* informatus reliquisque Romanæ Historiæ aliarumque gentium scriptoribus, discet clementiam & justitiam, regni fulcra, publicamque rem prudenti consilio administrandam, & imperii decus

privatis voluptatibus & affectibus præferre. Si minorum gentium Auctores infra Majestatem despiciunt, eligantur dignitate vel superiores, ut *DEI* monumenta, exemplo *Alphonfi* sapientis, qui quater decies Biblia cum Commentariis legit, vel æquales, *Proverbia Regis Salomonis* & sapientiam, *Justiniani* Imperatoris Codicem, *Julii Caesaris* Commentaria, *Historicos Byzantinos*, & hujus census alia à summis Terrarum Dominis scripta & in Bibliothecis recondita non dedignabuntur admittere. Subjecti superiorum Potestatum, quocunque nomine veniant, invenient in Libris quæ & doctos eos reddant & fortunatos. Nolo singulos Libros Eruditis legendos per partes recensere, quia diverso studiorum genere calamus impeditur. Idque alterius est loci. Ab ingenuis artibus qui separantur, Librorum usu carere non possunt. Musici Musicos veteres habent à *M. Meibomio* editos, in quibus ingenium vocemque exerceant ad ravim usque. Taceo tot Musicorum lineis notisque signata volumina, quæ vel plaustra integra impleant, quorum rationem ex intima eruditione in *Logistica Harmonica* persequitur *Joh. Corvinus* noster, & in *Musurgia Kircherus*. Pictores artis suæ principia antiqui-

tatemque

tatemque omnem ex *Junii & Schefferi* de pictura hauriunt, & Pictorum vitas a *Carola van Mander*, nostri Avo Belgicè, a *Carola Dati* nuper Italice descriptas inspiciunt. Colores ex *Portio & Thylesio*. Cælatoribus scriptus est liber *A Basse* Gallicus de modo per aquam fortem æs incidendi. Gladiatores *Johannem Wilhelmum* nostrum sequuntur, aliosque qui arma in Libris tractarunt, inter quos *Franciscus Alfieri* Patavinus, Libro quem la Bandiera inscripsit. Quibus lucem ab antiquitate fœnerantur, *Lipsius*, *Mercurialis*, *Faber*. Architecti *Vitruvium* venerantur. Statuarii doctissimum *Bulengeri* opus de Pictura, plastice & statuaria consulant, *Florianum Dulphum* de Sepulturis, Capellis & statuis, *Figrelium* de statuis Romanorum, *Joannem Blum* de Columnarum Symmetria. Mercatoribus ex usu erit evolvisse *JCtos* de Cambiis, & *Rotæ Genuæ* de mercatura & rebus ad eam pertinentibus Decisiones, ut & *Joh. Marquardum* de jure mercatorum & commerciorum singulari. Nautæ adeant de Re navali Veterum *Bayssum & Schefferum*, de navali Historia *Rivium*, Problemata nautica *Kekermanni*, *Petrum Nonium* de navigandi Arte ejusque regulis & Instrumentis, Navigationes varias

typis

typis consignatas , & Mappas Hydrographicas. Quibus annumerari meretur Liber à Magno Etruriæ Duce Magnis sumptibus procuratus , *Arcano del mare* , tribus voluminibus prolixè utilis , quem pro singulari in Literas & Literatos amore Bibliothecæ publicæ nuperrime dedit Illustris Heros , Dn. *Oli-gerus Wind* , Ser. Reg. Majest. Archithesaurarius & Consiliarius , quo liberali dono nos plurimum illi publico nomine debere publice fatemur. Piscatores *Dubravium* de piscinis , Venatores *Arrianum* , quem dedit *Holstenius* , *Natalem Comitum* aliosque invenient. Lanii Rabbinorum tractatum sibi curent explicari ab eruditis hujus linguæ , de Arte mactandi. Coloni & Agricola *Varronem* , *Catonem* , *Columellam* , *Palladium* , *Geoponicorum* Volumen , *Heresbachium* , quando a vomere feriantur , expendant. Inprimis *Renatum Choppinum* de Privilegiis Rusticorum prece pretioque quocunque conquirant. Sed nusquam compareret. Raram enim ejus Libri editionem inter deperditos deplorare possunt , præsertim cum seculo superiori Colonia vel Parisiis impressus prodierit , nam si exemplaria quædam adhuc superessent a militari manu , quæ jam ex Gallia Rhæni viciniam depopulatur , distra-

distraherentur. Opportune militum facta mentio, apud quos, si parcere velint, Librorum pretium vilescere non debet. *Vegetius* de Re militari, cæterique Stratagematum & Tacticorum Auctores ex Veteribus celebrantur. Inter novitios *Lipsius*, *Salmasius*, *Naudæus* in hoc campo Martio defudarunt, sed inermes. Auxit argumentum *Herm. Hugo* de Militia Equestri, ut alios hujus classis sicco pede præteream, qui novorum bellorum apparatus pertractarunt, & in charta acies instruxerunt, calamo non ferro, sepia non purpureo cruore usi. Omnibus, ut brevi præcidam, ad Libros legendos occasio ex singulorum officio nascitur. Sunt qui omnes Libros evolvere tenentur si possint, alii omnem quibusdam legendis necessario impendunt operam. Hi omnes, magni, medii, medioximi, ad salutem *Biblia*, ad securitatem Jus publicum vel privatum, ad Sanitatem *Medicos* Auctores domesticos, ad sapientiam *Senecam*, ad voluptatem Poëtas, Historicos, Fabulatores per vices & intervalla perlegant. Hinc ne Laici aut qui literis imbuti non sunt, bonis istis priventur, propriis gentium singularum linguis & characteribus Libri laudati prostant. At qui famam eruditi & Polyhistoris ambiunt,

S

biunt,

biunt, omnium Librorum notitia instructi, omnes legant, si ætas permiserit, si vires ferant, si à publicis muneribus detur vacatio, vel ex omnibus maxime necessarios, vel ex necessariis optimos & materiæ ratione, & Auctoris & Editionis. Dum omnes suadeo, obscœnos Auctores dissuadeo, ex quibus plus damni quam voluptatis, Poëtas castratos admitto, libros Amatorios concedo, si puris oculis legantur à junioribus & cum grano salis. Nam *Nigronius* de Librorum Amatoriorum Lectione scrupulosus est. Denique Paganos scriptores ita legendos volo, ne Deorum fictitiorum cultus introducatur, aut Paganismi reliquiæ inter nos disseminentur. Hinc à *Jul. Cæs. Scaligero* vapulat *Sannazarius*, quod in divinis de partu Virginis versibus Phœbi Musarumque nomina interferuerit. De qua re inter *Heinsium* Auctorem *Herodis Infanticidæ*, & *Balzacum* Literariæ concertationes quoque ortæ, quibus se *Salmasius* interposuit. Nec Ethnicos scriptores laudari nimium vult *Possevinus*, nisi simul errores illorum detegantur. Ut scopum suum feliciter assequatur lector ad eruditionis culmen aspirans, nullum temporis momentum sibi effluere sine lectione patietur, ut multitudini rerum legendarum

etas brevis sufficiat. Neque enim dormien-
 tibus nobis mysteria sapientum panduntur,
 licet cum *Coo* nostro in templo *Æsculapii*
 dormiamus. Vigilantibus jura veniunt.
 Omnibus ingenium manet, modo per ma-
 neat studium & industria. Nocte dieque
 domi forisque Legem suam volvi & revolve-
 jussit *Jehovah*. *Alexander Magnus* ne à le-
 gendo vacaret unquam, etiam magnis expe-
 ditionibus occupatus, *Homerum* secum in
 theca aurea gestavit. *Carolus Quintus Thu-*
vididem semper circumgestasse in exercitu di-
 citur, sed gallicè redditum. *Camerarius*
Reginæ Æthiopum in curru legit Prophe-
 tam *Esaïam*. *Plinius* inter venandum & in
 ipso terræ motu a lectione sibi non tempe-
 ravit. *Hieron* in navi Bibliothecam habuit,
 teste *Athenao*. *Cato* tanta doctrinæ cupidi-
 tate flagravat, ut ne in Curia quidem, dum
 senatus cogebatur, abstinuerit, quo minus
 Libros Græcos lectionaret: qua quidem in-
 dustria ostendit, ut ad rem *Val. Maximus*,
 aliis tempora deesse, alia temporibus super-
 esse. *Gellius* cum non sufficerent dies, noctes
 legendo addidit, Noctes Atticas scribens.
 Et *Tullius* paradoxa sua contractionibus nocti-
 bus elucubravit. Hinc lucernam olere di-
 cebantur lucubrationum opera. *Xerxes* seu

Ahasverus noctem legendis Chronicis fatigavit. Nec in conviviis Romani parcebant lectioni. Certe apud *Pomponium Atticum*, lantiquitatis amatorem, nunquam sine aliqua lectione cœnatum est, ut non minus animo, quam ventre convivæ delectarentur, sicut de optimo Viro *Corn. Nepos* memorat. Romani certe Rerum potiti Bibliothecas in balneis, thermis & villis suis habuerunt, ne in maximo ocio à legendo vacarent. Difficendum interim non est, alia in homine optanda esse, alia laudanda. Optamus assiduos in legendo labores, sed laudare vel valetudinis causa, vel aliorum negotiorum, quæ ex nobili aliquo officio incumbunt, non audemus, nec serio suadere. Ita quippe legendum, ut diu legas, nec alia negligas. Nec noctem lectionibus aptam iudico, nec cœnam, præsertim si ætas ad senium vergat. Prius meo periculo didici, posterius aliorum. Lucubrationibus enim in longam noctem protensis incalescit caput, spiritus debilitantur, oculi lumine externo obtunduntur, unde capite accenso attrahuntur velut in cucurbitula humiditates, hinc defluxus catarrhi ad oculos, fauces, nares, pectus, Stomachum. Oculi id incommodi tra-

hunt,

trahunt, quod nubeculæ sæpe remaneant, & ad senectutis annos in officio nequeant perdurare. Taceo, tempus quieti & ciborum coctioni destinatum, naturæ furto subtrahi. Inter cœnandum vero & prandendum sermones convivales jucundos laudamus, qui animum facilem reddant, ne serioribus acroamatis intenti spiritus, à ventriculo avocentur, velut ignis ex culina, magno coctionis damno. Nec continuis studiis diurnis defatigandum cerebrum, lassandus animus. Sint sua cuique tempora & pensa. Exercitationibus corporis aliquæ subinde per vices dandæ horæ, sed moderatis, ne ingravescant corpora, & habitationi mentis, Divini incolæ, reddantur minus idonea. Ad pilam, aut ad talos, aut ad tesseras se conferunt, qui laborum graviorum inducias quærunt, aut etiam novum sibi ipsi, sed honestum aliquem excogitant in ocio ludum. Sic, si ludos aversamur, a lectione severioris doctrinæ feriat, vel ad Poëtas, vel Geometras, vel Musicos, consilio *Tullii*, nos conferimus, vel picturas, vel, quod palmarium, ad eruditorum colloquia. Senes anagnostis vespertinas horas terant, propriis oculis parentes, vel si negotiorum necessariorum mole cogantur ad lucernam neglecti diei refarcire, umbracula in-

terponant, vel colore viridi librorum folia tingant, ne lumini oculorum imbecilli, lumen candelæ officiat. Hinc prudenter olim, *Isidoro* si credimus, peritiores Architecti neque aurea lacunaria ponenda in Bibliothecis putarunt, neque pavimenta alia, quam e *Carystio* marmore, quod auri fulgor hebetet, & *Carystii* viriditas oculos reficiat. Medicinæ præcepta in omni vitæ genere servanda, quæ Librorum belluonibus, qui chartis semper impallescent, in memoriam revocare officii mei partem existimo. Et si me audire velint, exemplo meo discant, quod serius didici, post cœnam lectioni & scripturæ parcere, noctem quieti concedere, nunquam de die mediam horam sedendo, scribendo aut legendo continue impendere, sed vel stando, vel ambulando legere, & scripturam quovis horæ quadrante interrompere. Ita à me jam à multis annis studia tractantur, quia sine sanitatis detrimento, aliam vitæ rationem non licet inire. Fateor peccasse me junioribus annis intemperantia quadam studiorum. Sed spectandum quid fieri Romæ debeat, non quid factum sit. Consilia meliora melius edoctus & meo & aliorum exemplo dare possum. Vidi enim multorum hic naufragia, cum alii nunquam interrupta

Librorum lectione, amore honesto plurima discendi, vel fatalem horam antevertant, in flore studiorum sine fructu marcescentes, vel oculis flaccidis excæcentur, vel jugi catarrho infestentur, vel tabe pulmonum conficiantur, vel anthritide & calculo torqueantur, vel scorbuto & Cachexia torpeant; alii vel bene gerendarum occasiones negligant, vel fortunæ suæ minus prospiciant, quam in se nihil legendo, sed strenue cursitando, ignavi & literarum rudes derivant. In bonis omnia quæ summa sunt laudantur jure, sed sine jure algent. Video melioris indolis ingenia quædam, paucissima tamen, rebus aliis, quæ oculis splendore aliquo vel divitiarum vel honorum vel voluptatum blandiuntur, lectionem ineliorum Codicum assiduam præferre, bonis animi immortalibus contenta. Laudo ista, sed commiseratione sinistri fati, quod nimiam diligentiam comitari solet, condoleo. *Galenus* Medicus conqueritur, quod nimio literarum studio, aliquando in Diariam inciderit. Alibi alios morbos ex eadem assiduitate recenset. Quid illis fiet, qui cum Galeno paria in literis faciunt, non in medendi arte. Maxime dolenda illorum fors iniqua, qui multa legendo & scribendo plurima, quibus & se & patriam ab oblivione

vindicent, dum intra Musæi Librorumque claustra delitescent, in Republica ignorantur & in vicinia, quorum fama orbem pervolitat eruditum. *Theophrasto* Viro summo idem accidit, de quo prodiderunt veteres, cum percunctaretur ex anicula quadam, quanti aliquid venderet, & respondisset illa, atque addidisset, Hospes non pote minoris: tulisse eum moleste se non effugere hospitis speciem, cum ætatem ageret Athenis, optimeque loqueretur. Non terreant nos vestigia. Contra vulgi vel judicia vel negligentiam alacrius assidua lectione, sed pro ratione virium, asurgamus ad immortalem laudem, ut si destituamur præmio lectionum, ipsos nos non destituamus fructu scientiarum & invidenda animi beatudine. Si relinquamur à laudatoribus plurimis, sufficiet nobis vel unus sapiens, cui placeamus, cui legamus & scribamus. Ita se gessit *Antimachus* clarus Poëta, qui, cum convocatis auditoribus, legeret illis magnum illud Volumen suum, & eum legentem omnes præter *Platonem* reliquissent, legam, inquit, nihilominus: Plato enim mihi unus instar est omnium. Nullam remoram injiciunt magna volumina, quibus legendis citius defatigantur oculi quam animi. Sunt quippe alia, quæ cursoriis oculis &

& fugientibus pervolvenda, ut vasta quædam Volumina integram Bibliothecam implentia, alia accuratiori studio & sæpius inspicienda, ut in succum & sanguinem vertantur, qualia mediocria sunt, cuique facultati necessaria. De illis Consilium dedit *Martialis* acutus :

*Si nimius videar, seraque coronide longus
Esse Liber, legito pauca, libellus ero.*

De his salutaria monita in *Epistolis Seneca* tradidit, totius ab aliis exscripta, ut cram-
bem recoquere nolim. Verbo dicam. Multi
quidem libri legendi sed paucis immoran-
dum, cum nusquam sit, qui ubique est.
Ne lectio multorum omnisque generis volu-
minum habeat aliquod vagum & instabile,
certis ingeniis immorari & innutrirī oportet.
Vere enim *Juris Consultus* in Codice : Vagus
scholaris non fiet Magister. Aliqui Libri no-
bis sint inquilini & domestici, alii ut hospi-
tes, quos data occasione accipiamus. Quem-
admodum qui suscipiunt peregrinationem
longinquam, alicubi quidem divertunt no-
ctemque commorantur, alicubi solum pran-
dent, alibi vero diebus aliquot subsistunt,
& alia curiose, alia obiter speculantur : re-

verſi proprias inhabitant domos; ſimiliter de literarum ſtudiis judicandum docet *Nicolaus Damascenus*, idem de lectione librorum inculcamus, ut aliqui obiter & perfunctoria opera, aliqui accurate excutiantur. Neque enim memoria omnibus ſervandis, ſed legendis melioribus pro cujuſvis inſtituto, cura ſufficit. Hinc multos Libros an habere conveniat, memoriæ cauſa, deciſum fuit in conſiliis ab *Adrado de Ponte*, & *Jo de Nevizanis*. In his *Epaminondæ* exemplo legimus, qui cum in circulum veniſſet, in quo aut de Republica diſputaretur, aut de Philoſophia ſermo haberetur, nunquam inde prius diſceſſit, quam ad finem ſermo eſſet deductus.

Ut memoriæ fugienti conſulatur, qua parte animi, quæ cuſtos eſt cæterarum ingenii partium, nonnulli tam debiles ſunt, ut ne in ſcripto quidem meminerint, quid paulo ante poſuerint, & ex tempore dicturis ſolita mens efluat, duo adminicula commendantur, vel excerptendo, vel indices conficiendo. Nihil de frequenti lectarum rerum repetitione hic dicam, nec Artem Reminiſcendi à multis cultam advocabo, quam frequens exercitium provocat ſuis locis auctoribuſque relinquentem. Pythagoræorum morem hic laudare ſatis

tis est, quos imitatus *Tullius Senex*, exercendæ memoriæ gratia, quid quoque die dixisset, audivisset, egisset, commemorabat vesperi. Nam, quod suavit *Quintilianus*, ut cibos mansos ac prope liquefactos, demittimus, quo facilius digerantur, ita lectio non cruda sed multa iteratione mollita & velut confecta, memoriæ imitationique tradatur. Quo consilio *Fortius Ringelbergius* voluit ut quicquid legatur, apud alios recitetur, & vel precibus vel pretio Auditores conducantur, si desint qui recitationi intersint, quo artificio inter æquales me olim in juventute usum recordor, non sine emolumento linguæ, memoriæ, judicii. De arte Mnemonica id monendum, magnum ejus esse usum in numeris, nominibus propriis & serie rerum, sive per locos imaginarios sive picturas. Picturis imaginariis Astronomi nos ad cœlum ejusque sidera vocant, per currus, coronas, Pegasum, Cygnum & alia. Geographi quoque per Tabulas seu Mappas Terrarum situm adumbrant. Prolixus fuit in Mnemonica arte perficienda labor *D. Pauli Moth*, nuper pie defuncti, qui Chronologiam universam, Radices linguæ græcæ, Titulos omnes Juris, Aphorismos Hypocratis, simplicium medicamentorum catalogum, & alia per imagines

veras æri incisas certisque historiis, quibus singulæ res lingua vernacula includuntur, comprehensas ante oculos posuit memoriæ juvenili senilique ex æquo inservituras. Quo compendio etiam Doctissimos Historicos usos scimus in rerum temporumque serie enumeranda. Unica tantum difficultate laborare videtur iste discendi legendique modus, quod duplici memoriam onere aggravet, rerum scilicet discendarum, & figurarum, quibus res adumbrantur. Sed cum tempore, his evanescentibus, illæ memoriæ infixæ remanent. A phrenesi securum tyronem esse jubeo, nisi erudito hoc principio abuti velit, & sine finis utilis respectu hic subsistat. Blanda memoriæ adjumenta juvenes, velut nescios, ad rerum seriarum penetralia ducunt. Frequentior tabularum usus apud plerosque, memoriæ in subsidium mittitur. His Hippocratem *Zuingerus*, Anatomen *Vassæus* & *Platerus*, Pharmaca *Fuschius*, Chronologiam *Helvicus*, Historiam & Institutiones Juris *Claud. Moron*, Jus Civile & Canonicum *Freygius*, scripturam sacram *Brandmullerus*, Institutiones Medicas *Sennerti* *Winckelmannus* exposuerunt, & unusquisque uno quasi conspectu repræsentare potest methodo perspicua

cua Librorum materiam. Melius labentis memoriæ subsidia quærunt, qui *Abensina*, seu *Avicenna* & *Plinii* exemplo, nihil legunt, quod non excerpant, & in Locos Communes digerant. Modum nemo fidelius docuit quam *Drexelius*, & non ita pridem *J. P. Titius* & *Kergerus*. Ego, quamvis hujus methodi usum neglexerim, incipientibus studiorum annis inceptæ, crescentibus abjectæ, sed insigni meo damno, qui labenti memoriæ nimium fidebam, auctortamen essem Tyronibus, compendium novorum titulorum faciuris, ut in qualibet facultate sibi deligerent Epitomen quandam, ad quam omnia quæ in lectione Librorum occurrunt notatu digna, suo loco brevissime annotentur. Systema Theologicum *Brochmanni* nostri, vel ejus synopsis à *Bircherodio* edita, Theologis pro Locorum Communium compendio & Indice inserviet, quo referre possunt quicquid in aliis obviam erit sive literalem Textus sacri sensum spectet, sive Controversias, sive Casus Conscientiæ concernat. Qui ab his dissident, vel *Becani* Manuale, vel *Wendeli* Epitomen Theologiæ sibi habeant, qui istis sacris addicti sunt. In Jure *Schotani* Examen Juridicum, quo olim nos usi sumus, pro norma erit,

nili Titulos Juris cum *Mommerio* malis , quos pro locis sufficere vult , ego abundare dixerim. In Re Medica *Sennertus* voto satisfaciet , amplo compendio rerum fere omnium in Medicina occurrentium Synopsin & velut indicem complexus. Ad alios non transgredior , ne sim longior. Philosophi & Philologi rerum suarum compendia quærant passim prostantia , si laborem novos titulos adornandi fastidiant. Illi *Alstedium Timplerum* habent , & compendia Philosophica *Parentis nostri* beati. Antiquarii profani *Lipsium* , *Rosinum* , *Phil. Carolum* augeant , sacri *Josuum Arndium*. Historici *Cluverum* , *Turfellinum* , *Jonstonum* , *Micræum* sibi proponant , ad quos lecta referant. Et si plura in legendo occurrant , quæ ad laudatos titulos non pertinent , ea libro *Adversariorum* singulari demum annotentur , ad quem , ubi opus , confugiat Lector. Alterum memoriæ fulcrum , indices præstant , vel singulorum Librorum , vel singularum Facultatum , vel omnium cujuscunque facultatis Librorum. Non de indicibus loquor , seu librorum titulis , sicut accepit *Suetonius* in indice Libri *Claudii Cæsaris* , qui erat *Μεγῶν ἀνάστασις* : sed de argumentorum summariis suo ordine

dis-

dispositis. Hi indices singulis Libris sub-
iecti indice quasi digito monstrant ea quæ
in Libro continentur, ad quos recurrit me-
moriam, ut operæ faciat compendium. Abu-
santur vero istis negligentiores, neglecta
Librorum lectione huc confugientes, &
imperiti, qui, ut inclarescant, ex indici-
bus opera sua exstruunt. Atsi major sit Libri
moles, quam ut semel pervolutatus Lecto-
ris festinationem diutius remorari debeat,
postulante occasione, ex indice memoria
colligit, quæ relegere placet. Triplex vero
in accuratioribus Libris Index conspicitur,
Rerum & Verborum, Capitum & Aucto-
rum laudatorum vel emendatorum. Nam
Registrum, ut vulgo appellatur, in vetustis
editionibus ad calcem Librorum legi soli-
tum, bibliopegis in ligandis Libris inser-
vit, ut sciant an per quaterniones vel duer-
niones complicantur folia, & ut illorum
defectus præcaveatur. Rerum Index recen-
tiorum industriæ debetur, quem nec in
Manuscriptis, nec primis editionibus inve-
nias. Vel is libro annectitur, vel seorsum
legitur. Seorsum indices in res Variorum
Auctorum prostant. In Biblia *Tossanus*,
Piscator, *Ravanellus*, præclare rem confe-
cere. Quo Concordantiæ Bibliorum refe-
runtur.

runtur. Rerum forensium Indicem *Budaus* confecit, & in Jus Danicum *Osterfonus*, in Norwegicum illustris *Bielckius*. In Galenum *Brassavola*, Pinus in Hippocratem, *Aldus* in Plinium accuratos indices ediderunt. Et in omnes Medicos Antiquos præfertim Arabes *Jacobus de Dondis* Patavinus, titulo promptuarii Medicinæ, cui similes sunt Pandectæ Medicinæ *Matthæi Sylvatici*. Ipse *Plinius* Librum primum ex indice condidit. Verborum index alteri plerumque jungitur. Tam ille ab eruditis accuratus prodiit, ut Commentarii vice & Lexici sit, sicut Index *Gifanii* in Lucretium, *Elmenhorstii* in Apulejum, *Rhodii* nostri in Scribonium, *Loccenii* in Curtium, *Boecleri* in Nepotem, *Freinsheimii* in Justinum. Sunt isti sæpe indices libro, cujus indices feruntur, præstantiores, ubi plus invenias succi quam in corpore ipso. Scorsum exstant Indices verborum literatissimi, & eruditione conspersi in N. T. *Pasoris*, *Vechneri*, *Lubini*, *Suizeri*, *Lucii*, in LXX. Interpretes *Rosenbachii*, in Hippocratem *Galenii*, *Erotiani*, *Stephani*, *Foëssii*, *Gorrai*, *Ballonii*. In Vitruvium *Philandri* & *Ubaldi Baldi*, in Jus Justinianeum *Hotomanni*, *Lindembrogii*, in Ciceronem *Nizolii*, in Home-

rum *Couloni*, *Porti* in *Herodotum*, *Theocritum*, *Pindarum*, ut plures alios omittam. Caputum seu sectionum Index, nec novus est, nec antiquus. In primis editionibus tantum comparet. Neque enim Antiquorum Libri per capita fuerunt distincti, sed Voluminibus. Ita *Plinius*, *Herodotus*, *Thucydides*, *Livius*, *Salustius*, & alii Græci pariter & Latini Auctores totum opus sine distinctione Caputum pari tenore perscripserunt, ut scilicet transultoriam quorundam per caputum titulos & Librorum indices eruditionem perstringerent, judice *Salmasio*. Hinc cum à posterioribus scribis per Capita & Sectiones Libri Auctorum dividerentur, sæpe sine cura & consilio, conjuncta fuerunt separata, & vice versa, quod non raro lectorem in lectione turbat. Per partes nolo hæc deducere, ne obruar rerum occurrentium & Librorum multitudine. Olim *Sydræ* vel Sectiones *Vetus Testamentum* distinguebant, sine caputum divisionibus à *Christianis* demum sive *Stephano Langton*, sive *Hugone Cardinale* inventis & postea à *Judæis* receptis, quia utilissimum memoriæ subsidium vocat *Elias Levita*. *Psalmi Davidis* in Libros quinque dividuntur a *Tremellio*. De *N. T.* dubitant, & a quo in capitula &

versiculos sit distinctum. De quo Antiquarii sacri consulantur. Certe per ista capita, quæ in nostris editionibus omnibus visuntur, Novi Fœderis scriptores olim distinctos non fuisse, *Suidas* indicat. Titulum ille notat differre à Capite. Nam *Matthæum* habere titulos LXVIII. capita vero CCCLV. *Marcum* titulos IIL, & *Iohannem* titulos XVIII, capita CCXXXII. Differentiam quoque à nostris ista κεφάλαια testantur, quæ ex Bibliotheca Regia Parisiensi non ita pridem ad calcem N. T. editionis Parisiensis *Stephanianæ* & *Leidenfis Elzevirianæ* adjungi cœperunt. Nam hic in *Matthæo* κεφάλαια LXVIII, quæ tituli *Suida*, numerantur, in *Johanne* XVIII. In nostris *Matthæus* tantum habet XXVIII. sed *Johannes* XXI. Præterea primum in nostro *Matthæo* caput genealogiam & conceptionem Salvatoris absolvit, in illo de Magis agitur, quod capitis secundi in nostro initium est. In *Johannis* capite secundo, sicut vulgo. Distinguitur Evangelista, nuptiæ in Cana Galilææ celebratæ enarrantur, quæ in priori divisione caput primum auspicantur vel implent. Idem de cæteris est judicium si inter se vel obiter conferantur. Nihil nos turbet κεφαλὴς βιβλίου in Epistola ad *Ebraeos*, quod

Beza caput libri vertit , & *Anglus* interpres , *the beginning of the booke* ; principium Libri , & *Resenius* in nova versione , *Forst* i *Bogeri*. Rectius *Danus* vetus & *Germanus* , absolute Librum. In Psalmo enim XL , unde hic textus manavit, מִן הַכֶּתֶב legitur, Volumen Libri , qui more antiquo apud Ebræos & Romanos convolvebatur , unde presse fontem hunc imitata versio nostra *Vulgaris* novissima à magnis Theologis *Resenio* & *Suaningio* procurata, in Psalmo legi jubet *Bogens* Rulle. Quod aliis quoque Interpretibus observatum. Ita in Italica versione *Deodatus* , nel rotolo del libro. Nec denique negotium faceffit nobis κεφάλαιον cuius fit mentio *Ebr.* VIII. 1. quippe quod summam libri significat, unde frequenter in novo fœdere ἀνακεφαλáιωσις pro summa rerum dictarum adhibetur. Sic & *Suidæ* , κεφάλαιον ἐπὶ τοῖς λεγομένοις , summa est rerum quæ dicuntur. Nec versibus , sicut nos , sua scripta distinguebant *Veteres*. Versus quidem *Hieronimus* nominat , quibus Prophetas distinguit , de colis tamen versuum explicat *Cassiodorus*. Versus , quibus *Ciceronis* , *Aristotelis* , *Zoroastri* , *Lyci* , *Iustiniani* opera dicuntur distincta , de lineis potius accipiendi , quam veris versibus.

Unde enim tot myriades versuum ? Dubitat de his *Lipsius*, qui videndus, quanquam de versibus in *Justiniano* malit interpretari *Vultejus*. Auctorum denique indices, qui in libris vel citantur vel emendantur, recentiorum curiosa sedulitas invexit, licet facem prætulit *Plinius*. Ad illos recurrimus quandocunque de Auctoris cujusdam vel nomine vel sensu occasio emergit. Nomina propria in sacris monumentis obvia nonnulli sibi sumpserunt explicanda. Ex aliis scriptoribus, præsertim antiquis, plures excerpserunt, quæ ad Auctorum, quorum vel fama sola ad nos vel scripta pervenerunt, notitiam spectant. Ætas autem cujusque scriptoris, seu Epochæ, in hoc Catalogo maxime considerata venit, quam plerique in recensendis Auctoribus alto silentio involvunt. Eam seculorum rationem habuit *Bellarminus* in Libro de scriptoribus Ecclesiasticis. *Helvicus* in Chronologia Universalis, & *Suanningius* Samoënsis in Danica, passim ad sua tempora Viros claros revocant. *Freymonius* affirmat se in Symphonia Chronologica Jurisperitorum tam veterum quam recentiorum ætates, nomina, mores &c. collegisse. Medicorum ætates sparsim signantur in Vitis medicorum, quibus mul.

multum lucis attulit *Seb. Schefferus* in Introductione ex prælectionibus incomparabilis *Conringii* concinnata. Ante quem *Guolf-gangus Justus* Chronologiam Medicorum distinctius tradidit & operosius. Philosophorum ætates consignavit *Io. Iacob Frisius* in Bibliotheca Philosophica. Mathematicos *I. B. Riciolus* in *Almagesto* tradidit. Ætatem Romanorum Auctorum auream, argenteam, ferreamque ex *Pœdia Scioppii* per compendium haurimus. In Historicis Romanis similia *Hankius* tentavit. Nos in gratiam Lectorum novo perspicuoque labore una Tabella omnium Facultatum scriptores claros secundum seculorum seriem distincto adumbravimus, publice in Bibliotheca publica suspendenda, ad quam recurrere Tyrones queant quotiescunque ex Capsula aliqua Librum sibi perlegendum deprompserint, ut de vera Auctoris ætate sint certiores. Singularum Facultatum Libri variis Indicibus Lectori cuicunque patent, quos familiares sibi habere tenentur, qui certo studiorum generi se addixere. *Bel-larminus* scriptores Ecclesiasticos plerosque ad seculum decimum sextum perduxit, *Saussens* ad decimum septimum. *Henr. De Gandavo* quoque per *Suffr. Petr. Leovarden-*

158 *Th. Bartholini Dissert. VI.*

sem editus. *Paulus Bolduanus, Voetius*, alii-
que operose sed fere materiarum ordine ser-
vato Bibliothecam Theologicam, etiam ex
recentioribus adornarunt. Nuperrime pro-
diit *Dorschei* laboriosum opus in quo no-
tantur omnes, qui quemcunque locum sa-
cræ scripturæ tractarunt. Index ille est spe-
cialis in V. & N. Testamentum auctus à
I. Gramsio. De Juris Consultis *Lorichius*,
Fichardus, Gribaldus, Freymonius, Gentilis,
sunt solliciti. Medicorum scripta *Gesnerus*,
Spachius, Gallus, Lindanus, persequuti
sunt; Mathematicorum *Vossius*, Politico-
rum *Naudæus*, aliorum alii. Quis omnes
recenseat? Materiam ipsam & verba tech-
nica in Libris singularum facultatum occur-
rentia singularibus indicibus comprehende-
runt Doctores eruditi, summe necessariis
legenti, si vel Tyro vocabulorum, quibus
artes docentur, scientiam desideret, vel in
studiis proveciores memoriæ variis occu-
patæ consulant. Ausim dicere nullius Eru-
diti Viri vel Tyronis erudiendi Musæum
his carere posse, velut Nomenclatoribus.
Bibliorum Index quintuplex generalis Leidæ
1623. editus, uti & *Tossani* Index Biblicus
Theologo sufficit, cum alterius Lexici Theo-
logici ex Patribus & Theologis seculorum
omnium

omnium adhuc defectu laboremus. Juris-Consultis *Calvini* Jcti, *Nebrissensis*, *Brissonii*, *Hotomanni*, Lexicon Juridicum pro penu sufficienti inservit. Medici & generalibus Indicibus a *Bartholomæo Castello*, *Rhegino*, *Hanemanno*, aliisque magna sollicitudine congestis utuntur, & particularibus. Inter quos numerari debet Catalogus Plantarum Latinè, Græcè, Germanicè & Gallicè à *Gesnero* conscriptus, *Brunsfeldii* Onomasticon seu Lexicon medicinæ simplicis, *Remachi Fuschii* Nomenclatura Plantarum omnium, quarum hodie apud Pharmacopolas usus est magis frequens juxta Græcorum, Latinorum, Gallorum, Italicorum & Germanorum sententiam, cui tamen *Schröderus* Palmam præripuit, *Martini Rulandi*, *Guil. Ionsonii* Lexicon Chymicum, & *Ger. Dornii* Clavis Philosophiæ Chymisticæ, Directorium Præcticum *Moroni* a *Seb. Scheffero* auctum, seu Index omnium Observationum Medicarum sparsim editarum. Philosophorum filii gaudent *Goclenii* & *Micraelii* Lexico Philosophico, Geographiæ studiosi Lexico Geographico *Ph. Ferrarii*, *Caroli Stephani*, *Abr. Ortelii*, Poëtæ dictionario *Basilii Zanchii*, *Car. Stephani*, *Natalis Comitii*, Critici Lexico Critico *Rob.*

Robbigii Parai. Philologi tot habent multarum linguarum Lexica, Onomastica, Thesauros, Dictionaria, Nomenclatores, ut multitudine laborare potius videantur, quam defectu, licet in Latinis non pauca ad perfectionem desiderent magna ingenia, *Scioppius* in Consultatione de Scholarum ratione, *Borrichius* noster in Dissertatione de Lexicorum Latinorum Jejunitate. Tandem ut ad generales omnium Facultatum Indices seu Catalogos descendam, vel publicarum Bibliothecarum Libri recensentur, vel privatarum. Illi vel sunt universi orbis Literati, vel societatis alicujus, vel Nationum singularum. Hi vel in publicum usum collati, vel singulorum bono inservientes, vel Auctione distracti, & eumentibus licitantibusque in Librariis Officinis expositi. Utrique vel manu seu antiqua seu recenti scripti, vel typis variis impressi. Si singulis exponendis immorarer, diem dicendo protraherem, & Auditorum aures fatigarem. Aliunde peti possunt, quæ hic negliguntur, ne nimium, tædio Lectorum, excrescat de Libris Commentarius. Secure quidem jam præterire plura possum, cum videam de Catalogis eorumque scriptoribus, *Gesnero* imprimis, & prohibitorum censura, justo

ordine, nec minori labore & Judicio *Valentinum Henricum Voglerum* nuperrime Libro singulari egisse, quem Lectoribus commendando & ipse mihi proposuissem si ante mihi visus fuisset, quam hisce meis Colophonem adderem. Observandum interim de his verbo antequam discedam, varium esse in Librorum Catalogis Universalibus numerandis ordinem servatum. Aliqui seculorum seriei insistant. Alii per Facultates & materias disponunt. Nonnulli capsularum sequuntur ductum & formarum. Plures Alphabeti ordine Auctorum nominibus vel prænominibus incedunt. Priores modi inserviunt utilitati, posteriores commoditati. Ibi doctius leguntur tituli, hic citius inveniuntur legendi. De Bibliothecæ nostræ publicæ Catalogo, ut verbum addam, nescios Vos esse nolo, præter particularem Indicem, qui cuique donario Librario proprius est & petentibus idoneus, adornare me communicato consilio cum Consultissimo Viro D. *Cosmo Bornemann*o, Professore Regio, meo in Academia & Bibliotheca Collega honorando, Generalem omnium Librorum ordine Alphabetico ad morem Catalogi Bibliothecæ Oxoniensis a *Th. James* confecti sine ullo materiarum discrimine, ut quæ-

rentibus Lectoribus statim Auctor quicunque ordine nominis inveniatur. Quo labore defunctus & in lucem publicam emissio, non gravabor, si ad plures annos & curas Deus vitam viresque prorogaverit, alterum aggredi secundum seriem materiarum, singulis Facultatibus inserviturum. Sicut in prioribus plus laboris insumimus quam ingenii, ita in posteriori majus in digerendo iudicium elucescet, quam studium in scribendo. Quicquid vel hic vel ibi conabimur, communis legentium commodo erit consecratum. Vobis canam, ut olim Tibicen Antigenidas, & Musis.



TH. BARTHOLINI

DISSERTATIO VII.

D E

LEGENDIS LIBRIS.

*Judicium de scriptoribus ferendum à
peritis. Electio ex optimis & ne-
cessariis, pro cujusvis usu vel genio.
Ordo lectionis per compendia singula-
rum Facultatum. Methodi brevissi-
mæ Auctores. Virtus interpretum.
Obstacula legentium ex notis. Puncto-
rum origo. An Codici Ebræo coæ-
va. Accentuum mysteria. Veterum
scribarum notæ, ex primis Literis,
earumque ambiguitas. A Justiniano
abrogatæ. Sigla quid. Notarum ce-
leritas periit. Chinesium hierogly-
phica. Notæ Caballisticæ. Abbre-
viaturæ Actorum, præsertim in al-
legationibus. Signa Ponderum in Cel-
so & Chemicorum damnata. Nume-*

rorum notæ ex Literis. Zifræ à Mauris introductæ, Basilio quoque usitatæ. In Algebra & Musica notæ. Magicæ periculosæ. Synalephæ vett. scribarumque inscitia vel celeritas errorum causæ. Pandectæ Florentini an authentici. Permutatio litterarum in Manuscriptis.

AD portum properamus, vel, ut in Re Libraria maneamus, ad Libri expliciti cornua. De vero legendi Libros modo pauca adhuc restant, quæ delibare necesse nobis est, antequam finem Libro imponamus. Neque enim antea à nobis dicta sufficiunt, nisi legentis judicium accedat, quo à bonis mala dijudicentur, & nobis cum fructu adjudicemus quicquid præclari Volumina Eruditorum pandunt. Multum hic, consilio *Senecæ*, magnorum Virorum judicio tribuendum, aliquid & proprio suo quisque vindicat. Ut filum quasi Ariadnæum nobis quod sequamur in hoc discursu extendamus, judicium, quod legentibus commendamus, ferendum est de scriptoribus, de eorundem tractandi modo, & sensu Librorum assequendo. Bre-

vissi-

vissimis his capitibus expediemus brevissime
quæ de judicio legentium porro necessario
dicenda supersunt, sed dicam brevius quam
res tanta dici deberet. De scriptorum vita
& ætate circumspiciendum judicio penscu-
lato, an ea doctrinæ sive per experientiam
sive ingenii excellentiam magnitudine polle-
re potuerint ut legentium scopo satisfaciant,
nec inter illos numerentur qui quo plus bal-
butiunt, plura loquantur. Deinde an ea
fidelitate res suas chartis commiserint, quam
in Doctoribus desideramus, qui invidiæ
causas procul habent. Denique an ea Ju-
dicii dexteritate versentur in suscepto argu-
mento quod par sit rebus tractandis. Tandem
an ea scribant eaque methodo, quâ scribere
debent, lectoresque scientia exfatiant & di-
scendi cupiditate impleant. Aliter si scripto-
res in officio negligentiores deprehendantur,
cauto judicio se inde Lectores subtrahant,
& ad legendos alios se conferant, qui doctè,
perspicue & debita fide scribunt. Sed vere
Hippocrates noster judicium difficile pronun-
ciavit. Soepe enim cœco judicio scriptores
damnamus non intellectos, & inauditos in
exilium relegamus. Fatum id fuit *Epicuri*,
hominis temperatissimi, quem vulgus mor-
taliū de grege porci traduxit, sive quod

X 3 non

non intellexerit eum de Voluptatibus animi non corporis differuisse, sive quod ejus doctrinam ex mala discipulorum disciplina æstimaverit. Melius de tanto Philosopho sensit post *Laërtium Gassendus*, cujus præclarum opus de vita & Sententiis Epicuri habemus. Igitur moderatos in judicando nos esse convenit, perlecto integro, non parte, ne nostro indicio velut forices prodamur. Nec temere ista judicandi libertate utimur, nisi de Auctoribus quorum nos studio addiximus. De Theologis Theologi, de Medicis Medici, de fabris fabri sententiam ferant. Latet post Tabellam Apelles, qui tutoris judicium ultra crepidam sapientis irrideat. Theologorum *Bellarmini*, *Riveti*, *Cocci*, *Brochmanni* nostri Censuras Patrum libenter legimus. *Gentilis*, *Freymonii* Jctorum Clarissimorum elenchum omnium Auctorum, qui in Jure claruerunt, seu Librorum Juris Canonici & Civilis, quis non magnificiat? Quis de Libris Orientalium Linguarum sincerius judicet, quam istarum peritissimi *Buxtorfius* & *Hottingerus*? De Libris Græcorum sententiam *Leonis Allatii* Græci laudamus. Politices doctrinæ scriptores nemo melius *Nandæo* commendaverit, qui in aula Romana tot annos cum plausu

trivit.

trivit. *Gesnerus*, ille multiscius & in Re Medica versatissimus de scriptoribus Medicis judicium haud contemnendum tulit, nec in gloria in campo desudavit ex *Conringio Schef-ferus* Medicus ex Medico. *Hippocratis* scripta ad censuram vocarunt Medici exercitati & Literati *Mercurialis* & *Lemosus*. De Romanis scriptoribus antiquis tot Criticorum judicia accepimus, ut vel minimi navi sint animadversi, & quomodo sint corrigendi *Robortellus* fusius deduxerit, ipse non ex trivio Philologus, sed, si *Thuani* judicio stamus, qui majorem scriptis de se opinionem excitavit, quam implevit. De Historicis Romanis antiquis judicia *Sigorii*, *Bonifacii*, *Vossii*, *Conradi Piceni* junioribus commendamus, nec minus judicia de Rerum Romanarum scriptoribus, quæ ex doctioribus congeffit peculiari Opere *Martinus Hankius*, à *Q. Fabio Pictore* auspicatus, qui ante Christum 223. annis vixit, & in *Freinsheimio* desinens, quem fata 1660. Heidelbergæ mortalibus eripuerunt. A cujus erudita manu etiam de aliarum gentium scriptoribus judicia expectamus. *Verderius* plerorumque Auctorum veterum censorem egit, sed cum rigidior fuerit, aliorum censuras effugere non potuit. Ita quippe temperanda judi-

cia nostra, ne de aliis judicando, judicia acutiorum incurramus. Ex æquo judicio sequitur electio meliorum scriptorum. Hoc cujusque studium erit, ut eos cum judicio eligat, quos instituto commodos noverit. Sæpe dictum memini, nec repetere erit tædiosum, multos pervolvendos, paucis insistendum, iisque melioribus, qui ita docent, ut discant Lectores. Qui vero eligendi ex tanta Auctorum multitudine, quibus assuecas cupidum doctrinæ pectus, brevi pagina dici nequit. Opera hac egregie defuncti sunt non pauci, qui de ratione studiorum Libellos conscripserunt. Et duces in hoc itinere studiorum eos quisque deliget quos sibi maxime profuturos Doctiorum consilio & judicio perspexerit. Non quid rerum perverſi judices, nec quid bajuli aut operarii, sed quid homines doctissimi & in hoc vel illo studiorum curriculo versati sentiant eligendum ad imitationem. Ex multis igitur optimi, ex optimis necessarii eligendi, quos vel proprium studium, vel meliorum judicia commendant, vel genius peculiaris amat, & optima quandoque legendorum dux natura. Sæpe enim inter scriptores & Lectores ea est studiorum voluntatisque tacita quædam conspiratio, ut ad hos magis ferantur ducantur-
que

que, quam illos. Hinc breves Commentarios quidam expetunt, quibus vel ocium angustius, vel genius capacior ad capefcenda ea quæ breviffime traduntur, alii per plusculas periodos verborum fententiarumque longo ambitu ad rerum cognitionem perducendi. Omnium artium Libri aliter ab iis tractantur, qui eas ad ufum transferunt, aliter ab aliis, qui ipfarum artium tractatu delectati, nihil in vita aliud funt acturi. Non peto ut mihi dicenti credatur. Credite *Craffo* apud *Tullium* ingenio minus craffo. Huic ingeniorum diverfitati aptandi Libri, commendandi Auctores, feligendi fcriptores; Sicut ex vario nervorum fono in fidibus varius animorum motus cernitur, ut hic gravi, ille acuto afficiatur, fic pro captu Lectorum Volumina explicanda. Ad feligendas quoque Librorum legendorum editiones, quas vel typi vel editores commendant, animum advertere decet, feduloque cavendum ne primæ præferantur poftremis, in quibus fœpe fententias Auctorum mutatas vel illuftri aliquo augmento ditiores reperias. Ordinem legendorum illi definiverunt, qui Rationem Studiorum in fingulis facultatibus per partes docuerunt, hic neutiquam repetendi. Suos quifque Doctores adeat. Ad me fi ventum fuerit,

Tyrones Medicinæ & Artis filios ad *Fac. Sylvium, Campegium Lindanum, Kyperum, Rhodium* nostrum amandabo, ut de ordine legendi Medicos Auctores consilia petant. In universum suadere omnibus, cuicumque studio addictis, intermittere non debeo, ut à compendiis legendis exordiantur, sensim ad majora Volumina adscendentes. Quo pacto memoriæ sine ambagibus consulitur, animusque brevem totius artis ideam concipit, posthæc plenis majorum voluminum foliis amplificandam. Leguntur Libri, ut picturæ, aliter ab artificibus, à tyronibus aliter. Hi ut discant artem per compendia, illi ut de arte judicent. Utrique primum intuitum diffundunt in generali picturæ specie & similitudine contemplanda, mox hi colores & umbras, & vestes, & alia ornamenta contemplantur, illi ulterius judicio progressi proportionem partium, colorumque mixturas examinant. Sic sacris studiis initiandi *Catechesin* velut Fidei Christianæ Epitomen menti imprimunt, antequam ad ipsa Biblia evolvenda, Patres, Commentatores, Casuistas & Polemicos accedant. Juri Romano operam navaturi *Gothofredi* Epitomen institutionum, *Isagogen* ad Instituta *Pacii*, principiaque Juris percurrunt, antequam ad In-

stitutiones Justinianeas, Pandectas, Codicem, Feudalium Libros, Consilia & responsa Prudentum Juris Consultorum se accingat, & *Lancellotti* Institutiones præmittunt Juri Canonico. Medicorum *παιδες* ab *Hippocratis* Aphorismis brevibus illis & nervosis auspicia capiunt, in quibus plerarumque medecinæ partium rudimenta traduntur, sed quia tyronibus subobscuri videntur, simul institutiones *Fernelii*, vel *Liddellii*, vel *Heurnii*, vel *Sennerti* minores vel *Wormii* nostri, jungunt, donec ad ipsum *Hippocratis* Corpus, *Galenum*, *Avicennam* perveniant, Morborum particularium scriptores alios, Consultatores & Observationum immensas Pandectas. Per reliqua scientiarum artiumque genera decurrentibus eadem legendi methodus pro norma erit, ne volare incipiant, quam repere didicerint, & in vasto Oceano mergantur nondum in alveis natare docti. Eruditis ordinem legendi proprium cujusque judicium & susceptæ materiæ pensum præscribit, quibus nec præcepta damus, nec leges sancimus. Nec tamen illi quanquam majoribus pares, à Compendiis abhorrent, memoriæ famulantibus. Concilia quippe in Epitomen à *Caranza* contracta servant Theologi, *Lacunam* Galeni Epitomatorem Medici

laudant, *Vigelii* Methodum Juris non fastidiunt Jurisperiti, nec *Blendelium Rolfinciumve* Chymiam in Artis formam compendiosè redigentem Chemici spernunt, nec *Veslingii* syntagma Anatomicum, nostrique *Parentis* Institutiones Anatomicas, non semel a nobis auctas & illustratas docti Profectores negligunt. Historici *Florum*, *Justinum*, *Jonstonum*, Politici *Lipsium*, *Arnisaum* in pretio habent. Philosophi Peripatetici Præcepta *Parentis nostri* non aspernantur, nec Platonici *Acanthium*, nec Stoici *Lipsium* aut *Scioppium*, nec Epicurei *Gassendum*, nec Carthesiani novissimi *le Grand*, nomine magnum Libro parvum, nec denique Mathematici Compendia sua respuunt, inprimis Systema Mathematicum *Keckermanni* & nostri *Hilarii*. Ad pompam alioservant, ad usum quotidianum alios, sicut in Vestiario ad festos dies vestes pretiosæ suspenduntur, ad profectos dies viliores tunicæ, & in Armario arietes obsidionibus, fundi & pugiones levioribus velitationibus destinantur. Sic ordines suos servat eruditio & legendi ratio, pro cujusque genio, ætate, indigentia. In quibus cum fructu, non voluptate feligendis, maturo judicio per usum, studium & naturam acquisito est opus, si prudenter legere & lectis sapienter uti ve-

lis, ut judiciosus tandem Lector & assiduus, velut apud *Tullium* domus Juris Consulti, totius oraculum sit civitatis. Non cumula-
bo præcepta de modo electos Libros legen-
di, ne post amplissimam aliorum messem vili Specilegio molestus fundi Dominis videar.
Consulantur magna seculi lumina, *Gratius*,
Vossius. In studio Theologico *Gerhardus Pa-*
rensq̃ue noster memoriæ beatæ præverunt
studiosis, postque eos non pauci, inter quos
præfero *Voëtium* & *Crociū*. In jure olim
Caccialupus, recentior *Vultejus*, novissime
Mæstertius & *Thysius*, amici nostri, com-
pendio negotium absolverunt. In Arte Me-
dendi *Parens noster* Tyrones manuduxit. Antè
illum *Joh. Heurnius*, &, qui Parenti suc-
cesserunt in hac palæstra, *Lindanus*, *Hor-*
stius, *Kyperus*, partibus suis defuncti sunt.
De libris Historicorum legendis *Cambdenia-*
nus, *Bodinus*, *Whear*, &, qui hos præ-
cessit *Magnus Basilus*, omne punctum tu-
lerunt, sicut *Reineccius* & *Blondellus* ad histo-
riam sacram propius accedentes. Quis sin-
gulos enumeret, qui in legendis aliarum
scientiarum Libris consilia sua non invide-
runt posteritati? Docuerunt hæc & alia mul-
ti fidelius, quam prompte discuntur à Ty-
ronibus, qui vagas subinde lectiones certis

& seriis anteponunt, nescientes quantas secum vires bona methodus ducat, unde plurimi nomen tantum librorum usurpantes in externis subsistunt, & ignorare coguntur quid interiori nucleo valeant. Me si audiunt, verbo dicam: Cum delectu Libros eligant, & legant cum iudicio, apes imitati, quæ vagantur quidem, sed flores ad mel conficiendum idoneos carpunt, non foetidos, deinde quicquid attulere disponunt ac per favos digerunt. At si quidem pauci sunt, qui tanta rerum omnium intelligentia muniti, sibi tantum confidant, ut nullo egeant, aut proprio cortice in rapidissimis fluminibus sciant natare, autor sum, ut in legendis Veterum monumentis Lexica propria, de quibus pronuper aliquid monuimus, semper ad manus sint, & Commentarii Virorum eruditorum, quorum uberrimus in omni scientia est proventus, Interpretesque consulantur. Sed ex his multis optimi advocandi, qui Auctorum textus explicant ex mente Auctoris, sicut in *Hippocrate* versati sunt *Hollerius*, *Duretus*, *Martianus*, non ex propria onerent torqueantve, laudemque multiloquentiæ affectant, quo nomine Galenus male audit, non veritatis, non auctoris, non doctrinæ, non denique Lectorum.

cupi-

cupiditati velificantur. Singulos percurrere nec libet jam, nec licet. Dabitur alias occasio, quando loculi Bibliothecæ publicæ excutiendi nobis sunt, ut de multis quæ occurrerint, breviter pauca dicamus. Jam enim in generali Librorum lectione occupamur, de qua hætenus satis, sed velut in idea, videmur in publicum protulisse, si prius obstacula quædam removeamus, quæ in Lectionis progressu Lectorem remorantur. Passim in Manuscriptis veterum Codicibus & Libris impressis, præsertim in Typographiæ incunabulis, notæ quædam occurrunt, quarum explicatio paginam hanc nobis absolvet. Non sermo est de linguarum characteribus cuique genti propriis, sed de Notis, quæ vel periodos distinguunt, ut comma, colon, punctum, vel vocabulis adduntur ut accentus, vel voces contrahunt per solas literas & signa, vel rem quandam integram designant more Ægyptiorum, quales Medicis & Mathematicis adhuc in usu sunt. Accurata sermonis distinctio per commata & puncta, quæ in Libris nostris conspicitur, apud Veteres non fuit observata, qui vel solo puncto utebantur, vel nullo. Solo puncto vel singula verba separabant, sicut Inscriptiones Romanæ adhuc docent, vel

vel periodos. Ubi plena sententia finitur ; punctum ad summam literam ponitur , ubi non multum superest de sententia , punctum ad imam literam locatur ubi fere tantum de sententia superest , quam præcessit , & tamen , ut loquitur *Donatus* Grammaticus , respirandum est , punctum ad mediam literam positum. Quos punctorum situs varios secuta sunt , nescio quando , comma , colon , punctum solum. In Manuscriptis desiderantur , etiam in *Pandectis Florentinis* rara , in primis editionibus non semper comparent. Sine ulla Punctorum distinctione Inscriptiones quoque Romanæ hodieque extant. *B. Hieronymus* primus in Bibliis vel versus vel cola versuum designavit , sicut & ipse fatetur & de eo testatur *Cassiodorus*. Vocabulis singulis adduntur puncta seu accentus ; Ebræis præsertim & Græcis. Romanis quoque fuere olim frequentissimi accentus , notæ vocum , voculationes & moderamenta dicta. Apud Græcos ante Pythagoram ignoti. Puncta Ebræorum seu accentus recentiores Lege Moysis creduntur , a Masorethis seu Thalmudistis quingentis post Christum annis inventi. Sed textui esse coævus probat *Buxtorfius* , *Wasmuth* , & alii multi contra aliter sentientes , inprimis

Capellum, *Waltonum*, *Vossium* juniorem. Rabinorum recentiorum scripta iis plerumque carent, & nonnulli adhuc Codices Ebræi Bibliorum. Unde *Gilb. Genebrardi* Εἰσαγωγή ad legenda sine punctis Ebræorum & Orientalium scripta, Lectoribus inserviet, uti & *Joh. Buxtorfii* Instructio ad lectionem Rabbinicam absque punctis vocalibus. Hinc ex Accentibus Ebræorum mysteria multa eruere fategerunt *Erpenius*, *Sam. Bohl*, & nuper *Wasmuth*, Literaturæ Ebraicæ periti Doctores & Clarissimi. De ratione vero legendi voces Masoræ decurtatas & abbreviatas idem *Buxtorfius* in Tiberiade, seu Commentario Masoretico tradit more suo, hoc est accuratè. In Græcorum Latinorumque Accentibus explicandis parcam chartæ, sive illi syllabarum brevitatem & longitudinem exprimant, sive dimensiones in altitudine, latitudine & longitudine metiantur, sive modos distinguant, nam hæc etiam trivialibus nota sunt & elementariis. Majori legentium obstaculo notæ per solas literas, vel signa, vel abbreviaturas verba contrahunt. Non scripturæ elegantiae, sed celeritati per notas, scribas olim studuisse *Galenus* noster fidem facit. Et cum notarum usus exolevisset, scribendi facultatem exercentes, ut celeriter dicta comprehenderent,

Z

quæ-

quædam verba atque nomina ex communi consensu primis literis notabant. Quod in nominibus, prænominibus, legibus publicis, Pontificum monumentis, Jurisque Civilis Libris diu mansit. Fuere istæ notæ literariæ initio pauciores, deinde in immensum excrevere, ut scripto eas comprehendere putarit necessarium *Valerius Probus* in Libello de interpretandis Romanorum Literis, ubi primis Capitibus XXI. ordine alphabetico, publicas has literas in monumentis Romanorum usitatas recenset & explicat, reliqua capita de variis Romanorum nominibus, notis ac literis singularibus in Legibus & Plebiscitis, in Actionibus in Edictis perpetuis, insumens. Quamquam vero scribendi compendium facerent, cum v. g. S. P. Q. R. Scribebant, pro Senatu Populo Que Romano; ambigua tamen lectione & Lectores intricabant, & non raro fallere observati, ut ignorabiles has literas, sicut apud *Apulejum* veniunt, singulari dictionario *Tullius* feratur exposuisse. Ambiguum certe Lectorem reddunt & suspensum, cum MTR de Matre & de Matertera accipi possit, Præt. significare queat & prætorem & præterire. Quæ literarum similitudine cum res diversissimæ notentur, non raro decipiendi Lectorem oc-

casio nata, sicut manifestum est ex Historia *Rutilii* Jurisconsulti : Scaurus quippe absolutus crimine ambitus, in *Rutilii* accusatoris sui tabulis ostendit has literas, A. F. P. R. easque sic interpretabatur, Actum Fide *Publii Rutilii*. *Rutilius* contra sic Ante Factum, Post Relatum. C. *Cannius* vero, qui *Rutilio* aderat, exclamavit neutrum significari, sed illud, *Æmilius* Fecit, Plectitur *Rutilius*. Hinc cum in Libris Jurisperitorum frequentius legerentur magna Rabularum fraude & clientum perniciæ, *Justinianus* abrogare coactus est, eandem pœnam falsitatis constituens adversus eos, qui in posterum Leges suas per siglorum obscuritates ausi essent conscribere. Omnia enim, id est & nomina prudentium & titulos, & Librorum numeros, per consequentiam literarum voluit, non per sigla manifestari; ita ut qui talem Librum compararet, in quo sigla posita essent in quocunque loco libri vel voluminis, sciret inutilem se esse codicis dominum; neque enim licentiam aperire se ex tali codice in judicium aliquid recitari, qui in quacunque sui parte siglorum haberet malitiam. Sigla vel singla dicta à voce singula, sicut explicat *Cujacius*, & ex textu *Justiniani* evidens videtur, quicquid de Sigillio scribat *Gregorius*

Tolosanus. Licet & siglum, illo interprete, si pro nota accipiat, qua intelligitur plus esse intelligendum quam expresse ad longum, ut dicunt, scriptum sit, pro singula litera capi possit. Certe apud *Valerium Probum* singlæ de Literis sumuntur & singulas literas expresse manuscripti & Libri editi habent ab *Ernstio* nostro in notis collati. Nec in Romano & Veneto Codice *συνκοπή* aliud notat, quam totius verbi in una litera contractionem, qua Librarii in scribendo uti solebant. Nisi siglæ de literis quæ præter literæ vocisque significationem, suo signo rem totam notabant, accipiantur. Signa enim alia inter scribendum adhibebant veteres, præter literas, ne intelligerentur ab aliis, quæ signa iccirco a literis distinxit *Sidonius Apollinaris*, & pro nomine posuit *Naso*:

Scis bene cui dicam positis pro nomine signis?

Ciceroni σημεῖα vocantur, per quæ ad Articulum suum de Legatis scripsit. His signis Notarii in scribendo tanta celeritate excipiebant dictata, ut volare per cereum æquor, h. e. in pugillaribus cercis, dicantur *Ausonio* & præpetis dextræ fuga loquentem prævenire. Horum beneficio & compendio citata oratio excipiebatur, ut loquitur *Seneca*, & angusta pagina Libri vasti arctabantur. De

Iliade Homeri, quæ versus habet unum & triginta mille sexcentos septuaginta, prodidit memoriæ *Solinus* notis scriptam adeo fuisse brevem, ut nucis unius testulis geminis tota clauderetur, quod minutissimis characteribus curiosos vidi in aliis imitari velle, sed impar fuit congressus *Achillis*. Periiit enim hoc scribendi genus per notas, quamquam alibi in Bibliothecis extare adhuc libros harum notarum, fama acceperit *Lipsius*, quos edi optavit, cum dolendum sit artem utilissimam periisse, reparabilem tamen, si libeat adniti. Ad has signa *Ægyptiorum Hieroglyphica* pertinent, quorum gustum nobis dedere *Kircherus* & *Bangius*, & *Characteres Chinesium*, quorum singuli rem totam denodant, vix à *P. Martinio*, qui ætatem in China consumpsit, explicandi, cum numerum Sexaginta millium superent ex calculo *Mandesloviano*. Notas suas scriptores singuli habent, quilibet in suo studiorum genere, quibus artium suarum secreta & abditos sensus occultant, vel literis solis, vel signis illiteratis. Caballistici Doctores *Ebræorum* in singulis syllabis & literis Codicis Sacri mysteria quærunt, *Danielem* Prophetam imitati, qui *Mene, Thecel, Phares* sic est interpretatus, ut singula verba singulas sententias in-

dicarent. Iidem initiales solas literas pro toto contextu ponunt. Et *Divo Cypriano* dicitur auctum esse *Ciceronis* Lexicon de Notis, ut ecclesiasticis juxta prodesset & profanis ad arcana celanda. Juris Consultorum Libri Notis olim scatebant, quas à literis distinguit *Brissomius*. Eas vero propter pessimum abusum abrogatas, ex *Justiniano* Imperatore monuimus. Pauca adhuc vestigia supersunt, clientibus innoxia, imperitis tantum crucem figentia. Modum legendi Juris abbreviaturas singulari libro *Anonymus* detexit seculo superiori Parisiis apud Guil. des Boys editus, quem in Bibliotheca Academiae inveniet quisquis in his erudiri cupit. Servantur duæ notæ literales ff & D, quæ Pandectas seu digesta significant. ff. ex Græcorum π ab indoctis scribis depravatum, quo signo cum accentu circumflexo Pandectæ olim scribebantur, vel quod literæ geminatæ perfectionem denotent, vel quia per duos Imperatores Federicos ruminatum & digestum sit jus. D. autem ex prima vocis Digestorum litera remansit, sicut ex Codice C. Paragraphus quo sententiæ distinguuntur, vel magnus est vel parvus indeque duplici signo distinguitur. Nam parvus paragraphus niger est de encausto hac forma §, qui debet legi cum

determinatione sequenti, à paucioribus *Θέμα* etiam vocatur, ex cujus vocabuli litera initiali *Θ* signum illud s profectum quidam affirmant. Hic autem communiter ponitur in glossis vel in summis recollectis. Magnus Paragraphus sic scribitur ¶, colore alio, nempe rubeo, vel flavo. Hic legi non debet, licet in legendo quando invenitur, pausare debeamus, per eum enim textus & summæ distinguuntur, ne fiat in legendo confusio. Vrevius recentiores dicta comprehendunt, ut Tituli seu capita habeant paragraphos suos, quibus res subjiciuntur, & rubrica notabantur illi : Nigrum illud sit quod titulo subjicitur & explicatur. In allegationibus quoque abbreviationes amant Jurisperiti, quas novisse ex re erit studiosorum, ne vel in legendo aberrant, vel in scribendo derideantur. Totum artificium in eo consistit, ut quando allegatur aliquis textus Juris primo ponatur nomen Libri sive Digestorum per duplex f, sive Codicis per C. sive Feudorum, postea titulus vel rubrica : deinde apponatur Lex illius tituli cum sua determinatione vel numero sequenti. Et si Lex sit longa, ponatur s primus, vel secundus &c. Exempli gratia : ff. de damno infecto, l. si finita, s. si quis autem. Cujus abbreviatio-

nis

nis hæc est significatio : In Libro Digestorum, sub titulo de damno infecto, in lege quæ incipit, si finita, in paragrapho, si quis autem illius legis. Similibus exemplis ex Codice, Authenticis, Feudis, Juris Canonici Libris rem hanc illustrent alii. De his enim Jcti sint solliciti. Nos Medicos curamus, quorum Libri signis technicis referti conspiciuntur, quorum origo & derivatio obscurior. In primis mensurarum & ponderum varios characteres excogitavit solertia Medicorum multis retro seculis numeranda, quos ex variis veterum monumentis & nummis in unum collegit *Rhodius* noster in disputatione posthuma de ponderibus vett. Medicorum, studio nostro non ita pridem lucidonata. Parcior tamen in his notis *Hippocrates* prudentia inclytus, apertis nominibus pondera & mensuras in Operibus suis tradere maluit, quam notis dubiis. Liberator *Celsus*, communem errorem erraturus, Artis Medicæ arcana signis non vulgaribus prodidit, sed posteris semet incaute obscuravit. Notæ enim illæ, sicut optime descripsit *Rhodius* noster, vel diuturnitate ævi obtritæ ac deletæ, vel Librariorum negligentia aut temeritate mutatæ sive transpositæ, vel sæpe infelici Correctorum manu vitiatæ,

aut Typographorum ignoratione penitus omiffæ, innumera, in Celfum aliosque Medicos antiquos *ᾠδαγεῖν* invexere. In Libris recentiorum Medicorum vix alia signa retinentur, præter pondera, etiam Pharmacopolis lippis & tonforibus nota, qui ℥ libræ esse notam, ℥ Unciæ, ℥ Drachmæ ℥ Scrupuli, gr. grani, haud ignorant. Nec latet illis, quid ana, p. æ, quid q. s. quid f. a. in Medicorum schedulis sibi velint, ut ex singulis partes æquales, vel quantum sufficit, secundum artis præcepta in componendis medicamentis sumatur. Non parum tamen detrimenti & Scriptores Medici & Tyrones lecturi ex notis istis capiunt. Nam Typographorum Scribarumque incuria aut incitia facile notæ confunduntur & depravantur, unde Medico Auctori infamia, Tyroni male signa distinguenti & ægris exitium manet. Chemicorum scripta his quasi flosculis nimium superbiunt. Tot signis elementa, metalla, mineralia & artis pyrotechnicæ opera involvunt, ut integro Commentario indigeant, & Oedipo Sphingis ænigmata solvente. A. Jove summo in caput mortuum desinunt. *Crollius, Schröderus* plerorumque signorum Chemicorum explicationem tradiderunt, magno præmio Lectoribus

commendandi. Sed legenda omnia & noscenda, ut Libri Chemicorum intelligantur, non imitanda. Quippe male expressa signa vel non satis cognita, multis vitæ periculum accelerarunt, exempla, quæ terreant, in recenti omnium memoria versantur, cum signum Mercurii vivi, appendice fatali addita in sublimatum degenerans innocentissimum puerum misere non ita pridem Rœskildiaë jugulaverit. Unde sapientissime in nuperis Constitutionibus Medicis sancivit *Augustus* Rex noster, ut integris Literis, non signis, medicamentorum formulæ scriberentur. In *Hippocratis* Epidem. notæ occurrunt, quas *Galenus* in Comment. negat ab ipso Hippocrate adjectas, non male tamen additas *Vallesius* censet. Formulæ suis Medici præfigunt R, quod Recipe notat, seu, ut loquitur *Scribonius*, accipe. Veteres tamen ignorant hanc abbreviaturam. Nam hanc notam antiqui Librarii adponebant ad locum cui aliquid deesset ad sententiæ integritatem, quod requiri deberet, & investigari. Ita quippè notatur in veteribus Libris R. Eodem modo illud R. apud *Plinium* aliquando in textum irrepsisse judicat *Salmesius*. Mathematicorum signa vel in cœlo finguntur, vel ex sub-lunaribus efformantur. Signa Zodiaci &

Pla-

Planetarum monstrantur in Calendariis, & vulgo sunt notissima. Numerorum notæ apud Ebræos, Græcos & Latinos ex Literis desumptæ. De Numeris eorumque Notis apud Romanos res inter omnes confessa est, quod omnis quanquam numerus ex *Boëtio* per figuram unitatis repræsentari deberet, ut denarius per decem unitates, novenarius per novem, & sic de aliis; tamen quia hoc pareret fastidium, institutum fuerit, ut omnis numerus usque ad quinarium per figuram unitatis repræsentaretur, ut unitas per I, Unum. Binarius per II. duo. Quinarium per V. quinque. Denarius per X, decem. Et notari probe monet *Probus*, quod quantum addit composita litera I ad X, tantum demat ei præposita. Plura hujus notæ apud ipsum *Probum* legantur. De Græcorum notis Arithmeticis fufius agunt *Herodianus*, *Hadrianus Amerotius*, aliique. Sex illi tantum literis alphabeti in designandis numeris utuntur, Ι Π Δ Η Χ Μ, quarum I. unitatem significat Π πέντε, h. è. quinque, Δ δέκα decem, Η ἑκατὼν Centum, Χ χίλια mille, Μ μυρία decies mille. Quæ omnes præter Π, usque ad quaternarium multiplicantur. Decadum vero, Centuriarum & Chiliadum ac Myriadum quinariorum hæc elementa Δ Η Χ Μ literæ Π

inclusa significant, ut Δ inclusum in Π , efficiat 50, H inclusum in Π 500, X inclusum in Π 5000, M inclusum in Π 50000 & ita porro. Sed Zifræ, seu Barbaricæ Arithmeticorum notæ, quibus vulgo utimur, ab Arabibus sunt inventæ seu à Mauris, unde ad Hispanos, qui Maurorum imperio fuerunt subiecti, & denique ad omnes Europæos pervenerunt, primo dissimiles hodiernis, postea avorum memoria, hac forma interpolatæ, quæ nobis in usu. In Oriente tamen notas etiam arithmeticas in usu fuisse olim ex *Cedreno* apud *Basilium* liquet, qui notarum loco literis uti iussit, quas etiam rustici legere possent, in quem finem de suo sumtus in chartas, literas atque Scribas ipse suppeditavit. Sic amarunt alterna numeri vel literis vel notis expressi. Recentiores Arabes numeros ab Indis mutuatos scribit *Erpenius*. In Algebra speciosa cum Zifræ antehac essent adhibitæ, *Cartesius* literarum notas substituere maluit, quarum significationes ex ipso Auctore ejusque interpretibus *Scoteno*, *Beauneo*, & fratre nostro *Erasmio Bartholino* peti debent. Quibus *Renaldinus* addi potest. De notis Musicorum, à *Guidone Aretino*, vel antea à *Beda* inventis, nihil attinet hic loqui, quarum differentiæ Musicis nostris no-

tiores sunt quam mihi. Nec notas Magicas hac pagina dignabo, à *Cornelio Agrippa* aliisque curiosæ artis fautoribus propagatas, quas consultius ignoramus, quam damno salutis discimus. Nam à Librorum istorum lectione prorsus abstinendum, quia occultis notis pactum cum malo spiritu initum produnt, scientiam dolofo cineri occultantes. Nolumus tanto periculo artes absconditas mercari. Videntur quidem innoxia notæ sed secum tacito consensu Dæmones vehunt. Id quod suo damno studiosus quidam expertus est, quem ferunt, cum in absentia Agrippæ in Musæum uxoris indulgentia admissus, occultas notas in Libro isto obvias lectitasset, ab homuncione cujus formam Dæmon assumpserat, qui se vocatum dicebat, faucibus præclusis fuisse suffocatum, pessimè mali Libri curiosa lectione mulctatum. Notæ autem quibus Veteres in Librorum compendiis gaudebant, verba & syllabas contrahentes, non tam Auctorum arti quam scribarum festinationi sunt adscribendæ. Illi in metro synalæphas nonnunquam amarunt, qualis in *Catullo* multas *Scaliger*, & in *Plauto Scioppius* observarunt, v. g. hoceano S', id est oceano se, frustr'es, id est frustra es, supersed' istis, h. é. supersede istis, & quæ huius census plura occurrunt. Horum vero celeritati plures errores imputandi, passim in Manuscriptis obvii, vel abbreviationes. Hinc etiam præcipuam causam variantium in Auctoribus utriusque linguæ lectionum *Conr. Rittershusius* accersit, quod Librarii, qui ex librorum descriptione victum sibi quærebant, inciticia, ruditate vel incogitantia, vel non intelligerent, quæ scriberent, & ita sæpe nobis monstra verborum, trajectis perturbatisque literis, syllabis, dictionibus procuderent: vel quod etiam

intelligentibus sæpe manus mentem in scribendo præcurreret; quodque semel scripta, vitandæ causæ deformitatis, & ne quid pretio librorum decederet, delere nollet. Ex hac Librariorum imperitia vel verborum contractione, transpositione & varia Auctorum loca corrigenda judicavit *Fr. Robertellus*, & exemplis illustravit, qui de hoc argumento legendus est. Literati tamen Librarii in describendis Auctoribus celeritati studentes sine errore aut ignorantia abbreviaturis plusculis verba contrahendo Lectoris promptitudinem remorantur. In Manuscriptis Longobardicis istas offendimus abbreviaturas, alibi colligendas, quas servatas auctasque videmus in primis Editionibus Auctorum ad exemplaria Longobardica, quæ alioquin optima, excusis, & in vastis Theologorum Scholasticorum, Juris Glossatorum & Avicennæ Interpretum voluminibus, quæ hodieque in Bibliothecis asservata cum tædio leguntur. Non istis characteribus ipsi Auctores Romani sunt usi, sed quadratis & cubitalibus, quales Inscriptiones Romanæ habent. Nusquam tamen talia Volumina extant, neque ab ipsis Auctoribus scripta, quantum ego quidem viderim. Perierunt tot olim bellorum motibus, & urbium incendiis à Barbaris, Gothis, & Longobardis, ut vix paucorum manibus exarata effugerint publicas ruinas, ad quorum normam deinde usitato characterè Longobardico in claustris Monasteriorum scribæ, postquam *Carolus Magnus* halcyonia, pulsas Italia Longobardis, procurasset, certatim plurimorum copiam fecerunt. Quibus deinde successerunt ante Typographiæ natales alii in Italia scribæ, qui minutori characterè cursoriaque manu Manuscriptos Codices, à prioribus ætate & elegantia diversosexararunt. Si autographa

veterum ad nostram ætatem perennassent , ingenti Criticos onere sublevassent , in emendandis Longobardorum & Scribarum posteriorum erroribus occupatissimos. Ex illis *Plinii* tempore superfuerunt nonnulla. Et *αὐτόγραφον* *Sophoclis*, *Euripidis* & *Æschylis* ab Atheniensibus prece & minis pro Bibliotheca sua *Ptolomeus* *Ægypti* Rex obtinuit. De Pandectis Florentinis *Marfilius Ficinus* iudicat proprie fuisse ab ipso Justiniano compositos , neque solum transcriptos , sicut testatur manu propria in calce Tomi primi Pandectarum. Fateor magnam antiquitatem præ se ferre istas membranas , majusculis etiam characteribus scriptas , adeoque non sine veneratione à nobis aliisque inspectas : sed manu Imperatoria , vel ejus seculo scriptas conjectura tantum *Ficinus* assequutus videtur , licet ipse interfuerit , cum A^o. salutis 1486 reperirentur. Erroribus enim variis scatere deprehendit *Anton. Augustinus* , qui beneficio Magni Etruriæ Ducis penes se hunc Codicem diu habuit. Præter abbreviationes frequentes Longobardica Manuscripta etiam literarum permutatione varia scatent , ex qua sensus non raro dubius , lectio varia , & contentionis occasio inter Criticos nascitur. Collegit ea ordine abecedario *Scioppius* de arte critica , sicut in variis manuscriptis invenit , ut emendandi Auctores facem Eruditis accenderet. Nam , ut à primo elemento ordiar , literam a passim observavit scriptam pro d , ut avorum pro duorum , pro e , ut potasse pro potesse , pro i , ut ante pro inte , pro o , ut calles pro colles , quom pro quam , pro u , ut amor , lacus , latilant , pro humor , lucus , lutilant , cum ægre in veteribus libris a ab u internoscatur. Sic per singula literarum elementa progreditur magnus ille Criticus

cus, docetque porro in Manuscriptis hujus modi multa esse corrupta, omissa, supervacua, transposita vel distantis vel scribentis culpa, hujusque negligentis, Characterum similitudine decepti, & compendiosa scriptura utentis. In compendio enim hoc nonnunquam literam aliquam majusculam poni, quæ innuat se à lectore prorsum vel retro repeti debere, quo nihil in *Pandectis Florentinis* sæpius occurrit. Sic apud Apulejum *Stewechius* scribit, in lemur**ES** reformant, pro in lemures se reformant. Ipse *Scioppius* apud Petronium, Trimalcion**IS** copanta est, pro Trimalcionis Sycophanta est. Sic MS *Symmachi*, Sa**TE**mporis pro sat temporis. Præco in Manuscripto *Camerarii* Bacchidis pro pr' co id est pro æquo. Ita in *Pandectis Florentinis* in l. **LII.** Librorum § ult. de leg. **III.** dactuliotheca**M** eam pro dactyliothecam meam. Id quod ex *Festo* & *Isidoro* illustrat *Radulph. Fornerius*: Integra quoque verba ita per compendium decurtata, ut Reip. Pro Reipublicæ, placidum pro pelucidum &c. in fine dissertationis eruditæ laudatus *Comes Scioppius* persequitur, quem adeant, quos hi in legendo scrupuli deterrent, & à melioribus Libris seu Manuscriptis seu editis avocant, ne quidquam amplius sit reliquum, quod nos remoretur quin per libros omnes inoffenso pede progrediamur, sed DEO duce, qui vestigia tuta esse jubeat quæ sequamur.

F I N I S.



of

526

